

Uraat To Yes Mbanjoona To Yesu Krisi Wok Bilong Ol Aposel—The Acts Of The Apostles

Paesiin to Lukas

¹⁻³ O Teopilus, uraat naol tau Yesu ighamu imin maata, tomania saveenj isov tau i ipaduduunj tam-tamon pani, tauta igheen ila rau tau naboode ilat payo imin maata na. *

Saveenj tomania uraat tooni tawe ilam ilam le Maaron ighamu imuul izala pa sambam. Yesu imaat ve iburig muul, ve mboŋ tamoot ru tau itaghoni na, i ila ivotvot to yes mbanjoona tooni tau i tauu isiigh zi timin le na, ve itotoi tauu pazi ila eez maata maata. Leso tiwatagh kat tigde i iburig pa mateegh, ve ileep maata yaryaare. Saawe tana, ila uraat to Avuvu Patabuyaana, i ipaghazonai ngar toozi pa tutuunj tooni siriv. Ve isavsaav pazi pa pooz to Maaron. *

Yesu isaav pa mbanjoona tooni ighe malau mako pale Avuvu Patabuyaana izilam

⁴ Saawe ee, Yesu tomania mbanjoona tooni tilepleep, ve Yesu isaav pazi ighe: “Apul Yerusalem rekia sov. Aleep ve asanan pa gabua tau Tamaŋ ighe igham payam itaghon saveenj mbuaan tooni

* **1:1-3:** Rau tau Lukas iboode imin maata, ene vaaru poia tooni.

* **1:1-3:** Lu 1:1, 9:51, 24:13+; Yo 20:19+; 1Kor 15:5+

na. Gabua tawe, yau nasavia payam ve aloon saveenja wa.*

⁵ ‘Yoan, i irughuuz tamtamon pa yaa. Eemon yam, malau mako pale Maaron igham Avuvu Patabuyaanj payam.’ ” *

⁶ Ra mbanjoonja tooni tau tilepleep tomania na, tighasoni tigde: “Tiina, mindai? Saawe tau ughe ugharaat mulin lepoogh to yei Israela lesu taumai ningin nugh tsiei, tauta ene?” *

⁷ Yesu iyol alinjazi ighe: “Saawe to gabua tau-vene, yam irau awataghi mako. Ene igheen to Tamañ mon. I ta ighur saawe to gabua naol isov tivot.*

⁸ Ve aloonj. Saawe tau Avuvu Patabuyaanj izilam gha izala pavomim, yam pale agham tapirimim tiina ila tooni. Lesu ayooz ariaanj pa votiaanj varug ve apariaanj saveen tsiau. Pale agham uraat tane izi Yerusalem imin maata. Le isov, o alaagh irau taan isov to Yudea, ve ala pa Samaria, ve alaagh irau nugh isov to taan.” *

Yesu imuul izala pa sambam

(Mk 16:19-20; Lu 24:50-53)

⁹ Yesu isavsaav pazi le isov, ra Maaron indae ila matazi gha imuul izala pa sambam, le taitai ipoona ve tighita muul mako. ¹⁰ Matazi itaghoni gha izala, ve malau mako zeran ru tivot toozi gha yesnja tiyozyoos. Nonoghiinja toozi pisosoonja mon. Yesuru tisaav pazi tigde: *

* **1:4:** Lu 24:49; Yo 14:16+; Mbanj 2:2, 33 * **1:5:** Lu 3:16 * **1:6:** Mika 4:8; Lu 24:21 * **1:7:** Mk 13:32+; 1Tes 5:1+ * **1:8:** Lu 24:47+; Mbanj 2:1+ * **1:10:** Lu 24:4

11 “Yam zeran to Galilaia, puughu mindai ta ay-ozyoos ve matamim izazala pa sambam? Aloon. Yesu tawe, aazne Maaron ighamu gha ipul gham, ve imuul izala pa sambam. Eemon murei, i pale imuul izilam raraate imin tau aazne aghita izala na.” *

Tighur Matias igham Yudas niia

12 Ra mbiwa tooni tipul loloz Oliv, ve timuul tila pa Yerusalem. Loloz tawe igharau Yerusalem, irau 1 kilomita ma vene. *

13-14 Yes tilaagh tila tivot Yerusalem, ve malmalizi tizala pa niazi to lepoogh tau igheen ruum loolo saanja na. Zeran tawe, ene Petrus yesuru Yoan, Yakobus, Andreas, Pilip gha Tomas, Patoromai gha Matayu, ve Yakobus ite tau Alapai naatu na, ve Simon (i to yes Selot) ve Yudas tau Yakobus naatu na. Saawe isov, yesnja Yesu tiina Maria tomania taznja ve zilivaa siriv, loloz eemon ve tiluplup zi pa sunjuun.

15 Saawe ee, yes tau tighur ila to Yesu na, tilup zi. Yes irau ndinndin ee ve tamoot ee (120) ma vene. Petrus iburig iyooz ila sosozi, ve isaav pazi ighe: 16-17 “Yam tonvetaz, muun, Avuvu Patabuyaanj ipaburigin kinik David gha ivotia Maaron aliinja tau injarui gabua tau ivot pa Yudas na. Saveenja igheen ila Maaron aliinja tau tiboode na, ve aazne anoonja ivot wa. Pasaa, Maaron aliinja isov aat ighur anoonja ivot itaghon i tauu ngar tooni. Yam awatagh: Yesu igham Yudas imin mbiwa tooni, ve itinja taluplup ghiit ve tabesbees pa uraat to

* **1:11:** Mt 26:64; 1Tes 4:16; Syg 1:7 * **1:12:** Lu 24:52

Maaron. Eemon murei, Yudas ilaagh tomania Yesu koiŋa, ve itotoia pazi, tauta tikisi.*

¹⁸ Ngar tau Yudas ighamu na, iduduun mako. Eemon tigham le atuya, ve ighol le taan sirivu ee pani. Eemon ila itap izala taan tawe, le aapo ivavaal ve kodkooda ivot. ¹⁹ Gabua tana vaaru ilaan irau tamtamon tisov to Yerusalem gha tilooŋa. Puughu tane ta tiwaat taan tawe ila aliŋazi tighe: ‘Akeldama.’ (Eez Akeldama puughu, ene vene: ‘Taan to siŋ.’)*

²⁰ “Saveeŋ ziiri ee tau igheen ila Mbouŋ To Yes Israela, isaav tauvene:

‘Niia to lepoogh pale ŋginaaŋa.

Tamtamon eta irau ileep ta sewe muul mako.’

*

“Ve Maaron aliŋa ziiri ite isaav tauvene:

‘Tamtamon ite paam aat igham niia ve igham uraat tooni to ŋginiŋ.’*

²¹⁻²² “Tauvene tamtamon eta aat igham Yudas niia. Leso yeŋa nipariaaŋ burigiŋ to Yesu saveeŋa. Taghita tamtamon toit eta tau ipaak ghiit ve itiŋa Yesu talaghlaagh pa saawe tau ŋeer rughuzaaŋa Yoan ighamgham uraat tooni na, ve ilam le indeeŋ saawe tau Maaron indai Yesu gha ipul ghiit ve imuul izala pa sambam.”*

²³ Petrus isavia saveeŋ tane le isov, ra tipayooz zeran ru: Yosep Barsabas tau eeza ite Yastus na, ve Matias. ²⁴⁻²⁵ Tipayooz yesuru, ve tisun pa Maaron tighe: “O Tiina tsiei, yo uwatagh tamtamon tisov loloz. Tauvene zeran ru tane, utotoi sei ta yo ughe

* **1:16-17:** Mbo 41:9 * **1:19:** Mt 27:3+ * **1:20:** Mbo 69:25

* **1:20:** Mbo 109:8 * **1:21-22:** Lu 24:48+

ughuru igham Yudas niia. Leso imin mbanjoonja tsio ve igham uraat tsio tane. Pasaa, Yudas, i ighur muuri pa uraat tsio, ve imaat gha ila nugh tau yo ughuru pani pataghaan na.” *

²⁶ Tisun le isov, ra tipayooz mbuur le itotoi Matias. Tauta Matias igham Yudas niia, ve ingaltarezai mbanjoonja sanjavul ve ee gha timin sanjavul ve ru muul.

2

Avuvu Patabuyaana izilam

¹ Tizaa pa saawe to Pentekos, *
ve yes tau tighur ila to Yesu na, tilup zi ila niazi eemon ve tilepleep. ² Malau mako ve tiloon gabua luutu imin yaghur tiina kat ipul sambam ve izilam le irau ruum loolo tau tilepleep pani na. *

³ Ra tighita gabua imin yav yaama ivot ve ivalagh ghi le irau yes tisov pavozi. *

⁴ Ve Avuvu Patabuyaana ipavon zi tisov, ve ipaburigin zi gha tisavsav ila nugh nugh alinjazi. *

⁵ Saawe tana, Yuda katini tau tileep irau nugh marij na, tilam tilup zi izi Yerusalem paam. Zeran tawe matazi ingalngal Maaron, ve titaghon ngar tooni.

* **1:24-25:** Yo 2:25; Syg 2:23 * **2:1:** Pentekos, ene lupunun tiina ee to yes Yuda. Ivotvot pa ndaman ta naol ne (Igham 23:16). Ene saawe tau yes Yuda tipakur Maaron pa mariri tau ivot pazi. Yes tilup zi pa Pasova, ve mbonj tamoot ru sanjavul (50) isov, o lupunun to Pentekos ivot. Yes Grika tiwaat tamoot ru sanjavul (50) ila tauzi alinjazi tigde ‘pente.’ Tauta tiwaat lupunun tawe eeza Pente-kost.
* **2:2:** Ezek 37:9+; Yo 3:8 * **2:3:** Mt 3:11 * **2:4:** Mk 16:17; Yo 7:37, 14:16; Mbanj 4:31, 10:44, 19:6

⁶ Gabua tau ivot na, eval tiina tilooŋ luutu. Tauvene tISOV tilam tIghE tIghita. Eemon tilooŋ saveeŋ to yes tau Avuvu Patabuyaan ipavon zi na, le ŋgar toozi imbool. Pasaa, yes eŋaeŋa tISOV tilooŋ saveeŋ ila tauzi aliŋazi duduun. ⁷ Tauta avozi ikaak, ve tiil gabua tana ŋgara tIghE: “Wai, yes tau tisavsaaV ne, yes tISOV to Galilaia. ⁸ Mindai ta iit eŋaeŋa tasov talooŋ zi tisavsaaV ila aliŋaan duduun? Aghita. Saveeŋ tau tisasavia we, ene imin tamtamon to nugh toIt duduun tISavsaaV. ⁹ Iit tane tasov to nugh eemon mako. Iit siriv to taan sirivu to Partia, Midia, ve Elam. Ve siriv to Mesopotamia, Yudea, ve Kapadosia. Siriv to Pontus ve Asia, ¹⁰⁻¹¹ ve siriv to Pirigia, Pampilia, Isip, ve taan sirivu to Libia tau igheen igharau Sairini na, ve siriv to sisi Krit, ve siriv to taan sirivu to Arabia. Iit loomba siriv taleep Rom ve talam paam. Tamtamon toIt siriv, yes Yuda tauu. Ve iit siriv, Yuda mako. Eemon tator ŋgar toIt ila pa Maaron ve tataghon yes Yuda pa sunjuun toozi. Eemon saveeŋ tau zeran tawe tisasavia pa uraat arianaazi to Maaron, ene iit eŋaeŋa tasov talooŋa ila tauun aliŋaan duduun.”

¹² Tauvene yes eval tana tISOV avozi ikaak, ve tIgham ŋgar naol. Ve tivaghasoni zi tIghE: “Wai, gabua tane, puughu mindai?” ¹³ Eemon tamtamon siriv tiŋiŋ pa yes tau tIghur ila to Yesu na tIghE: “Ewe aat tIghun vaen tiina, tauta tivayau avozi.”

Mos tau Petrus ivotia pa saawe to Pentekos

¹⁴ Petrus iyozyooz tomania zeetŋa sanavul ve ee. I isaav pa eval tiina tana toman aliŋa tiina ighe:

“Yam tamtamon to Yuda, ve yam siriv tau alam aleep izi Yerusalem paam, asov aghur talinjamim payau poi. Leso napaghazonjai gham pa gabua tau ivot ne puughu ve aghazonj pani. ¹⁵ Mindai, yam aghe tamtamon tane tighun tiina le ngar toozi ivaghamgham? Mako. Aghita. Ngarig gha mbonjoozo. Aaz izalam geeg soone. Sei ighunghun pa saawe tauvene? ¹⁶ Aloonj. Gabua tau ngarig ivot ne, ene itaghon Maaron aliinja tau muunj i ivotia ila propet Yoel aavo. Ighe:

¹⁷ ‘Maaron isaav tauvene: “Saawe murei † ighe ivot,

yau pale narei Avuvug irau tamtamon tisov. Mako natmimnja zitamoot ve zilivaa timin propet, ve tivotia alinjag pa tamtamon. Tauvene zitamoot tsiam paghpaaghu pale tighita gabua siriv ila tandaghiinj. Ve zikoonja tsiam pale tighita gabua siriv ila vivuunj. *

¹⁸ Yau pale narei Avuvug irau besoonja tsiau tisov. Yes zitamoot ve zilivaa paam. Leso timin propet, ve tivotia alinjag pa tamtamon. *

¹⁹ Ve yau pale nagham gabua ngeretazi tintiina siriv tivot ila sambam saamba,

† **2:17:** Saveenj ziiri ‘saawe murei’, ene injarui taan saawe mon mako. Ene saawe malaua. Iburig pa saawe tau Yesu imaat ve iburig pa mateegh, ve ila ila le taan saawe. Ilaal tiina to saawe murei, ene uraat to Avuvu Patabuyaanj. Saawe munjaana, ene saawe tau Maaron ipaburigin uraat tooni ila iit tamtamon sosoon, ve igham yes Israela tivot. Ve saawe murei (o ‘saawe paaghu’ o ‘last days’), ene saawe tau i ipasov uraat tooni, ve saveenj mbuaanj tooni naol isov tighur anoonja. * **2:17:** Is 44:3; Ezek 39:29 * **2:18:** Mbanj 21:9

ve naghām gabua ngeretazi tivot izi taan paam, leso natotoi taug pa tamtamon. Sinj pale imalinj, ve yav ighan nugh, ve mbuasa tiina iza le ikau nugh.

²⁰ Aaz pale ighaaz muul mako, ve nugh ndo-room.

Ve kaiyo pale sinjsinaanj.

Mako saawe tiina to Neer Tiina ivot, ve itotoi tapiri ve mbonari ivot ighazoon. *

²¹ Saawe tana ighe ivot, tamtamon tisov tau titaņ rarai Maaron pa uleenj, ene pale igham mulin zi, ve tileep poi.” ’ *

²² “Tauvene yam zitamoot to Israel, aghur taliņamim poi pa saveenj tsiau tane. Yam awatagh: Yesu to Nasaret igham uraati arianaazi ve gabua ngeretazi tintiina ila sosomim to itotoi tauu payam. Uraat naol tau Maaron igham zi tivot ila Yesu niima, ene eez tau Maaron ipaghazonjaini ighe i imbaano ta ilam. *

²³ Ngar tau ivot pa Yesu na, Maaron igham ngar pani alok wa. I ighur Yesu ila nimamim itaghon tauu ngar tooni. Tauta akisi ve aghuru ila yes Roma tau tikankaan pa tutuunj tooni na nimazi, ve anazi tiravu izala ai pambaroonj gha imaat. *

²⁴ Eemon Maaron igham mulini pa yavyavuunj to mateegh, ve ipaburigini. Pasaa, mateegh irau to ikisi ne mako. *

²⁵ Muunj, kinik David isavia saveenj siriv tau iduduunj kat pa Yesu. Ighe:

* **2:20:** Mt 24:29, 27:45 * **2:21:** Yoel 2:28+; Mbanj 4:12; Ro 10:13

* **2:22:** Yo 5:36 * **2:23:** Is 53:10; Mbanj 4:28 * **2:24:** Lu 24:5; Mbanj 3:15

‘Saawe isov, yau naghita Maaron ilepleep naghoge.

I ilepleep ila zigeg tapir ve ipapalot ghau.

Tauvene gabua eta irau igham ghau narur ne mako.

²⁶ Tauta lollog poia kat,

ve napakuru ila avog toman tintinig.

Onoon, yau pale namaat. Pasaa, yau tamtamon to taan.

Eemon lollog ruru mako. Tauta naleep ve naghur matag pa uleen tsio mon.

²⁷ Pasaa, yo irau ughur murim payau ve upul ghau namaat gha nazila mateegha niazi ne mako.

Yau tamtamon tsio patabuyaaj. Tauvene yo irau upul ghau namaat ve patag imbuuz ila naal loolo ne mako.

²⁸ Yo utotoi ghau pa eez to lepoogh poia.

Isaav ighe naleep tomani ghom, yo pale ugham ghau lollog poia le poia kat.’ *

²⁹ “Aiyo, yam tonvetaz, yau nasaav ghazoonja payam: Timbuun David, i imaat gha titavia alok wa. Indeen saawe tawe ve ilam aazne, naal tooni ighengheen tomani ghiit izi nugh tane. *

³⁰ Eemon David, i propet to Maaron. Ve i iwatagh ighe Maaron imbu saveej tomania, ve ipariaanja le iyaryaanj kat ighe i pale ighur paaghu tooni eta imin kinik. Leso aana igham pooz imin i tauu. *

³¹ Maaron ipaghazonjai David pa gabua siriv tau murei pale ivot. Tauta i isavia burigiinj to Mesia, ve ighe Maaron irau ighur muuri pani ve ipuli imaat

* **2:28:** Mbo 16:8+ * **2:29:** 1King 2:10; Mbanj 13:35+ * **2:30:** 2Sam 7:12+; Mbo 89:3, 132:11

gha izila mateegha nugh toozi ne mako. Ve irau paata imbuuz ila naal loolo ne mako. *

³² “Yesu tau aazne nasasavia ne, Maaron ipaburigini pa mateegh wa. Ve yei nisov tane nighita pa matamai. Tauta nipariaan saveen tooni. ³³ Ve Taama Maaron ighamu izala pa sambam, ve ighuru ileep ila niima tapir, ve igham Avuvu Patabuyaan pani. Tauta aazne, Yesu aana isakia Avuvu tawe ilam irau ghei itaghon saveen mbuaan to Maaron. Avuvu tane, tauta imin puughu pa gabua tau aazne aghita ve aloonja. *

³⁴ Timbuun David, i izala sambam imin Yesu mako. Eemon i isavia gabua tau murei ivot pa Yesu na ighe:

‘Maaron isaav pa Tiina tsiau ighe:

“Ulam mbolem izi ila pa nimag tapir,

³⁵ le irau natatan koiama ve tapirizi isov kat, ve uvaghaaz zi ila aghem saamba.” ’ *

³⁶ Ra Petrus aavo iyaryaan pazi ighe: “Tauvene yam Israela asov irau awatagh kat tauvene: Yesu tau yam aravu izala ai pambaroon gha imaat, tauta Maaron ighuru imin Tiina ve Mesia.”

Eval tiina tighur ila to Yesu

³⁷ Eval tiina tiloon saveen tane le ingal zi. Tauvene tighason Petrus tomania mbanjoonja siriv tigde: “Wai, toghmainja, ighe tauvene, pale nigham mindai?” *

³⁸ Petrus iyol alinjazi ighe: “Yam asov irau apul ngar tsiam sasaghati ileple, ve atoor ngar tsiam ila pa Maaron, ve agham yaa ila Yesu Krisi eeza.

* **2:31:** Mbo 16:10 * **2:33:** Yo 14:26; Pil 2:9 * **2:35:** Mbo

110:1 * **2:37:** Hib 4:12

Leso Maaron ireu sosor tsiam ilale, ve irei Avuvu Patabuyaany payam. *

³⁹ Saveen mbuaany tane ilat pa yam Israela tomanianatmimnya, ve tamtamontisov tonugh nugh tau tileep malau na paam. Pasaa, saveen tane injarui tamtamontisov tau Tiina toit Maaron ipoi zi to timin le.” *

⁴⁰ Petrus isavia saveen tane mon mako. I isaav ariiaan pazi pa saveen siriv siriv paam. Pa ighe igham zi titoor ngar toozi ila pa Maaron. Tauvene isaav pazi ighe: “Atan rarai Maaron, lesogham mulin gham! Mako pale alalemim tomania zerasasaghati tau tileep pa saawe tane.” *

⁴¹ Saawe tana, tamtamon irau ndinndin ndinndin tol (3,000) ma vene tighur ila Petrus aliina, ve tigham yaa. Tauvene yes paam tilonj tila lupuun to Krisi.

Yes tau tighur ila to Krisi imin maata na gabuazi

⁴² Yes tau tighur ila to Krisi na, monmon tighurghur talinjazi pa saveen tau yes mbanjoonja tipaduduun zi pani na, ve tighamgham ngar pani poi. Ve tivavaule zi, ve tiluplup zi pa sunjuun tomania ghanghaniin. ⁴³ Maaron igham gabua ngeretazi naol tivotvot ila yes mbanjoonja nimazi. Tauvene tamtamontisov tau tighita Maaron tapiri na, roinj tiina igham zi. *

⁴⁴ Yes tau tighur ila to Yesu na, tisov lolozi eemon, ve tivavaule zi. Eta inguruut gabua tooni mako. Tighita gabua toozi isov tighene gabua to eval

* **2:38:** Mk 16:16; Lu 24:47; Mbanj 3:19 * **2:39:** Is 57:19; Yo 10:16; Mbanj 14:27; Ep 2:13+ * **2:40:** Ga 1:4 * **2:43:** Mbanj 5:12; 2Kor 12:12

tisov. ⁴⁵ Tauvene tigholgholia taan ma gabua toozi siriv, ve tighamgham maeta pa yes tau mbolaan igham zi na. Tauta tisov lezi gabua le irau zi. *

⁴⁶⁻⁴⁷ Mataaz ta naol ne, lolozi ve njar toozi eemon, ve tiluplup zi ila Rumei Tiina naagho. Ve tiluplup zi pa sunuun tomania ghanghaniin ila ruum toz toz paam. Saawe tau tilup zi pa ghanghaniin, lolozi poia ve tipapait Maaron eeza. Tauta tamtamon tisov tighit zi ve lolozi poia pazi. Ve saawe isov, Tiina toit Yesu ighamgham uraat ila tamtamon siriv lolozi to igham mulin zi. Tauta tighur ila to Yesu, ve tijnaltarezai yes tau tighur ila imin maata na, le timin eval kat.

3

Petrus igharaat narape ee

¹ Saawe ee, aaz anunu igham tol, ve sunuun to ravrav ighe ivot. Tauvene Petrus yesuru Yoan tizala pa Rumei Tiina. ² Yesuru tila le tizaa to neer narape ee tau tibaado gha tilam. Neer tawe, tiina ipooa aaghe saghati. Tauvene monmon tighurghuru igharau sirsiir to Rumei Tiina atamana tau tiwaato tigde ‘Ataman Paghuuna.’ Leso ileep ta sewe, ve isun le gabua ila to yes tau tigde tilon tila sirsiir to Rumei Tiina loolo na. ³ I ighita Petrus yesuru Yoan tilam le tigde tilon tila sirsiir to Rumei Tiina loolo, ra isun yesuru ighe tiuule. ⁴ Yesuru matazi ila pani, ve Petrus isaav pani ighe: “Matam ilam!” ⁵ Tauvene neer tawe ighur maata pa yesuru ighe aat tigham le gabua eta.

* **2:45:** Lu 12:33; Mbanj 4:32+; 2Kor 8:13

⁶ Eemon Petrus isaav pani ighe: “Yau leg maet silva ma gol eta mako. Eemon gabua tau ighen tsiau ne, tauta aat nagh payo. Yau nasaav payo: Ila Yesu Krisi to Nasaret eeza, uburig ve ulaagh!”

*

⁷⁻⁸ Ra ikis neer tana niima tapir ighe iiti iburig. Reikia mon ve neer tana aaghe sengaanja poia. Tau-vene purukia iburig iyooz ve ilaagh. Ra iyatyaat toman tintini, ve ipapait Maaron eeza, ve itaghon Petrus yesuru Yoan, gha tilonj tila sirsiir to Rumei Tiina loolo. ⁹ Tamtamon tisov tau tighita neer tana ilaghaagh ve ipapait Maaron eeza, ¹⁰ yes tighi-laalo tighe i ta monmon ilepleep igharau Ataman Paghuuna, ve isunjun pa le gabua na. Tauvene tirur pa gabua ngereeta tau ivot pani na le avozi ikaak.

Mos tau Petrus ivotia ila Rumei Tiina naagho

¹¹ Neer tana ikiskis Petrus yesuru Yoan, ve malau mako ve eval tiina tilaan tilam tivot toozi izi ruum to lepoogh tau Solomon irao ila Rumei Tiina ziige na. Pasaa, tirur pa gabua ngereeta tau ivot na le ngar toozi imbool.

¹² Petrus ighit zi, ve isaav pazi ighe: “O yam Israela, puughu mindai ta arur pa gabua tane ve adaad matamim payei? Yam aghe yeiru lemai tapirimai tiina, ma nitaghon katin Maaron ngar tooni, tauta nigham neer tane ilaagh ne? Mako.

¹³ Maaron to timbuunja, i Maaron to Abaram, Isak ve Yakop. I ta igham besoonja tooni Yesu izala pa sambam, ve aazne igham gabua tane to ipaghazonai Yesu ighe i eeza tiina. Yam awatagh:

* **3:6:** Mbanj 14:10

Taumim aghur Yesu ila Piladus niima. Ve saawe tau Piladus iloon saveen tooni ve ighe ipuli ilat payam, yam azori. *

¹⁴ Aghita. Yesu, i neer patabuyaana ve duduuna. Eemon lolomim pani mako ve azori. Ve neer tau irav tamtamon imaat, tauta yam azoornugh aghe le Piladus ipuli ilat payam. ¹⁵ Tauvene neer tau imin puughu pa lepoogh maata yaryaare, tauta yam aravu imaat. Eemon Maaron ipaburiginini pa mateegh, ve yei tane nighit katini pa matamai. Tauta aazne, nipariaana saveena, leso aghur ila tooni. *

¹⁶ Etaan tane, yam awatagh patajani tooni. Yesu eeza ve tapiri mon, tauta igham neer tane tapiri ivot ve tiini poia. Gabua ite paam mako. Yesu ipaburigin ghei gha nighur ila tooni ariaana. Ve ghuruuna ila tsiei tau injarui Yesu, tauta iuul neer tane gha tiini poia, ve aazne iyooz ila naghomim. *

¹⁷ “Yam tonvetaz, yau nawatagh: Yamna daaba tsiam aghilaal Yesu mako, tauta agham ngar saghati pani. *

¹⁸ Ve aloona. Muuna, Maaron ivotia aliina ila propet tooni tisov avozi ighe Mesia tooni aat ibaad patajani ve iyamaan yavyavuuna tiina. Ngar tau yam agham pa Yesu, ene eez tau Maaron aliina tawe anoona ivot. *

¹⁹⁻²⁰ Tauvene yam apul ngar tsiam sasaghati ileple, ve atoor ngar tsiam imuul ila pa Maaron. Leso

* **3:13:** Igham 3:6; Lu 23:18+ * **3:15:** Lu 24:48; Mbanj 1:8, 2:24,

32+ * **3:16:** Lu 17:19; Mbanj 4:10 * **3:17:** Lu 23:34; 1Kor 2:8

* **3:18:** Mbo 22; Is 53:5+; Lu 24:44; 1Pe 1:10+

Maaron ireu sosor tsiam isov ilale, ve Tiina toit ileep tomani gham ve ipariaaŋ gham pa tauu tapiri. Ve i pale imbaaŋ Yesu imuul ilam. I Mesia tau Maaron tauu ighuru to igham mulin gham. *

²¹ I aat ileep izi nugh sambam ve isasaŋan le irau saawe tau Maaron igharaat mulin gabua naol isov, itaghon saveeŋ tau muuŋ i ivotia ila propet tooni patabuyaana avozi. *

²² Muuŋ, Mose ibood saveeŋ siriv tau izaa to Yesu ighe:

‘Tiina tsiam Maaron pale ighur tamtamon tsiam eta imin propet, ve ivotia Maaron aliina payam imin yau. Tauvene saa saveeŋ tau ighe i isavia, yam aat alooŋa ve ataghoni. ²³ Ve isaav ighe tamtamon eta ilooŋ aliina mako ve izoor saveeŋ tooni, ene pale Maaron ivaghamunia gha ilale. Leso iziire ighau pa tamtamon tooni Israel.’ *

²⁴ “Tauvene aghita. Saawe to propet Samuel ve ilam, propet tisov to Maaron tisavia gabua tau ivot pa saawe tane. *

²⁵ Yam paaghu to yes propet. Saveeŋ toozi, ene inarui gham. Ve saveeŋ tau Maaron imbua tomania timbuunŋa na, tauvene paam. Inarui gham. Matamim ingal saveeŋ tau Maaron isavia pa Abaram na. Ighe:

‘Paaghu tsio pale timin eez to poia tsiau izaa to nughmariŋ to taan.’ *

²⁶ “Tauvene aghita. Saawe tau Maaron ighur

* **3:19-20:** Mbanj 1:11; 1Tes 4:16 * **3:21:** Ro 8:21+; 2Pe 3:13

* **3:23:** Lo 18:15+; Mbanj 7:37 * **3:24:** Lu 24:27 * **3:25:** Gnp 12:3, 22:18; Ga 3:8

uraat ila besoonja tooni Yesu niima, i imbaanjo ilat payam imin maata. Leso igham gham atoor ngar tsiam, ve yam enaenja asov apul ngar tsiam sasaghati ileple, ve poia tooni iza tsiam.” *

4

Tipayooz Petrus yesuru Yoan ila pooza tau tinjinjin yes Yuda na naghozi

¹ Petrus yesuru Yoan tisavsaav pa tamtamon soone, ve zeran siriv to watoonrau, ve daaba to yes uraata tau tinjinjin Rumei Tiina na, tomania Sadusi siriv tinjarui zi tilam. ² Yes tilam toman atezi yavyav pasaa, yesuru tipaghazonjai tamtamon pa Maaron aliinja ve tivovotia saveen pazi tigde: Yes tau tipaak Yesu ve tileep ila tooni na, Maaron pale ipaburigin zi pa mateegh. * *

³ Saawe tana, ravrav izi wa. Tauvene tikis yesuru, ve tighur zi tilonj tila ruum to yavyavuunj. Leso tileep ta sewe le nughizau, mako titiir saveen toozi. ⁴ Yes tau tiloonj saveen to yesuru na, katini titoor ngar toozi ve tighur ila to Yesu. Tauvene tinjaltarezai yes tau munjanazi na le timin eval kat. Yes zitamoot mon irau ndinndin ndinndin liim (5,000) ma vene.

⁵ Mbonj nughizau, ra pooza to yes Yuda, tomania nginiinja toozi, ve zeran ngara siriv to tutuunj tilup zi izi Yerusalem. ⁶ Ve Anas tau daaba munjaana to watoonrau, tomania Kaiapas tau igham Anas niia

* **3:26:** Mbanj 13:46, 22:21; Ro 1:16 * **4:2:** Yes Sadusi tighur ila tigde mateegha irau tiburig muul mako (Mt 22:23). Tauta atezi yavyav pa saveen to Petrus yesuru Yoan. * **4:2:** Mbanj 17:18, 23:6

na, Yoan, Aleksander, ve Anas ziiri waaro tooni siriv, yes tisov tileep ila lupuuŋ tawe paam. †

⁷ Tilup zi ve tilepleep, ve tigham Petrus yesuru Yoan tilam, tipayooz zi ila naghozi, ve tighason zi tigde: “Ai, gabua tau noor ivot na, yamru agham tapirimim mindai, ta agham gabua tana ivot? Ve agham uraat tana ila sei eeza?”

⁸ Avuvu Patabuyaaj izeev Petrus, ve i isaav pazi ighe: “Yam pooza ve yam ŋginiija, mindai?

⁹ Aazne, aghe aghason ghei pa uraat poia tau ivot pa ŋeer narape tane, ve eez tau i tiini poia, tauta agham ghei nilam ne? ¹⁰ Poia. Yau naghe yamŋa Israela asov awatagh kat tauvene: Yesu Kriisi to Nasaret tau yam aravu izala ai pambarooŋ gha imaat, ve Maaron ipaburigini pa mateegh na, ila i eeza ve tapiri, tauta ŋeer tau aazne iyozyooz ila naghomim ne tiini poia. *

¹¹ Yesu tane ta muuŋ tibood saveeŋ iza a tooni tigde:

‘Maet tau yam zeran to raooŋ ruum matamim veleghini ve asiki ilale na, tauta imin puughu pa ruum ve ipaloti. Leso ruum iyooz ariaaŋ izala paavo.’ ‡ *

¹² Yesu mon ta Maaron ighuru imin Uleeŋa toit. Tamtamon ite paam to taan le eeza pa uraat tau-

† **4:6:** Anas imin daaba to watoonrau, ve murei ra, raawa Kaiapas igham niia. Tauvene saawe tau tirav Yesu imaat ilam saawe tau tipayooz Petrus yesuru Yoan pa savsaveeŋ, Kaipas i daaba to watoonrau. Eemon Anas eeza ‘daaba to watoonrau’ ighengheen soone. * **4:10:** Mbanj 3:13+ ‡ **4:11:** Ruum tau ziiri tane isavia, ene tamtamon to Maaron lupuuŋ toozi. Ve maet tau imin puughu pa ruum, ene Yesu tauu. * **4:11:** Mbo 118:22; Mt 21:42

vene mako. Ila i eeza mon, tauta Maaron igham mulin ghiit pa patanjani to sosor toit ve taleep poi.”
*

¹³ Yes daaba tawe tiwatagh: Petrus gha Yoan, yesuru tamtamon to nughei mon. Tila skul tiina eta mako. Eemon tighita yesuru tiroi mako, ve tiyooz ariaan kat pa savsaveen. Tauvene tigham ngar naol pazi, ve tighilaal yesuru tighe muun, yesna Yesu tilaghlaagh. ¹⁴ Ve tighita narape tau yesuru tighamu aaghe poia na, yesna tiyozyooz. Tauvene tiliil pa savsaveen. ¹⁵ Tauta tiziir Petrus yesuru Yoan pa lupuun toozi gha tivot tila muuri, ve yes mon tivasavo zi. ¹⁶ Tighe: “Laak, pale tagham mindai pa yesuru? Pa gabua ngereeta tiina tau tighamu, ene itotoi Maaron tapiri ivot mataghare kat, ve eval tiina tau tileep Yerusalem ne, tisov tiwataghi wa. Tauvene isaav ighe tatoova to tatatan saveen to yesuru taghe karom, ene irau tamtamon tiloon ghiit mako.”*

¹⁷ Eemon iit aat tarav matin saveen tane. Mako pale vaaru ilaan ila gha tamtamon tisov tiwataghi. Tauvene tanğalsekin zi ariaan. Leso tivotia saveen pa tamtamon ila neer tawe eeza muul sov.”

¹⁸ Tivasavo zi le isov, ra tipoi mbanjoonja ru tana tilon tilam muul, ve tisaav ariaan pazi tighe ti-savia saveen eta pa tamtamon ila Yesu eeza, ma tipaduduun zi pani muul sov.*

¹⁹ Eemon yesuru tiyol alinjazi tighe: “Yam tau-mim agabiiz: Ngar sindei tau iduduun ila Maaron

* **4:12:** Mt 1:21; Mbanj 10:43; Ro 10:13

* **4:16:** Yo 11:47

* **4:18:** Mbanj 5:28, 40

maata? Pale nilooŋ yam aliŋamim ve nitaghoni, ma nitaghon Maaron aliŋa? *

²⁰ Pa gabua tiina tau yeiru nighita ve nilooŋa na, ene irau nineneen pani mako. Aat nisavsavia mon tauvene.”

²¹⁻²² Yesuru tisaav tauvene, ve yes daaba tana tigham saveen paroiŋ pazi muul. Ra tipul zi tila. Yes tigha tŋgal yesuru matazi. Eemon tirao mako. Pasaa, narape tau gabua ngereeta tawe ivot pani na, ndaman tooni iliiv tamoot ru (40) wa. Tauvene gabua tau ivot na, igham eval tiina tisov tipapait Maaron eeza pa tapiri ve poia tooni.

Yes tau tighur ila to Yesu na tighason Maaron to ipalot zi, leso tyooz ariaaŋ

²³ Yes daaba tana tipul Petrus yesuru Yoan tila, ve malmalizi tila to zetazŋa, ve tipaesia saveen tau yes daaba to watoonrau ve yes nginiŋa tisavia pazi na. ²⁴ Zetazŋa tilooŋ paesiŋ toozi, ve tisov tilup lolozi imin eemon, ve titaŋ rarai Maaron tigha: “Tiina tsiei, yo ughur sambam, taan, ve te, tomania gabua naol isov tau tileep ve tighen ila na, ve uŋgin zi. ²⁵ Muuŋ, Avuvum Patabuyaana ipaburigin timbumai David tau besooŋa tsio na, gha isaav tauvene:

‘Puughu mindai ta nugh nugh atezi yavyav ve tigha tipaburigin malmal?

Tamtamon matazi iŋgal ngar naol tau le anooŋa mako na pasaa?

²⁶ Yes kinik to taan tigham aghezi pa malmal. Yes pooza tilup zi, ve tiil eez to tizoor Maaron tomania Mesia tooni ve tigha titatan zi.’ *

* **4:19:** Mbanj 5:29 * **4:26:** Mbo 2:1+

27 “Saveenj tane, tauta aazne, anoonja ivot wa. Pasaa, yo taum ughur Yesu, tau besoonja tsio patabuyaanj, imin Mesia. Eemon Erod yesuru Piladus tomania yes tau Yuda mako na, ve eval tiina to Israel, tilup zi izi nugh tiina tane, ve tiil eez to tizoor saveenj tooni ve tighe titatani. Tauta tiravu imaat. *

28 Eemon ngar tau tigham pani, ene itaghon taum ngar tsio. Muunj ughe: ila taum tapirim, yo pale ugham gabua tane ivot. *

29 O Maaron, saveenj paroinj tau tighamgham payei ne, yo uwataghi wa. Tauvene yei tau nimin besoonja tsio ne, nitanj rarai ghom nighe upalot ghei. Leso niroi sov, ve niyooz ariaanj pa votiaanj saveenj tsio. *

30 Utotoi tapirim ivot ighazoonj, ugharaat yes moroghoonja le tinizi poia, ve ugham gabua ngeretazi tintiina tivot ila besoonja tsio patabuyaanj Yesu eeza, lesa imin ilaal pa tamtamon ve tighur ila tooni.”

31 Tisunj le isov, ra Maaron tapiri itok nugh tau tilup zi pani na, le irur imin yogyoog itok. Ve Avuvu Patabuyaanj izeev zi tisov. Tauta tiroi mako, ve tiyooz ariaanj pa votiaanj Maaron aliinja pa tamtamon. *

Yes tau tighur ila to Yesu na tivaule zi

32 Yes tau tighur ila to Yesu na, tisov lolozu ve ngar toozi eemon, ve tivaule zi. Toozi eta injuruut gabua tooni ve isaav ighe ene gabua to tauu mon

* **4:27:** Lu 23:7+ * **4:28:** Mbanj 2:23 * **4:29:** Mbanj 13:46;
Ep 6:19+; Pil 1:14 * **4:31:** Mbanj 2:2+

ne mako. Tighita gabua toozi naol isov tighe ene gabua to eval tisov. *

³³ Ve yes mbanjoona tipapariaan saveen pa burigiin to Tiina toit Yesu, lesu tamtamon tighur ila tooni. Ve uraat toozi ilanlaan toman tapiri. Tauta Maaron poia tooni tiina ighengheen tomani zi tisov. ³⁴ Tamtamon toozi eta imbool pa gabua eta mako. Pasaa, yes tau lezi taan ma ruum na, tigholgholia gabua toozi, ve tighamgham maeta, ³⁵ ve tighurghuru ila to yes mbanjoona. Mako anazi tireii pa yes tau mbolaan igham zi na. *

³⁶⁻³⁷ Tauta neer ee to sisi Saiprus, eeza Yosep, i paam igholia taan tooni, ve igham maeta, ve ighuru ila to yes mbanjoona. Yosep puughu tooni ivot ila to Levi. Ve yes mbanjoona titoor eeza, ve tiwaato tighe Banabas. (Eez Banabas, puughu tauvene: 'Neer to palotiin tamtamon.')

5

Ananias gha azaawa Sapira tigham karom

¹ Neer toozi ee, eeza Ananias. Ve azaawa eeza Sapira. Yesuru paam tigholia taan toozi sirivu ee.

² Eemon Ananias igham karom. Pasaa, itatan taan tawe maeta siriv ighen, ve igham sirivu mon gha ighuru ila to yes mbanjoona. Eemon isaav pazi ighe taan tooni maeta, tauta isov ila toozi. Karom tau i ighamu na, azaawa Sapira iwataghi paam. *

³ Tauvene Petrus isaav pani ighe: "Wai, Ananias, puughu mindai ta upul Neer Saghati izeev

* **4:32:** Lu 12:33; Mbanj 2:44+ * **4:35:** 2Kor 8:13+ * **4:36-37:** Mbanj 9:27, 11:22, 30, 13:2 * **5:2:** Yos 7:1-26

ghom ve utatan maet siriv? Ngar tau ughamu na, ene ugham karom pa Avuvu Patabuyaanj. *

⁴Saawe tau ugholia taan tsio soone, ena yo gabua tsio. Ve saawe tau ugholia, saa ngar tau matam ingali ughe upul maet tana pani, ene igheen to yo taum. Mindai ta lolom ipazaagh ghom pa ngar saghati tane? Aazne, ugham karom pa yei tamtamon mako. Yo ugham karom pa Maaron!” *

⁵Ananias iloon saveenj tane, ve itap izi le imaat kusia. Tauvene tamtamon tISOV tau tiloon gabua tana vaaru na, roinj tiina igham zi. ⁶Ra geegeu paghpaaghu siriv tilam gha tizun Ananias paata pa uuli, ve tibaado tila titavia.

⁷Tileep malau rig (irau aua tol ma vene), ra Ananias azaawa Sapira aana ilonj ilam. Eemon gabua tau ivot pa Ananias na, i iwataghi mako. ⁸I ilonj ila, ve Petrus ighasoni ighe: “Aiyo, usaav ghazoonja payau. Taan tau yamru azuwam agholia na, atuya tauta ene?”

I iyol aliinja ighe: “Vee, atuya tauta ena mon.”

⁹Tauvene Petrus isaav pani muul ighe: “Mindai ta yamru azuwam alup lolomim ve aghe atoov Maaron Avuvu? Uloon. Yes tau tila titavia azuwam na, tauta ngarig gha timuul tilam tiyozyoos ataman aavo we. Ve yo paam, pale tibaad ghom uvot ula.”

¹⁰Rekia mon ve livaa aana, itap izi Petrus aaghe puughu gha imaat kusia. Geegeu paghpaaghu tau titavia Ananias na, tilonj tilam, ve tighita Sapira paam imaat gha ighengheen. Tauvene tisuru iza,

* **5:3:** Lo 23:21+; Lu 22:3 * **5:4:** Mt 23:27+

gha tibaado tila titavia izi azaawa ziige. ¹¹ Gabua tana ivot le roin tiina igham tamtamon tisov tau tileep ila lupuun to Krisi na. Ve yes mon mako. Tamtamon tisov tau tiloon yesuru varuzi na tiroi paam.

Yes mbanjoona tigham gabua ngeretazi tintiina siriv tivot

¹² Saawe tana, Maaron igham gabua ngeretazi katini tivotvot ila yes mbanjoona nimazi. Leso imin ilaal pa tamtamon, ve tighur ila. Ve yes tau tighur ila to Yesu na, lolozu eemon, ve monmon tiluplup zi ila ruum to lepoogh tau Solomon irao ila Rumei Tiina ziige na. *

¹³ Tamtamon tipaak zi sorok mako. Pa tiroi. Eemon eval tiina titandagh pazi, ve tipapait varuzi. ¹⁴ Saawe tana, tamtamon paghpaaghu katini tighur ila. Tauta timin Tiina toit Yesu le, ve tighaltarezai yes tau munjanazi na, le timin eval le eval kat. Yes zitamoot ve zilivaa paam. ¹⁵ Gabua ngeretazi tau yes mbanjoona tighamgham zi na, vaaru ilaan irau nugh nugh. Tauvene monmon tamtamon tibadbaad moroghoona toozi tilala, ve tighurghur zi ila eez ziige, ve tisanan. Siriv tigheen izala boor, ve siriv tigheen izala moogh. Pasaa, tinumeer tighe saawe tau Petrus ilaagh injarui zi ilam, ve ighe yavyaava rigta izala pavozi, ene aat igham zi tinizi poia. *

¹⁶ Nugh siriv tau tigheen tigharau Yerusalem na, paam. Tighamgham moroghoona toozi tomania tamtamon toozi siriv tau avuvu sasaghati

* **5:12:** Mbanj 2:43; 2Kor 12:12 * **5:15:** Mt 9:21, 14:36; Mbanj 19:12

tivaghamun zi na, tilala Yerusalem, ve tinjarui yes mbanjoona. Ve yes mbanjoona tiuul zi gha tisov tinizi poia. *

Tighur yes mbanjoona tilon tila ruum to yavyavuun

¹⁷ Daaba to watoonrau, tomania zeetna Sadusi tau tipakpaako na, tighita uraat to yes mbanjoona ilaan toman tapiri, le ireu lolozi ve atezi yavyav kat. ¹⁸ Tauvene tila tikis zi, ve tizeev zi tilon tila ruum to yavyavuun. *

¹⁹ Eemon mbon tana, anela ee to Maaron ivot toozi, ve ikaak ataman to ruum to yavyavuun, ve igham zi tivot tila pa muuri. *

²⁰ Ra isaav pazi ighe: “Yam ala ayooz ila Rumei Tiina naagho, ve avotia lepoogh paaghu tane ngara isov pa tamtamon, leso tighazon pani.”

²¹ Tauvene nughizau, ra titaghon anela aliina, ve tilon tila sirsiir to Rumei Tiina loolo, ve tipaburigin uraat toozi to tipaghazonai tamtamon pa Maaron aliina.

Saawe eemon tana, daaba to watoonrau tomania zeetna siriv tipoi yes pooza to Israel tilam tilup zi, ve timbaan uraata toozi siriv tila ruum to yavyavuun, leso tigham yes mbanjoona tilam.

²² Eemon tilon tila ruum to yavyavuun, ve tiil zi le mako. Tauvene timuul tila to yes pooza, ve tipaes pazi tigde: ²³ “Aloon. Saawe tau nila peria ruum to yavyavuun, nighita ataman tisov tipoon zi le tunja kat. Ve yes tau tinjinjin ataman na, tiyozyooz. Eemon nikaak ataman ve nilon nila, le nirur pa

* 5:16: Mt 8:16

* 5:18: Mban 4:3

* 5:19: Mbo 34:7, 146:7;

Mban 12:7, 16:26

ruum loolo nginaana. Tamtamon eta ileep mako.”
²⁴ Daaba to yes uraata tau tinginngin Rumei Tiina na tomania daaba to watoonrau tiloon paesiin tane le ngar toozi ivaghamgham ve tigde: “Wai, ighe tauvene, saa paam pale ivot?”

²⁵ Malau mako ve neer ite aana ilam, ve ipaes pazi ighe: “Ou, yam alepleep? Zeran tau azeev zi tilon tila ruum to yavyavuun na, tियोzyooz ila Rumei Tiina naagho, ve tipapaduduun tamtamon we!” ²⁶ Daaba to yes uraata tau tinginngin Rumei Tiina na iloon saveen tane, ve iburig gha iyau tamtamon tooni, ve tila tigde tikis zi muul. Eemon saawe tau tivot toozi, tigham saghatin zi mako. Tikis zi poi. Pasaa, tiroi pa eval tiina tawe pale tiburig ve tirav zi pa maet.

²⁷ Tauvene tikis yes mbanjoona, ve tigham zi timuul tila, ve tipayooz zi ila lupuun tiina tana naghozi. Ra daaba to watoonrau iyaon zi ighe: ²⁸ “Awaat neer tawe eeza irao! Yam talinamim mako? Yei ningalsekin gham ariiaan wa: Apaduduun tamtamon pa Maaron aliina ila neer tawe eeza sov. Eemon yam asasavia vaaru le tamtamon tisov to Yerusalem tiwataghi wa. Mindai, yam aghe asuk payei pa mateegh tooni?”
 *

²⁹ Petrus yesna mbanjoona siriv tiyol aliina tigde: “Yei irau nitaghon sorokin saveen to tamtamon eta to taan mako. Saveen tau iduduun pa Maaron ngar tooni, o nitaghoi.”
 *

* **5:28:** Mt 23:35, 27:25; Mbanj 4:18 * **5:29:** Mbanj 4:19; Ga 1:10; 1Tes 2:4

³⁰ Aloonj. Yesu tau yam aravu izala ai pambaroonj gha imaat na, Maaron to timbuunja ipaburiginini pa mateegh wa. *

³¹ Ve ighamu izala pa sambam, ve ighuru ileep ila i tauu niima tapir. Tauta ipaghazonjaini ighe i eeza tiina. Taama Maaron ighuru imin Daaba pait, ve i Uleenja toit. I irau igham iit Israela tator ngar toit ila pa Maaron, ve ireu sosor toit isov ilale. *

³² Gabua isov tau ivot pani na, yei nighita pa matamai. Tauta nipariaan saveenja, leso tamtamon tighur ila tooni. Ve yei mon mako. Avuvu Patabuyaanj tau Maaron igham pa tamtamon tisov tau titaghon ngar tooni na, i paam ipariaanj Yesu saveen tooni.” *

Gamaliel ingalsekin lupuunj tiina ighe tigham saghatin yes mbanjoonja sov

³³ Yes tau tileep ila lupuunj tawe, tiloonj saveen tane, le ipas atezi ve tigde tirav zi timaat pataghaanj. ³⁴ Eemon neer tutuunja ee ileep ila lupuunj tana loolo, eeza Gamaliel. I padudunjaanj ee to tutuunj, ve tamtamon tisov titandagh pani. I iburig iyooz, ve isaav pazi ighe: “Ai, agham zeran tane tivot tila muuri o.” ³⁵ Tauvene tigham yes mbanjoonja tivot tila muuri le isov, ra Gamaliel isaav pa yes tau tileep ila lupuunj na ighe: “Yam tamtamon to Israel, aloonj. Agham gabua eta pa zeran tawe rekia sov. Aleep ve agham ngar poi. ³⁶ Matamim ingal ngar tau muunj ivot pa Teudas na. I iburig, ve ipakur tauu ighe i neer ariaanja ee. Ve iyau le tamtamon ndinjndinj paanj

* **5:30:** Ga 3:13 * **5:31:** Mk 16:19; Mbanj 2:38, 3:19 * **5:32:** Lu 24:47+; Yo 15:26+

(400) gha titaghoni. Eemon saawe tau tiravu imaat, ziñeera tISOV tighawaar, ve anoonja eta ivot mako. ³⁷ Murei pa tane, saawe tau gavman to Rom tigham tamtamon ezazi, Yudas to Galilaia aana iburig, ve ipazaagh tamtamon gha titaghoni tige tiziir gavman to Rom. Eemon i paam, tiravu imaat, ve ziñeera tISOV tighawaar. ³⁸ Tauvene aazne, yau naghe nauul njar tsiam. Zeran tawe, agham gabua eta pazi sov. Apul zi tileep. Pa takankaan pa njar ve uraat toozi puughu. Isaav ighe ivot ila tauzi njar toozi, ene aat ighur anoonja eta mako. *

³⁹ Eemon isaav ighe Maaron imin puughu pani, ve yam atoova to atatan zi, ene aat arao mako. Tauvene ayamaan gham. Pa aat aparav tomania Maaron.” *

⁴⁰ Gamaliel saveen tooni igham zi atezi izi rig. Tauvene tipoi yes mbanjoonja tilonj tilam muul, ve tilosiir zi, ve tingalsekin zi ariaan tige tivotia saveen pa tamtamon ila Yesu eeza muul sov. Ra tipul zi tila. ⁴¹ Yes mbanjoonja tipul lupuun tiina tana, ve tila toman loloji poia kat ve tintinisi. Pasaa, Maaron ighit zi ighe yes popoiazi irau to tibaad patanani ve mayaņa pa Krisi eeza. *

⁴² Mataaz ta naol ne, yes mbanjoonja tipagha-zonjai tamtamon pa Maaron aliinja ila Rumei Tiina naagho, ve ila ruum aavo aavo paam. Ve tivovotia Yesu vaaru pa tamtamon tige i Mesia. Uraat toozi tawe, tipuli mako.

* **5:38:** Mt 15:13 * **5:39:** Lu 21:15 * **5:41:** Mt 5:10+; Mbanj 14:22; Pil 1:29; 1Pe 4:13

6

Tighur tamtamon liim ve ru to tiuul yes mbanjoona

¹ Saawe tana, yes tau titaghon Yesu na tivot timin eval. Eemon patañani ee ivot ila sosozi. Yes Yuda tau tisavsaav Grika aliñazi na, tiyau avozi pa zetazña tau tisavsaav ila saveeñ Hibru na tigde: Mataaz ta naol ne, saawe tau tirei uleeñ siriv pa yes mbolaaña, matazi iñgal yes Grika zinaara toozi kat mako. ² Tauvene yes mbanjoona sañavul ve ru tipoi tamtamon tisov tau titaghon Yesu na tilam tilup zi, ve tisaav pazi tigde: “Yam tonvetaz, aghita. Isaav ighe yei mbanjoona nigham uraat pa reiñ aniñ ve nipul uraat to votiaan Maaron aliña, ene iduduñ mako. ³ Tauvene yam atiir taumim, ve aghur lemim tamtamon liim ve ru tau varuzi tomania ñgar toozi popoia, ve ñgar to Avuvu Patabuyaañ ivon ila lolozi. Leso nipul uraat to reiñ aniñ ila nimazi. *

⁴ Ve yei aat nileep duduñ ila sunuñ mon, ve uraat to paduduñaañ tamtamon pa Maaron aliña.”

⁵ Eval tiina tiloon saveeñ toozi tane, ve tisov tiyok pani. Tauvene tighur Stepanus (i ghu-ruñ ila tooni iyaryañ kat, ve ñgar to Avuvu Patabuyaañ ivon ila lolo), ve Pilip gha Prokorus, Nikanor, Timon, Parmenas, ve Nikolas to nugh Antiok. Nikolas tane, i Yuda tauu mako. Eemon itoor ñgar tooni ila pa Maaron, ve itaghon yes Yuda pa sunuñ toozi. ⁶ Tigham zeran liim ve ru tawe tilam tiyooz ila yes mbanjoona naghozi, ra

* **6:3:** 1Tim 3:2+; Tit 1:6+

mbanjoonja tighur nimazi izala pavozi, ve tighason Maaron to ipalot zi, ve tighur zi pa uraat. * *

⁷ Saawe tana, Maaron saveen tooni ilaan toman tapiri irau nugh nugh. Tauvene Yesu ziñeera tivot timin evalle eval kat izi Yerusalem. Ve yes zeran to watoonrau tauvene paam. Tamtamon toozi katini titoor ngar toozi, ve tighur ila to Krisi ve titaghon eez tooni. *

Tikis Stepanus

⁸ Stepanus, i ñeer ee tau Maaron tapiri ve poia tooni ipavoni kat. Tauvene i ighamgham gabua ngeretazi tintiina tivotvot ila tamtamon sosozi. Gabua tawe timin ilaal pani tighe Maaron ileep tomania pa uraat tooni. *

⁹ Yuda siriv, muuñ timin besoonja sorok. Eemon tipas zi pa uraat toozi, ve ngarig timin besoonja pa tamtamon muul mako. Tingin tauzi. Yes tipaburigin lupuuñ ee, ve tiwaat eeza tighe 'Lupuun to yes tau timin besoonja muul mako.' Lupuuñ tawe tamtamona siriv tiburig, ve yesña Stepanus tivazorai zi pa savsaveen. Zeran tawe, siriv to nugh Sairini, siriv to Aleksandria, siriv to taan sirivu to Silisia, ve siriv to taan sirivu to Asia. ¹⁰ Eemon yes tirau Stepanus mako. Pasaa, i le ngar tiina, ve Avuvu Patabuyaañ ipapalot saveen tooni. *

* **6:6:** Yes tau tisavsav Grika alinazi, ta tiyau avozi pa uraat to reinj aniin ma gabua. Zeran liim ve ru tau tighur zi pa uraat na, ezazi itotoi zi ighe yes tilepleep tomania yes Grika ve tiwatagh Grika gabuazi. Tauta yes mbanjoonja tighur zi to tingin uraat tawe.

* **6:6:** Mbanj 13:3; 1Tim 4:14 * **6:7:** Mbanj 12:24, 19:20 * **6:8:** Mbanj 2:43 * **6:10:** Lu 21:15

¹¹ Tauvene tiil eez pani, ve tipazaagh tamtamon siriv gha tingal saveen pani tighe: “Yei niloonj njeer tane isik saveen veleghiin pa Mose ve Maaron.” *

¹² Tisaav tauvene, le tipazaagh eval tiina to yes Yuda, tomania nginiija toozi ve yes ngara to tutuun. Tauvene tiburig tila tikis Stepanus, ve tigherevu ilonj ila lupuun to yes daaba to yes Yuda, ve tipayooze ila naghozi. ¹³ Ra tiyau zeran karomnja siriv tilam, gha tipayooz zi ila lupuun tawe naghozi paam, ve yes karomnja tawe tingal saveen pa Stepanus tighe: “Njeer tane, saawe isov, isasavia saveen veleghiin injarui rumei patabuyaanj to Maaron ve tutuun to Mose. ¹⁴ Yei niloonja ighe Yesu to Nasaret pale ireu Rumei Tiina tane izi. Ve tutuun tau Mose igham pait ve tataghoni ta muun ve ilam ne paam, i pale itoora.” *

¹⁵ Yes tau tileep ila lupuun tana tiloonj saveen tane, le tisov tidaad matazi pa Stepanus, ve tighita naagho isul imin anjela.

7

Stepanus isavia yes Yuda gabuazi: Yes tizorzoor Maaron aliija ta muun ve ilam

¹ Ra daaba to watoonjrau ighason Stepanus ighe: “Laak, saveen tau tisavia ne, ene onoon?”

Muun, Maaron ivot to Abaram izi taan sirivu to Mesopotamia

* **6:11:** Mt 26:59+ * **6:14:** Mt 5:17; Mk 14:57+; Yo 2:20+

2 Stepanus iyol aliinja ighe: *

“Yam tamanja ve tonvetaz tsiau, aloon saveen tsiau tane ve agham ngar pani poi. Muun kat, saawe tau timbuun Abaram ila ileep izi nugh Aran soone, ve ilepleep izi taan sirivu to Mesopotamia na, Maaron toit tau eeza tiina pa tapiri ve poia tooni na ivot tooni, *

3 ve isaav pani ighe:

‘Uburig, upul taan tsio tomania ziiri waaro tsio, ve ula pa taan tau yau naghe natotoia payo na.’ *

4 “Tauvene Abaram ipul Mesopotamia tau taan to yes Kaldia na, ve ila ivot nugh Aran, ve ighur niia to lepoogh ta sewe. Taama Tera imaat, ve murei ra, Maaron ipaburigin Abaram muul gha ilaagh ilam ivot taan tau aazne iit talepleep pani ne. *

5 Maaron igham taan rigta imin Abaram le motot ne mako. Eemon saawe tau Abaram le naatu eta soone, Maaron imbu saveen tomania ighe i pale igham taan tane pani ve paaghu tooni tau pale tivot murei na paam. Leso imin lezi motot. *

6 Ve Maaron ipaghazonai Abaram pa gabua siriv tau pale ivot murei na ighe:

* **7:2:** Saveen to Stepanus maata ru. Ee, ene yes Yuda tigham ngar tiina kat pa taan toozi ve rumei toozi tau iyooz izi Yerusalem. Yes tigde nugh tawe, ene Maaron niia duduun. Eemon Stepanus isaav tauvene: Maaron ileep nugh tawe mon mako. Nugh sindei tau tamtamon tooni tileep pani na, i ileep tomani zi. Ve saveen tooni maata ite, ene vene: Muun ve ilam, yes Yuda tizoroor Maaron aliinja. * **7:2:** Gnp 11:31 * **7:3:** Gnp 12:1 * **7:4:** Gnp 12:4+ * **7:5:** Gnp 12:7, 17:8; Hib 11:13

‘Paaghu tsio pale tila tileep timin loom izi taan ite. Ve taan tawe tamtamona pale tigham zi timin besoonja sorok, ve tigham saghatin zi irau ndaman ndinndin paan (400).’ *

⁷ Eemon murei, yau aat naghur atuya injarui taan tawe tamtamona pa ngar toozi saghati, ve naghham paaghu tsio tipul taan tawe, ve timuul tilam. Leso tisun ve tibeas payau izi ta sene.’ *

⁸ “Ra Maaron isaav pa Abaram ighe ngar to ravuunjitamoot warozi pale imin ilaal pa saveen mbuaan to yesuru. Tauvene saawe tau Abaram azaawa ipoop Isak, ve mboonji imin liim ve tol, ra taama irav waaro. Murei ra, Isak yesuru azaawa tipoop Yakop, ve Yakop tomania azaunja tipoop natuznja sanjavul ve ru tau iit Israela tavot ila toozi na.’ *

Maaron ileep tomania Yosep izi Isip

⁹ “Yakop natnja tighita tamazi loolo pa tazizi Yosep kat, le ireu lolozii. Tauta tigholia ila to tamtamon siriv, ve anazi tighamu ila Isip, ve imin besoonja sorok izi ta sewe. Eemon Maaron ileep tomania,’ *

¹⁰ ve igham mulini pa patanani tooni naol isov. Saawe tau tigham Yosep ila iyooz ila kinik to Isip naagho, Maaron igham kinik loolo pani, ve ighi-laalo ighe i le ngar tiina. Tauta ighuru to igham pooz pa ruum tooni tomania gabua tooni naol isov, ve taan dodoli to Isip paam.’ *

* **7:6:** Gnp 15:13+; Igham 12:40 * **7:7:** Igham 3:12 * **7:8:** Gnp 17:10, 35:18 * **7:9:** Gnp 39:2, 21+ * **7:10:** Gnp 41:37+

11 “Malau mako ve pitoool tiina ivot irau taan isov to Isip ve Kanaan, ve igham zi tileep saghat kat. Iit Israela timbuunja paam, tiil lezi aniiñ le mako. *

12 Eemon saawe tau Yakop iloon tigha aniiñ wit ighengheen izi Isip, i imbaañ natja tila tighol lezi aniiñ, ve timuul tilam pa tamazi. Ene laghoon tau tighamu imin maata. 13 Tilepleep le aniiñ toozi isov, ra tizila Isip muul imin pai ru. Saawe tana, Yosep ivotia tauu pa tooghja ve taazi. Ve kinik to Isip paam iloon tigha, Yosep ziiri waaro tooni siriv ta tilam tilepleep. *

14 Ra Yosep imbaañ ila pa taama Yakop ighe yesja tamtamon tooni tisov tiyauyau, ve tizilam tooni. Tamtamon tau tiburig gha tizila Isip na, yes irau tamoot tol sanjavul ve liim (75). *

15 Tauvene Yakop tomania tamtamon tooni tizila Isip, ve yesja natja tisov timataar izi ta sewe. *

16 Eemon titavi zi izi Isip mako. Tigham patazi, ve timuul tila pa nugh Sekem, ra tighur zi tilon tila maet puura to Amor natja tau Abaram igholi pa maet silva siriv na. *

Maaron ileep tomania Mose izi Isip ve Midian

17 “Saveen tau Maaron imbua tomania Abaram na, saawe ilam igharau pa anoonja ivot. Ve saawe tana, timbuunja tau tileep izi Isip na, timasa timin eval le eval kat. *

18 Ra kinik paaghu aana igham pooz pa Isip. Kinik tawe iloon Yosep vaaru pa uraat tooni rigta mako.

* **7:11:** Gnp 41:54, 42:1+ * **7:13:** Gnp 42:1, 45:1+ * **7:14:** Gnp 45:9, 46:26+ * **7:15:** Gnp 46:1, 49:33 * **7:16:** Gnp 23:3, 33:18, 50:7+ * **7:17:** Igham 1:7

19 I ivatombanoi timbuunja, ve igham saghatin zi kat. Ve isaav ariaan pazi ighe natuzja paghpaaghu tau ngarig gha tipoop zi na, yes aat tipul zi tileplez. Leso timatmaat. *

20 “Saawe tana, Mose tiina ipoopa. Maaron ighita i paghuuna kat ve loolo pani. Tiina gha taama tigham payamyam pani izi ruum toozi irau kaiyo tol, *

21 le neer marani imin olman rig ve irau tingooza muul mako. Ra tighamu tila ve tipuli izi yaa Nil ziige. Eemon kinik natliva ilaagh ila le ighita. Tauta ighamu imin le, ve ingini imin i tauu naatu.

22 Mose itum le imin olman, ve tipaghazonaini pa ngar naol isov to yes Isipa. I neer ariaanja ee. Ve saveen tooni paam, toman tapiri.

23 “I ilepleep le ndaman tooni irau tamoot ru (40), ra loolo ipaburigini ighe ila igig yes Israela tau sinj tooni na. *

24 Eemon saawe tau ila ivot toozi, i ighita Isip ee igham saghatin neer ee to Israel. Tauvene ilaan ila ivool to neer tawe, ve irav Isip tamazi tawe gha imaat imin yatuun sotor tooni. ²⁵ Mose maata ingal ighe tamtamon tooni Israel aat tighilaal tighe Maaron ighuru to igham mulin zi pa patanani toozi. Eemon ngar toozi ivot pa gabua tana soone.

26 “Mbonj le nughizau, ra Mose imuul ila le ighita Israela ru anazi tiparav. Tauvene itoova to irav motin malmal ve ilup zi. Ve isaav pazi ighe: ‘Wai, yamru tonjetaz! Avaghamun gham pasaa?’

* 7:19: Igham 1:9+ * 7:20: Igham 2:2 * 7:23: Igham 2:11+; Hib 11:24+

27 “Eemon ñeer tau ipaburigin malmal na, iburig gha isipiir Mose ighau, ve isaav pani ighe: ‘Ai, yo sei ighur ghom ighe umin ñginiin payei, ta ughe ugharaat saveenj tsiei?’ 28 Mindai, yo ughe urav ghau namaat imin Isip tamazi tau noor uravu imaat na?’ 29 Mose iloonj saveenj tane, ve iburig gha ighau ila ivot taan sirivu to yes Midiana. I ileep imin loom ta sewe le ivai, ve yesuru azaawa tipoop natuzña zitamoot ru.

30 “Ndaman tamoot ru (40) paam ilam ila, ra anela ee ila ivot tooni izi nugh ñginaanja tau igheen igharau loloz Sinai na. Ivot pani imin yav tau ighanghan izala ai marani ee.

31 Mose maata ila ighita gabua tana, le irur ve igham ñgar naol. Tauvene ila igharau ai tawe ighe ighit poghania. Eemon iloonj Ñeer Tiina aliinja ivot ila yav tawe ighe:

32 ‘Yau Maaron to timbumnja. Yau Maaron to Abaram, Isak, ve Yakop.’ *

Mose iloonj saveenj tane, le irur ve ingooz naagho. Pasaa, iroi pa ghitoonj Maaron.

33 “Maaron isaav pani muul ighe:

‘Upas zuzuunja to aghem izi. Pa taan tau uyozyooz ila ne, ene patabuyaanj. 34 Uloonj. Tamtamon tsiau Israel tau tileep Isip we, yau naghita patanani toozi wa. Yes Isipa tighamgham saghatin zi, le matazi sinj izaa ve titanj tiina. Eemon tanjiz toozi, yau naloonja wa. Tauta nazilam to napas zi tivot pa patanani toozi tawe. Aazne, yau naghe

* 7:32: Igham 3:6

nambaan ghom umuul ula pa Isip. Tauvene uburig ve ula.’ *

Saawe tau yes Israela tileep izi nugh nginaanja, tizoor Maaron aliinja

³⁵ “Aghita. Mose tau muun tizori ve tigde: ‘Ai, sei ighur ghom umin nginiin to ugabiiz ghei ve ugharaat saveen tsiei?’ Neer eemon tana, ta Maaron imbaan anela ila ivot tooni imin yav tau ighan izala ai marani na. Ve ighuru to injin yes Israela, ve ipas zi tivot pa patanani toozi. ³⁶ Ve i ta igherev zi gha tipul taan to yes Isipa, ve igham gabua ngeretazi tintiina imin ilaal pazi izi Isip, Te Sinjinjai, ve izi nugh nginaanja paam irau ndaman tamoot ru (40). *

³⁷ Mose tane, tauta isaav pa yes Israela ighe: ‘Maaron pale ipaburigin tamtamon tsiam eta, ve ighuru imin propet, lesu ivotia Maaron aliinja payam imin yau.’ *

³⁸ “Mose tomania eval tiina to Israel, ta timin lupuun to Maaron izi nugh nginaanja. I ta isavsaav tomania anela izi loloz Sinai, ve igham saveen maata yaryaare ila to Maaron, ve ipaesia pa timbuunja. Saveen tawe, tauta iit Israela takiskisi gha ilam aazne. *

³⁹ “Eemon timbuunja tighur murizi pani ve loloz pa lonjaan saveen tooni mako. Ve tipasawal muul ila pa lepoogh toozi tau muun tileep izi Isip na. ⁴⁰ Tauvene tiburig ve tisaav pa Aron tigde:

* **7:34:** Igham 3:5+ * **7:36:** Igham 7:11, 14:17; Mbo 105:27

* **7:37:** Lo 18:15; Mbanj 3:22 * **7:38:** Igham 19:1–20:17

‘Ugharaat leen maaron siriv! Leso timuun pait ve tingin ghiit. Pa ñeer tau igham gherev pait gha tapul taan to Isip ve talam na, yei nikankaan pani. Aat gabua eta ivot pani wa.’ *

⁴¹ “Tauta tigharaat maaron karom ee tau taghita imin makau naatu, ve tigham watoonrau pani. Tauvene gabua tau tauzi tigharaata pa nimazi, yes tipaiti toman tintinizi. *

⁴² Tauvene murei, Maaron ighur muuri pazi, ve ipul zi titaghon tauzi ñgar toozi. Tauta tibeas pa gabua tau tighen ila sambam saamba imin aaz, kaiyo, ve pitum siriv. Saveenja igheen ila rau to yes propet. Ighe:

‘O yam Israela, ndaman tamoot ru (40) tau alaghlaagh izi nugh ñginaanja, yam aghamgham watoonrau pa makau ve sipsip. Watoonrau naol tana, agham eta payau? Mako kat! *

⁴³ Ve saawe tana, yam abaad balbaal to Molek tomania pitum Repan anunu tau maaron karom tsiam na, ve alaghlaagh tomania. † Maaron karomnja tana, taumim agharaat zi to aput aghemim pazi ve apakur zi.

Tauvene yau aat nareu gham, ve naziir gham malmalimim ala aleep izi Babilon ziige ite.’ *

* **7:40:** Igham 32:1, 32:23 * **7:41:** Mbo 106:19 * **7:42:** Mbo 81:12; Yer 19:13 † **7:43:** Molek ve Repan, ene pitum tintiina ru tau muun tamtamon tighur zi timin maaron pazi. Molek, ene pitum Birawe. Ve Repan, ene pitum tau pughuun tiwaato tigue ‘Saturn’. * **7:43:** Amos 5:26-27

Muun, yes Israela lezi rumei tauu mako

44 “Saawe tau timbuunja tilaghlaagh izi nugh nginaanja, yes tilaghlaagh tomania balbaal patabuyaanj. Balbaal tawe, saveenj mbuaanj toozi tomania Maaron igheen ilonj ila. ‡

Saawe tau tirau balbaal tana, Maaron aavo iyaryaan pa Mose ighe i aat itaghon duduñai balbaal ngereeta tau ighita izala loloz Sinai na. *

45 Timbuunja tilaagh tomania balbaal tana ila ila le tighuru ivool to paaghu toozi. Ra anazi tilaagh tomania tila tila le tivot taan Kanaan. Saawe tana, Maaron ireu yes nugh nugh tau tileep izi Kanaan na tighawaar, ve Yosua igham yes Israela tilonj tilam tigham taan tane imin lezi. Balbaal patabuyaanj tana ighengheen le saawe to kinik David. *

46 David, Maaron loolo pani kat. Tauvene i ighason Maaron ighe iyok pani, o irau Maaron to Yakop le rumei duduunj. Leso imin niia to lepoogh. *

47 Eemon David irau rumei eta mako. Naatu Solomon ta irau rumei. *

48 “Ve Maaron Tiina Tau Iliiv Zimaronja Tisov na, i ileep ilonj ila rumei eta tau tamtamon tirao pa nimazi ne mako. Pasaa, propet ee ivotia Maaron aliinja ighe: *

‡ **7:44:** Muun, Maaron isaav pa Mose gha ighur maet babanjazi ru ilonj ila bokis to saveenj mbuaanj tau igheen balbaal patabuyaanj loolo. Leso yes Israela matazi kisin saveenj mbuaanj toozi tomania Maaron. Ngara tauvene: Isaav ighe titaghon duduñai tutuunj tawe, ene pale Maaron ileep tomani zi, ve yesnja tivalupu zi timin eemon.

* **7:44:** Igham 25:9, 40; Hib 8:5 * **7:45:** Yos 3:14, 18:1 * **7:46:** 2Sam 7:1+; Mbo 132:1+ * **7:47:** 1King 6:1+ * **7:48:** Mbanj 17:24

- 49 ‘Sambam, ene yau niag to ghamuun pooz.
 Ve taan, ene nugh tau naghur agheg izala.
 Tauvene ruum savaanja muul ta aghe arao
 payau?
 Ve saa nugh muul ta aghe aghuru payau to
 naleep pani? *
 50 Mako. Pasaa, taug nagharaat gabua isov
 tana pa nimag.’ ”

*Stepanus isaav ghazoonja pa yes Yuda pa sosor
 toozi*

51 Ra Stepanus isaav pa yes tau tipayooze
 pa savsaveen na ighe: “Yam zeraan to zoraan
 saveen. Ngar tsiam iyaryaan kat imin yes tau
 tiwatagh Maaron mako! Ngar saghati tau igheen
 ila lolomim na, Maaron irav motini soone. Ve
 talinamim ivool kat. Saawe isov, yam azorzoor
 Avuvu Patabuyaan ngar tooni, imin muun timbu-
 mimnja tighamghamu. *

52 Aghita. Muun, timumimnja tipul propet eta
 ileep? Mako. Saawe isov, tighamgham saghatin
 zi. Ve yes tau muun tivotia Maaron aliinja tigde i
 pale imbaan Mesia ilam na, timumimnja tirav zi
 tisov timataar. Ve saawe tau neer duduunja tawe
 tauu ilam, yam ataghon ngar raraate. Azi gha
 aghuru ila koinja nimazi, ve tiravu imaat. *

53 Onoon, tutuun to Maaron tau anjela timin eez
 pani gha izilam na, yam aghamu wa. Eemon
 ataghoni mako.” *

Tirav Stepanus imaat

* **7:49:** Is 66:1-2; Mt 5:34+ * **7:51:** Igham 32:9; Lo 10:16; Is
 63:10 * **7:52:** Mt 23:31+; Lu 13:34; 1Tes 2:15 * **7:53:** Mbanj
 7:38; Ga 3:19

⁵⁴ Tiloŋ Stepanus saveeŋ tooni tawe, le atezi yavyav kat, ve tijaan maripazi pani tighe le tiravu imaat. ⁵⁵ Eemon Stepanus, Avuvu Patabuyaan ipavon katini, ve maata izala pa sambam le ighita Maaron mbonari, ve ighita Yesu iyozyooz ila Taama Maaron niima tapir. *

⁵⁶ Tauvene isaav pazi ighe: “Alooŋ. Yau naghita sambam ikaak, ve Tamtamon Naatu iyozyooz ila Maaron niima tapir!” *

⁵⁷ Tiloŋ saveeŋ ziiri rig tane, le bobaan tomanina siriin tiina izaa, ve tipoon talinazi, ve tilaan tinari Stepanus tila, ⁵⁸ gha tighamu, ve tisasaara ivot ila nugh tiina ziige, ra tiburig gha tiravu pa maet. Yes tau tipariaan saveeŋ tigde Stepanus igham sosor na, tizuzuum nonoghiina toozi to ngoaan izi, ve tila tighur zi ila neer paaghu ee aaghe puughu, eeza Saul. *

⁵⁹ Tiravrav Stepanus pa maet, ve i isun ighe: “O Tiina Yesu, ugham anunug.” *

⁶⁰ Ra aaghe daaba izi taan, ve isaav aliina tiina ighe: “O Tiina, sosor tau tigham payau ne, uyatu sov. Ureua pazi.” Isaav tauvene, ve itap izi gha imaat. *

8

Saul ighur patanani pa yes tau tighur ila to Yesu

¹ Saawe tau tirav Stepanus imaat, Saul ileep ve iyok pa ngar tau tighamu na.

* **7:55:** Mk 16:19; Lu 22:69 * **7:56:** Mbo 110:1; Ro 8:34; Kol 3:1
 * **7:58:** Mbanj 22:20; Hib 11:37 * **7:59:** Mbo 31:5; Lu 23:46
 * **7:60:** Mt 5:44; Lu 23:34

Saawe tana ve ila, yes Yuda tiburig gha tighur patañani tiina kat injarui lupuun to Krisi tau tileep izi Yerusalem na. Tigham saghatin zi kat. Tauvene tisov tighawaar mbiriis irau taan sirivu to Yudea ve Samaria. Ve yes mbanjoona mon ta tileep izi Yerusalem.*

² Saawe tau Stepanus imaat, tamtamon siriv tau matazi ingalngal Maaron na tigham paata ve titavia toman tanjiz tiina. ³ Eemon Saul ighe ivaghamunia lupuun to Krisi ve ipasov zi kat. Tauvene ilaghlaagh taghon ruum aavo aavo, ve isasaar Krisi tamtamon tooni, ve ighurghur zi tilon tila ruum to yavyavuun. Yes zitamoot ve zilivaa paam.*

Pilip igham uraat izi taan sirivu to Samaria

⁴ Yes tau tiparghaughau na, tilaagh irau nugh naol. Ve nugh sindei tau tila tileep pani, ene tivotia vaaru poia pazi. ⁵ Tauta Pilip paam, izila nugh tiina ee to Samaria, ve ivotia Krisi vaaru izi ta sewe.*

⁶ Eval tiina tiloon saveen tooni, ve tighita gabua ngeretazi tau i ighamgham zi imin ilaal pazi na, le tisov tighur talinjazi poi pa saveen tooni. ⁷ Pasaa, avuvu sasaghati tiyakyak, ve tighaughau pa tamtamon katini. Ve narapeña katini tinizi poia.*

⁸ Tauvene tamtamon to nugh tawe tintinisi ve lolozu poia kat.

Mur tamazi ee eeza Simon ighe ighol Maaron tapiri

* **8:1:** Mbanj 1:8, 11:19 * **8:3:** 1Kor 15:9; Ga 1:13, 23; Pil 3:6; 1Tim 1:13 * **8:5:** Mbanj 6:5, 21:8 * **8:7:** Mk 16:17+

⁹ Nugh tawe, mur tamazi ee ilepleep, eeza Simon. Muuŋ ve ilam, i ipapait tauu eeza ighe i ŋeer tiina ee. Eval tiina to Samaria tighita mur tooni anooŋa le tirur pani ve avozi ikaak. *

¹⁰ Tauvene tamtamon tISOV lolozi pa loŋaŋ saveeŋ tooni. Yes tau ezazi tintiina, ve yes tau lezi ezazi mako na paam. Ve tisavsaav tIGhe: “Wai, ŋeer tane, tapiri tiina kat imin Maaron tauu.” ¹¹ Pasaa, mur tau monmon ighamghamu na, tamtamon tighita le ŋgar toozi imbool. Tauta tighurghur talinazi pa saveeŋ tooni irau saawe. ¹² Eemon saawe tau Pilip ivotia vaaru poia pa pooz to Maaron ve ipaghazonjai zi pa Yesu Krisi, tamtamon katini tighur ila ve tigham yaa. Yes zitamoot ve zilivaa paam. *

¹³ Simon paam, ighur ila ve igham yaa. Saawe tana ve ila, i ipakpaak Pilip, ve ighita gabua ŋgeretazi tintiina tau Pilip ighamgham zi na. Gabua tana itotoi ighe Maaron ileep tomania pa uraat tooni. Tauvene Simon ighit zi le aavo ikaak.

¹⁴ Yes mbanjooŋa tau tilepleep Yerusalem na, tilooŋ yes Samaria varuzi tIGhe tigham Maaron saveeŋ tooni gha tighur ila wa. Tauvene timbaaŋ Petrus yesuru Yoan tizila, leso tighit zi. ¹⁵ Yesuru tila tivot toozi, ve tighason Maaron to irei Avuvu Patabuyaŋ pa yes to Samaria tau ŋgarig gha tighur ila na. ¹⁶ Pasaa, tamtamon toozi eta igham Avuvu Patabuyaŋ soone. Yes tigham yaa mon ila Tiina toit Yesu eeza. ¹⁷ Tauvene Petrus yesuru Yoan tighur nimazi izala pavozi to tipalot zi, ve

* **8:9:** Mbanj 13:6+ * **8:12:** Mbanj 2:38

tigham Avuvu Patabuyaaj. *

¹⁸ Simon tau mur tamazi na, i ighita yes mbanjoonja tighurghur nimazi izazala tamtamon pavozi ve tigham Avuvu Patabuyaaj. Tauvene izuzuun maet siriv ila pazi, ve isaav ighi: ¹⁹ “Ai, yau naghe yam agham leg tapirimim tana paam. Leso sei tau ighi naghur nimag izala paavo, ene i aat igham Avuvu Patabuyaaj.”

²⁰ Eemon Petrus iyol aliinja ighi: “Wai Simon, gabua tau Maaron ireii pait sorok ne, yo ughu ugholi pa maet? Yo aat ulalem tomania maet silva tsio tana! *

²¹ Yo irau itinja talup ghiit pa uraat tsiei tane mako. Pa lolom tomania ngar tsio, ene iduduun ila Maaron maata mako. *

²² Tauvene upul ngar tsio saghati tana ileple, utoor ngar tsio ila pa Maaron, ve usuju ve ughasoni: Irau loolo saghatin ghom ve ireu sosor tsio tau ighien ila lolom na, ma mako? ²³ Pa yau naghilaal ghom wa. Ngar saghati ikau ghom, ve lolom ighaar kat pa tapiri tau ighien tsiei ne. Tauta ivaghamun ghom imin gabua lilia.” *

²⁴ Simon iloon saveen tane, ve isaav pazi ighi: “Wai, ighi vene, na yamru aghason Maaron payau! Leso patanjani tau asavia na, ivot payau sov.”

²⁵ Petrus yesuru Yoan tivotia saveen to Tiina toit pa yes Samaria, ve tipalot zi to tighur ila tooni. Le isov, ra timuul tizala pa Yerusalem. Yesuru tilaghlaagh, ve tivovotia vaaru poia pa

* **8:17:** Mbanj 2:4, 19:1+ * **8:20:** Mt 10:8; Mbanj 2:38 * **8:21:** Mbo 78:37; Ep 5:5 * **8:23:** 1Tim 6:9; Hib 12:15

nugh siriv to Samaria tau tighenaar taghon eez zige. Tighamgham tauvene le tila tivot Yerusalem.

Pilip ivotia vaaru poia pa daaba ee to Etiopia

²⁶ Ra anjela ee to Neer Tiina ila ivot to Pilip, ve isaav pani ighe: “Uburig ve ulaagh uzila le uvot eez tiina to Yerusalem tau imbut nugh nginaanja ve ila peria nugh Gaza.” ²⁷ Pilip iloonj saveenj tane, ve iburig gha ila. Ila peria eez livuugha, ve izaa to neer ee to Etiopia. Neer tawe, eeza tiina pasaa, i injin kuaz naol isov to garwaat tinazi Kandake. Kandake, i injin taan sirivu to Etiopia. * *

²⁸ Neer tawe izala Yerusalem pa sunjuun, ve sunjuun tana isov wa. Tauvene igham karis tooni, ve ighe imuul ila pa nugh tooni. Karis ilanlaan, ve i iwatawaat saveenj tau muunj propet Isaia iboode na. ²⁹ Pilip ila le ighita, ve Avuvu Patabuyaanj isaav pani ighe: “Unjarui karis tawe ula, ve ulaagh tomania.”

³⁰ Tauvene Pilip ilaan njaruini ila. Ila igharauu, ve iloonj neer tawe iwatawaat saveenj to propet Isaia. Tauvene Pilip ighasoni ighe: “Ai, saveenj tau uwatawaato na, yo uwatagh puughu, ma mako?”

³¹ Iiyol aliinja ighe: “Wai, pale nawatagh puughu mindai? Tamtamon eta ipaghazonjai ghau pani, o naghazonj pani.” Ra isaav pa Pilip ighe: “Uzalam mbolem izi tomani ghau.” ³² Saveenj ziiri tau neer tawe iwatawaato na, isaav tauvene:

“I imin sipsip tau tigherevu ila pa ravuunni.

* **8:27:** Etiopia, ene taan sirivu ee to Aprika. Ighen malau kat pa Yerusalem. Yes Etiopia tiwaat ‘kwin’ tighe kandake. Iit tasaav taghe ‘garwaat’. * **8:27:** Mbo 68:31, 87:4

Ve tunja mon ve ineneen imin sipsip paaghu
tau tikapis ooro.

Isavia saveen eta mako.

³³ Tipamayanini ve tipayooze pa savsaveen.

Eemon gabizoon toozi iduduun mako.

Sei pale isinai pa paaghu tooni? Mako.

Pasaa, lepoogh tooni izi taan, ene tinjoora
tuuku mon.” *

³⁴ Daaba to Etiopia iwaat saveen tane, ra isaav
pa Pilip ighe: “Naghason ghom pa saveen ziiri
tane. Propet tau ibood saveen tane, isavia tauu,
ma isavia neer ite paam?” ³⁵ Tauvene Pilip ipabu-
rigin saveen tooni itaghon saveen ziiri tau neer
tawe iwaato na, ve iseenja pa saveen siriv, ve
ivotia vaaru poia to Yesu pani. ³⁶ Yesuru titaghon
eez tila le peria yaa ee. Tauvene daaba tana iburig
ve ighason Pilip ighe: “Ughita. Yaa ee tane. Irau
nagham yaa, ma gabua eta ipoon eez payau?” † *

³⁷ Pilip iyol aliinja tauvene: “Isaav ighe yo ughur
ila to Yesu Krisi toman lolom, tauta ena. Yo irau
ugham yaa!”

I iyol Pilip aliinja ighe: “Vee, yau naghur ila
naghe Yesu Krisi, i Maaron naatu.”

³⁸ Tauvene isaav pa neer tau ilandoov karis na
ighe: “Ukis karis iyooz.” Ra yesuru Pilip tizi pa
karis ve tizila yaa, ve Pilip irughuuz. ³⁹ Saawe

* **8:33:** Is 53:7+ † **8:36:** Neer tane, tipaal laambe izi.
Muun, yes zitamoot tau tighamgham uraat ila kinik ruum tooni
na, tipaal lambezi. Leso timogheer pa kinik azaawa ma natlivaŋa
eta sov. Buk Lo 23:1 isaav tauvene: Zitamoot tauvene irau tilup
tomania Maaron tamtamon tooni pa sunjuun mako. Eemon mos
ziiri tane ipaghazonjai ghiit ighe Maaron loolo pa yes zitamoot
tauvene paam. Ughita Isaia 56:3-7. * **8:36:** Mban 2:38, 10:47

tau tipul yaa ve tizaa muul, Maaron Avuvu indai Pilip, le daaba tana ighita muul mako. Daaba tana ipaburigin laghoon tooni muul, ve ilaagh taghon eez ila toman loolo poia kat. ⁴⁰ Ve Pilip ila ivot izi nugh Asdot, ve ilaghlaagh irau nugh naol isov to taan sirivu tawe, ve ivovotia vaaru poia pazi le ila ivot nugh Sisarea. *

9

Yesu ivot to Saul (Mban 22:3-16, 26:9-18)

¹⁻² Saawe tana, Saul ipariaan uraat tooni to ghuruun patanani inarui yes tau titaghon Yesu. I isasavia saveen paroin pazi, ve izuari ghi ighe le irav zi timatmaat. Ighamgham tauvene ila, ve maata ingal ighe i aat ila nugh Damaskus paam, ve iil zitamoot ve zilivaa tau titaghon eez to Yesu izi ta sewe. Leso ikis zi ve ikau nimazi, ve igham zi tila Yerusalem, ve ipayooz zi pa savsaveen. Tauvene ila ighita daaba to watoonrau, ve ighasoni ighe ibood le rau siriv imin paesiin pa uraat tooni. Leso itotoi zi pa lupuun to yes Yuda tau tileep izi Damaskus we.

³⁻⁴ Tauvene Saul iburig tomania tamtamon tooni siriv gha tipul Yerusalem, ve tila pa Damaskus. Tilaghlaagh tila le tigharau Damaskus, ra mbonari tiina igheen sambam ve izilam, le isul livutin Saul. Tauvene itap izi taan, ra iloon neer ee aliina. Isaav pani ighe: “Saul, Saul, puughu mindai ta unoknok ghuruun patanani payau?”

⁵ Saul ighasoni ighe: “Tiina, yo sei?”

* **8:40:** Mban 21:8

Neer tawe iyol aliina ighe: “Yau Yesu. Yau taug ta unoknok ghuruun patajani payau ne. *

⁶ Uburig ve ulon ula nugh tiina. Mako tisaav payo pa saa ngar tau yo aat ughamu.”

⁷ Yes tau tilaagh tomania Saul na, tiyooz ve avozi ikaak. Pasaa, tilonloon neer ee aliina, eemon tighita tamtamon eta mako.

⁸ Ra Saul iburig iyooz ve maata pakia. Eemon ighita nugh mako. Tauvene tikis niima, ve tilon tila pa nugh Damaskus. ⁹ Saul maata ikumkum irau mbon tol. Saawe tana, i ighan aniin mako, ve ighun yaa mako.

¹⁰ Nugh Damaskus, neer ee tau itaghon Yesu na, ilepleep. Eeza Ananias. Tiina toit Yesu ivot tooni ila tandaghiin ve ipoi ighe: “Ananias!”

Ananias iyok pani ighe: “Tiina, taug ene.”

¹¹ Ra Tiina toit isaav pani ighe: “Uburig uvot ula, ve utaghon eez tau tiwaato tige ‘Eez Duduuna’ na, ve ulon ula ruum to Yudas. Mako ughason pa neer ee to nugh Tarsus, eeza Saul. Pa i ilepleep ta sewe, ve isunsun. ¹² I paam itandagh ve ighita neer ee, eeza Ananias, ilon ila tooni, ve ighur niima izala paavo. Leso maata poia ve ighita nugh muul.”

¹³ Ananias iyol aliina ighe: “Wai Tiina, neer tawe, eval tiina tisavia vaaru gha naloona wa. Tamtamon tsio patabuyaana tau tileep Yerusalem we, i ighamgham ngar sasaghati naol pazi. *

¹⁴ Ve aazne, yes daaba to watoonrau tiyok pani to igham ngar raraate izi nugh tane paam. Yei tau

* **9:5:** 1Kor 15:8 * **9:13:** Mbanj 8:3

nisunŋun ve niwatwaat yo ezam ne, i ighe ikis ghei nisov, ve igham ghei nila.”

¹⁵ Eemon Tiina toit isaav pani muul ighe: “Mako. Ula. Pa ŋeer tawe, yau taug nasiigho wa to imin uraata tsiau ariaaŋa ee. I pale ivotia varug ila nugh nugh naghozi. Yes tau Yuda mako na, ve yes kinik, ve yes Israela paam. *

¹⁶ Yau taug pale napaghazonŋaini pa patanani naol tau i aat ibaad zi pa yau ezag.” *

¹⁷ Tauvene Ananias iburig, ve ilaagh ila ivot ruum to Yudas, ve ilonŋ ila. Ila peria to Saul, ra ighur niima izala Saul paavo, ve isaav pani ighe: “Tazig Saul, Tiina toit Yesu tau ivot tsio izi eeze, i ighe yo ughita nugh muul, ve Avuvu Patabuyaan izeev ghom. Tauta imbaanŋ ghau nalam.”

¹⁸ I isaav tauvene, ve rekia mon gabua imin iigh anavu tau ipoon Saul maata na itap izi, ve ighita nugh muul. Ra iburig, ve igham yaa pataghaan. *

¹⁹ Ra ighan aniiŋ, ve tapiri ivot muul, ve ileep mbonŋ siriv izi Damaskus tomania Yesu ziŋeera.

Saul ivotia Yesu vaaru izi nugh Damaskus

²⁰ Saul isasaŋan mako. Rekia mon ve ipaburigin uraat tooni to votiaaŋ Yesu vaaru. I ilonŋlonŋ ila lupuunŋ niazi to yes Yuda, ve ivovotia Yesu vaaru pazi ighe i Maaron Naatu. ²¹ Yes tau tilooŋa na, tisov tirur pa saveeŋ tooni ve avozi ikaak. Ve tisaav tighe: “Wai, ewe ŋeer tau ireureu yes tau tisunŋunŋ ila Yesu eeza izi Yerusalem na. Mindai ta aazne itoor ŋgar tooni muul? Iit taghe pa i

* **9:15:** Mbanj 26:16+; Ga 1:15+; 1Tim 1:12 * **9:16:** Lu 21:12+; Mbanj 20:23; 2Kor 11:23+; 2Tim 2:9 * **9:18:** Mbanj 2:38

ilam pa kisiinj yes to nugh tane tau titaghon Yesu na. Leso igham zi tila Yerusalem, ve ipayooz zi pa savsaveenj ila yes daaba to watoonjrau naghozi. Eemon mako.” *

²² Maaron ipapalot Saul, tauvene uraat tooni to votiaan mos ilanlaan toman tapiri le tapiri kat. I igham yes Yuda tau tileep Damaskus na, tilil pa savsaveenj. Pasaa, saveenj tooni ipaghazonjai Yesu ighe onoon kat, i Mesia. *

Yes Yuda tigde tirav Saul imaat

²³ Yes Yuda tileep le malau rig, ra tilup zi ve timbu saveenj tigde tirav Saul imaat. ²⁴ Tauvene mbonj ve mataaz, tisaanan izi didiinj ariaanja tau ilivut Damaskus na atamana tigde tirav Saul imaat. Eemon tamtamon siriv tipaes pani pa ngar toozi tawe. ²⁵ Tauvene mbonj ee, Saul ziņeera siriv tighuru ilonj ila nakaral ee loolo, ve tipalivu ila iliv pa didiinj ariaanja to nugh muuri, ve titughu izila, gha ighau ila. *

Saul izala pa Yerusalem

²⁶ Saul ila ivot Yerusalem, ve itoova to ilup toman-
nia yes tau titaghon Yesu na. Eemon yes tisov tiroi
pani. Pasaa, tighur ila tigde i itoor ngar tooni ve
itaghon Yesu ne soone. *

²⁷ Eemon Banabas, i imin Saul eeta, ve ighamu
ila to yes mbanjoonja, ve ipaes pazi ighe: “Saul
ighita Tiina toit wa. I ivot tooni izi eez livuugha
ve isavsav tomania. Ra Saul ila Damaskus, ve

* **9:21:** Mbanj 9:2+; Ga 1:23 * **9:22:** Mbanj 5:42, 17:3, 18:5

* **9:25:** 2Kor 11:32+ * **9:26:** Ga 1:17+

iyooz ariaan pa votiaan Yesu vaaru izi ta sewe. Iroi mako.” *

²⁸ Yes tiloon saveen tane, le lolozi poia pa Saul, ve tighamu gha yesja tilup zi. Saawe tana, Saul ilaghlaagh taghon Yerusalem loolo, ve ivovotia Yesu vaaru. I iroi mako. Iyooz ariaan kat. ²⁹ Yesja yes Yuda tau tisavsaav Grika alinjazi na tivavazorai zi pa savsaveen paam. Tauvene tilup zi ve timbu saveen tigde tiravu imaat. ³⁰ Eemon tonvetaz siriv to Krisi tiloon saveen toozi, ve tinguaaz Saul izila pa nugh Sisarea. Ra tipaghaua izaa waan, ve irav ila pa nugh tooni Tarsus.

³¹ Tauvene lupuun to Krisi tau tileep irau taan sirivu to Yudea, Galilaia, ve Samaria na, tileep poia. Patanani ivot pazi muul mako. Ve Maaron iseen ngar toozi pa ngar popoia siriv, ve Avuvu Patabuyaan ipapalot zi. Tauta tiroron pa Tiina toit, ve titaghon eez tooni, ve lupuun toozi ivot imin tiina.

Petrus igharaat narape ee izi nugh Lidda

³² Petrus ilaghlaagh ve igigig lupuun to Krisi tau tileep irau nugh nugh. Saawe ee, i izila igig Maaron tamtamon tooni patabuyaanja siriv tau tileep izi nugh Lidda. ³³ Ila peria le izaa to neer narape ee tau aaghe imaat, eeza Aineas. I irau ilaagh mako. Ighengheen mon. Moroghoon tooni tawe ikisi irau ndaman liim ve tol wa. ³⁴ Petrus ighita, ve isaav pani ighi: “Aineas, aazne Yesu Krisi igharaat ghom tinim poia. Uburig ve uput moogh tsio.” Isaav tauvene, ve rekia mon Aineas iburig. *

* **9:27:** Mban 4:36 * **9:34:** Mban 3:6, 14:8, 28:8+

³⁵ Tamtamon to nugh Lidda ve nugh Saron tighita Aineas tiini poia muul, le tisov titoor ngar toozi ila pa Tiina Yesu, ve tighur ila tooni.

Petrus ipaburigin Tapita izi nugh Yoppa

³⁶ Livaa ee tau itaghon Yesu na ilepleep izi nugh Yoppa. I eeza Tapita. (Tiwaat eeza ila Grik alinjazi tigde ‘Dorkas.’) Saawe isov, i ighamgham ngar popoia, ve iuluul yes mbolaanja. *

³⁷ Saawe tana, i imoroon le imaat. Tauvene tigharaat paata, ve tisuru izala ruum loolo saanja.

³⁸ Nugh Lidda igharau Yoppa. Tauvene yes to nugh Yoppa tau titaghon Yesu na tiloon Petrus vaaru tigde i ilam ileep izi nugh Lidda, ve timbaan tamtamon ru tilaan tila pani. Yesuru tila tivot, ve titaņ raraini tigde: “Aa olman, uburig rekia ve itinja tala. Pa pataņani ee ivot payei.”

³⁹ Tauvene Petrus iburig gha yesņa tila. Tila peria nugh Yoppa, ve tigham Petrus malmali izala ruum loolo saanja tau olman tinazi paata igheen pani na. Yes zinaara tisov to nugh tawe tila tiyooz tigharau Petrus, ve titaņtaņ, ve titotoi nonoghiiņa tau muun Dorkas isai zi ve igham pazi na. ⁴⁰ Petrus iziir zi tisov tivot tila muuri, ra iput aaghe ve isun. Isun le isov, ra itoor naagho ila pa olman tinazi paata, ve isaav pani ighe: “Tapita, uburig!” *

Rekia mon ve olman tinazi maata pakia le ighita Petrus, ve iburig gha mboole izi. ⁴¹ Petrus ikis ni-ima, ve iiti iburig iyooz. Ra ipoi yes zinaara toman-ia Maaron tamtamon tooni patabuyaanja tilam,

* **9:36:** 1Tim 2:10, 5:10; Tit 3:8 * **9:40:** Mbanj 20:9+

ve itotoi Tapita pazi. Leso tiwatagh tigde i iburig pa mateegh gha ilepleep. ⁴² Gabua ŋgereeta tana vaaru ilaan irau nugh Yoppa. Tauvene tamtamon katini titoor ŋgar toozi ila pa Tiina toit Yesu ve tighur ila tooni. ⁴³ Petrus ileep malau rig izi Yoppa. I ileep tomania Simon tau ŋeer to gharatoon gabua siriv pa ŋgai uuli na.

10

Aŋela ivot to Konili ila tandaghiin

¹ Daaba ee ilepleep izi nugh Sisarea, eeza Konili. I iŋgin zaaba to Rom irau ndiŋndiŋ ee (100) tau tilam pa taan Itali. Tauta tiwaat zaaba tawe tigde ‘Ŋgun to Itali.’ ² Konili, i Yuda mako. Eemon yesŋa tamtamon tisov tau tileep tomania ila ruum tooni na, matazi iŋgalŋgal Maaron ve yesŋa yes Yuda tiluplup zi pa sunjuuŋ. I iuluul yes Yuda tau mbolaan igham zi na, ve isunjuuŋ pa Maaron irau saawe.

³ Saawe ee, ravrav izi, aaz anunu igham tol ma vene, ve Konili itandagh ighe ighita aŋela ee to Maaron ivot ghazooŋa kat, ve iŋaruini ilam, ve ipoi ighe: “Konili.”

⁴ Konili idaad maata pani, ve roin tiina kat ighamu. Ra ighason aŋela tawe ighe: “Tiina tsiau, mindai?”

Aŋela iyol aliinŋa ighe: “Sunjuuŋ tsio tomania uleen popoia tau ughamgham pa yes mbolaanŋa na, Maaron ighita, ve loolo poia pani imin watoonrau poia. ^{*}

* **10:4:** Pil 4:18; Hib 13:16; Syg 8:4

⁵ Uloonj. Njeer ee ilepleep izi nugh Yoppa, eeza Simon Petrus. Umbaan tamtamon siriv tila tighamu ilam. ⁶ I ileep to Simon ite tau njeer to gharatoon gabua pa ngai uuli na. Ruum tooni iyooz igharau nari.”

⁷ Anjela isavsaav pani le isov, ra ipuli ve ila. Konili ipoi besoonja tooni ru tau tighamgham uraat ila ruum tooni loolo, ve zaaba tooni ee tau monmon ilepleep tomania ve ighamgham uraat pani na. Zaaba tawe maata ingalngal Maaron.

⁸ Konili ipaes pazi pa gabua isov tau ivot pani na le isov, ra imbaanj zi tila pa nugh Yoppa.

Petrus ighita tandaghiinj
(Mbanj 11:5-14)

⁹ Mbonj le nughizau ve aaz izalam zegmatuugh ma vene, ra zeran tol tawe tila tigharau nugh Yoppa. Saawe tana, Petrus izala ruum paavo ighe isunj. ¹⁰ Isunjsunj ila le iyamaan ghi ighe pitoola. Saawe tau tighagharaat aniinj, i isasaan ila le tandaghiinj ee ivot pani. ¹¹ Maata izala le ighita sambam ikaak, ve gabua ee imin uuli tiina. Uuli tawe imin timbit maata paanj ve titughu izilam pa taan. ¹² Ve gabua maata maata tileep ila uuli tawe loolo: Ngai maata maata, ve gabua tau tikakara ila taan, ve man naol tau tirovroov ila taitai saamba na paam. ¹³ Malau mako ve Petrus iloonj saveenj ilam pani ighe: “Petrus, uburig, urav zi, ve ughan zi.”

¹⁴ Petrus iyol aliinja ighe: “Wai Tiina, irau naghan zi mako. Pa gabua siriv tawe, ene tinjalaanj ila matam mako, ve tutuunj ingalsek pa ghaniinj

zi. Ta muun ve ilam, avog itut gabua eta tauvene mako.” *

¹⁵ Ra saveen ilam pani muul ighe: “Gabua tau Maaron ighamu ingalaan wa, yo ughe saghati sov.” *

¹⁶ Gabua tana ivot pai tol le isov, ra rekia mon ve tiyau gabua tawe imuul izala pa sambam.

¹⁷ Saawe tau Petrus ighita tandaghiin tana, zeran tol tau Konili imbaan zi na, tila tivot nugh Yoppa, ve tighason pa Simon ruum tooni. Petrus ighamgham ngar pa tandaghiin tana puughu, ve zeran tol tana tila tiyooz ila ruum naagho, ¹⁸ ve tighason pani toman alinazi tiina tigde: “Ou, Simon tau eeza ite Petrus na, ileep ta sene, ma mako?”

¹⁹ Petrus ighamgham ngar pa tandaghiin tana puughu soone, ve Maaron Avuvu isaav pani ighe: “Simon, uloon. Zeran tol tiyozooz muuri we. Tighe tighet ghom. ²⁰ Uburig uzila toozi, ve yamja ala. Ugham ngar naol sov. Pa yau taug ta nambaan zi tilam payo.”

²¹ Tauvene Petrus izila toozi, ve isaav pazi ighe: “Yau taug tane. Alam ail ghau pasaa? Lemim savaaveen payau?”

²² Yes tiyol aliina tigde: “Daaba tsiei Konili tau ingin zaaba ndinidin ee (100) na, i imbaan ghei payo, ta nilam. I neer duduuna ee, ve ironon pa Maaron ve itaghon ngar tooni. Tauvene Yuda tisov tipaiti. Noor mon, tandaghiin ee ivot pani. I ighita anela patabuyaan ee ivot tooni, ve isaav pani ighe i aat imbaan payo ula ruum tooni. Leso igham

* **10:14:** Wkp 11:1+ * **10:15:** Mk 7:14+; Ro 14:14, 20; 1Tim 4:3+

saveen siriv ila yo avom.” ²³ Petrus iloon saveen tane, ve igham loomba tana tilonj tila ruum, ve yesna tileep pa mbonj.

Petrus ila ighita Konili

Nughizau, ra Petrus yesna zeran tol tana tiburig gha tila. Tamtamon siriv to Krisi tau tileep izi nugh Yoppa na tila tomani zi paam. ²⁴ Tilaagh tila le tigheen izi eez livuugha. Mbonjoozo, ra tila tivot nugh Sisarea. Konili iyau ziiri waaro tooni tomania zeetna siriv tilam tilup zi izi ruum tooni, ve tisanan zi. ²⁵ Saawe tau Petrus ighe ilonj ila pa ruum, Konili ilaagh naruini ilam, ve iput aaghe izi Petrus aaghe puughu ve ipakuru. ²⁶ Eemon Petrus ingalsekini ighe: “Wai, ugham vene sov! Uburig uyooz! Yau tamtamon raraate imin yo.” Ve iiti iburig. *

²⁷⁻²⁸ Ra yesuru tisavsaav, ve tilonj tila pa ruum loolo. Petrus ighita eval tiina tau tilup zi gha tilepleep na, ve isaav pazi ighe: “Yam awatagh. Yei Yuda, lemai tutuunj ariaana tau ingalsekin ghei ighe: Yes tau Yuda mako na, irau nila toozi, ma nilup tomani zi ne mako. Yei aat nileep soghan pazi. Eemon Maaron ipaghazonai ngar tsiau ve aazne naghilaal wa. Irau naghe tamtamon eta isaghat ila Maaron maata ne mako. *

²⁹ Tauta mbanjoonj tsiam ilam, ve nambuzir mako. Yau naburig nalam. Aiyo, naghe naghason gham. Puughu mindai ta ambaan payau?”

* **10:26:** Mbanj 14:15 * **10:27-28:** Mbanj 15:8+; Ep 2:11+

³⁰ Ra Konili aana isaav ighe: “Wai, wariiz, aaz anunu igham tol ma vene imin aazne, ve nasun̄sun̄ izi ruum tsiau. Malau mako ve naghita neer ee ivot. Nonoghiina tooni milmilia kat. I ilam iyooz ila naghog, ve isaav payau ighe: ³¹ ‘Konili, sun̄sun̄ tsio, Maaron iloon̄a wa. Ve uleen̄ tau ughamgham pa yes mbolaana na, i maata ingalngali.’ *

³² Tauvene umbaan̄ tamtamon siriv tila pa nugh Yoppa, ve tigham Simon tau eeza ite Petrus na ilam. I ilepleep tomania Simon ite tau neer to gharatoon̄ gabua pa ngai uuli na. Ruum tooni iyooz igharau nari.’

³³ An̄ela isaav payau tauvene, tauta rekia mon ve nambaan̄ uraata tsiau tol tilat payo. Poia kat pa uloon̄ alin̄ag ve ulam. Yei nisov nilam nilup ghei ta sene ila Maaron maata nighe niloon̄ saveen̄ isov tau Neer Tiina isavia payo na. Aiyo, uvotia payei gha niloon̄a.”

Maaron izavaan eez pa yes tau Yuda mako na

³⁴ Petrus ipaburigin saveen̄ tooni ighe: “Aa, ngarig gha ngar tsiau ighazoon̄. Onoon kat. Maaron ivool to tamtamon eta mako. I igham ngar raraate pa tamtamon tisov. *

³⁵ I ighur loolo pa nughmarin̄ tisov. Tauvene sei tau ighe iroron pani ve itaghon ngar tau iduduun̄ ila maata, ene pale Maaron loolo poia pani. *

³⁶ Onoon, vaaru poia tau isavia eez to itin̄a Maaron tavalupu ghiit tamin eemon ve luuma tooni izaa toit, ene Maaron ighuru ilam to yei Israela imin

* **10:31:** Hib 6:10 * **10:34:** Ro 2:10+ * **10:35:** Ep 3:6; Kol 3:11

maata. Eez tawe, ene uraat to Yesu Kresi. I Tiina to iit tasov. *

³⁷⁻³⁸ “Uraat tiina tau ivot irau taan isov to yei Israela na, yam aat aloon vaaru rigta wa. Saawe tau neer rughuzaana Yoan ivovotia saveen pa tamtamon ighe tigham yaa, Yesu to Nasaret ipaburigin uraat tooni izi Galilaia. I, Maaron ileep tomanina. I ighuru pa uraat tooni, ve izeeva pa Avuvu Patabuuaan, ve igham le tapiri tiina. Tauta Yesu ilaagh irau nugh naol, ve igham uraat popoia, ve igharaat tamtamon tisov tau Neer Saghati ivaghamun zi na. *

³⁹ “Uraat naol isov tau i ighamu izi taan sirivu to Yudea ve Yerusalem na, yei mbanjoona night katini pa matamai. Tauta nivovotia saveena, leso nipariaan tamtamon to tighur ila tooni. Uraat tooni tawe, tauta imin puughu pa tamtamon atezi yavyav pani, ve tiravu izala ai pambaroon gha imaat. *

⁴⁰ Eemon mbon imin tol, ve Maaron ipaburigini pa mateegh. Tauta itotoi tauu ivot ighazoon ila tamtamon siriv matazi ⁴¹ Saawe tau iburig pa mateegh, i ila ivot to eval mako. Yei mon, ta i ivot tsiei gha nighita. Ve yeja nilup ghei pa ghanghaniin. Pasaa, Maaron isiigh ghei pataghaan to nighita uraat tooni ve nipariaan saveena. *

⁴² Ve ighur uraat payei to nivotia saveen pa tamtamon tauvene: I ighur Yesu to igabiiz tamtamon tisov, ve ighur atuya pazi. Yes tau matazi yaryaare,

* **10:36:** Ro 10:12; Ep 2:14; Kol 1:20 * **10:37-38:** Is 61:1

* **10:39:** Mban 2:32, 5:30 * **10:41:** Lu 24:36+

ve yes mateegha paam. *

⁴³ Propet tisov tipariaan saveen tooni tigha tamtamon tisov tau tighur ila tooni na, ila i eeza, Maaron pale ireu sosor toozi ilale.” *

Yes tau Yuda mako na tigham Avuvu Patabuyaaj

⁴⁴ Petrus ivovotia Maaron aliina pazi soone, ve Avuvu Patabuyaaj izilam gha izeev tamtamon tisov tau tiloon saveen na. ⁴⁵⁻⁴⁶ Yuda siriv tau tighur ila to Krisi na, yesna Petrus tilam. Tiloon yes tawe tisavsaav ila nugh nugh alinazi ve tipapait Maaron eeza, le tisov tirur ve avozi ikaak. Pasaa, Maaron irei Avuvu Patabuyaaj pa yes tau Yuda mako na. *

⁴⁷ Ra Petrus iburig ve isaav ighe: “Sei irau ingalsekin zeran tane pa ghamuun yaa? Mako. Pa yes tigham Avuvu Patabuyaaj wa raraate imin iit.” *

⁴⁸ Tauvene Petrus aavo iyaryaan pazi ighe yes aat tigham yaa ila Yesu Krisi eeza. Tigham yaa le isov, ra tinguruut Petrus gha yesna tileep rig ta sewe.

11

Petrus imuul izala Yerusalem ve ipaesia laghoon tooni

(Mban 10:9-44)

¹ Mbanjoonja siriv tomania yes tonvetaz to Krisi tau tileep irau taan sirivu to Yudea na, tiloon tigha yes tau Yuda mako na, tiloon Maaron saveen tooni

* **10:42:** Mban 17:31; Ro 14:9+; 2Kor 5:10 * **10:43:** Is 53:5;

Ro 10:9; 1Yo 2:2, 12 * **10:45-46:** Mk 16:17; Mban 2:4; Ga 3:14

* **10:47:** Mban 15:8+

gha tighur ila wa. ² Tauvene saawe tau Petrus imuul izala Yerusalem, yes tau tiyooz ariaan pa tutuun to Mose ve ravuun tamtamon warozi na, tiyau avozi pani. ³ Tighe: “Petrus, niloon tigde yo ula uleep tomania yes tau Yuda mako na, ve yamna alup gham pa ghanghaniin. Puughu mindai ta yo ugham tauvene?”

⁴ Tauvene Petrus ipaes pazi poi pa gabua naol tau ivot pani na, ighe: ⁵ “Aloon. Yau naleep izi nugh Yoppa ve nasunsun, ve tandaghiin ee ivot payau. Matag izala le naghita gabua ee imin uuli tiina. Uuli tawe timbit maata paan, ve titughu ta sambam we ve izilam. Izi izi le iduduun ila naghog. ⁶ Nagig ilon ila uuli tawe loolo, ve naghita gabua maata maata. Ngai maata maata, ve gabua siriv tau tikakarau ila taan, ve man tau tirovroov ila taitai saamba na paam. ⁷ Ra naloon saveen ilam payau ighe: ‘Petrus, uburig, urav zi, ve ughan zi.’

⁸ “Yau nayol aliina naghe: ‘Wai Tiina, irau naghan zi mako. Pa gabua siriv tawe tingalaan ila matam mako, ve tutuun ingalsek pa ghaniin zi. Ta muun ve ilam, avog itut gabua eta tauvene mako.’
*

⁹ “Ra saveen sambam ve izilam muul ighe: ‘Gabua tau Maaron ighamu ingalaan wa, yo ugha saghati sov.’
*

¹⁰ Gabua tana ivot payau irau pai tol le isov, ra tiyau gabua isov tawe imuul izala pa sambam.

¹¹ “Saawe duduun tana, tamtamon tol to nugh Sisarea tau timbaan zi payau na, tilam tiyooz ila

* **11:8:** Wkp 11:1+ * **11:9:** Mk 7:14+; Ro 14:14, 20

ruum tau nalepleep pani na, naagho. ¹² Avuvu Patabuyaanj isaav payau ighe naghama ngar naol sov, ve nala tomani zi gha yeja nila. Tauvene yeja tonvetaz liim ve ee tane, niburig gha nila. Nilaagh nila nivot nugh Sisarea, ve malmalimai nilonj nila Konili ruum tooni. ¹³ Ra i ipaes payei ighe i ighita anjela ee ivot gha iyooz ila ruum tooni loolo, ve isaav pani ighe: ‘Umbaanj tamtamon siriv tila pa nugh Yoppa ve tigham Simon tau eeza ite Petrus na ilam. ¹⁴ I pale isavia lem savaaveenj siriv tau pale imin eez payo to Maaron igham mulin ghom ve uleep poi. Ve yo mon mako. Tamtamon tisov tau tileep tomani ghom ila ruum tsio na paam, Maaron pale igham mulin zi.’

¹⁵ “I ipaesia gabua tana payau le isov, ra anag napaburigin saveenj tsiau. Malau mako, Avuvu Patabuyaanj izilam le izeev zi raraate imin tau papazoge igham pait ila saawe to Pentekos na. ¹⁶ Ra matag ingal imuul ila pa Tiina toit aliinja tau ighe: ‘Yoan irughuuz tamtamon pa yaa mon. Eemon yam tane, Maaron aat igham Avuvu Patabuyaanj payam.’ *

¹⁷ Aghita. Saawe tau iit taghur ila to Tiina toit Yesu Krisi, Maaron irei Avuvu Patabuyaanj pait. Ve aazne, i itaghon ngar raraate pa zeran tawe. Gabua tane ilam pa Maaron tauu. Tauvene yau sei, ta irau napoon uraat tooni?” *

¹⁸ Tilooj saveenj tana, ra atezi izi, ve lezi saveenj muul mako. Ve tipait Maaron eeza tigde: “Onoon kat, aazne, Maaron ighe igham poghania yes tau Yuda mako na paam. Tauta ipaburigin zi gha

* **11:16:** Mt 3:11; Mbanj 1:5 * **11:17:** Mbanj 10:47, 15:8+

titoor ngar toozi ila pani. Leso tigham lepoogh poia ila tooni.” *

Eez tau lupuun to Krisi ivot imin tiina izi nugh Antiok

¹⁹ Saawe tau tirav Stepanus imaat ve ilam, yes Yuda tighurghur patañani pa yes tau titaghon eez to Krisi. Tauta tighawaar mbiriis irau nugh nugh. Siriv tila pa taan sirivu to Ponisia, siriv tivot tila sisi Saiprus, ve siriv tila nugh Antiok. Saawe tau tilaghlaagh, yes tivovotia Maaron aliinja. Eemon tivotia pa tamtamon tisov mako. Tivotia pa yes Yuda mon. *

²⁰ Eemon tamtamon toozi siriv to sisi Saiprus ve taan sirivu to Sairini, yes tila pa nugh tiina Antiok, ve tivotia Tiina toit Yesu Krisi vaaru pa yes Grika tau tileep izi ta sewe. ²¹ Ve Maaron tapiri ighengheen tomani zi. Tauvene eval tiina to nugh Antiok titoor ngar toozi ila pa Tiina toit, ve tighur ila tooni. *

²² Varuzi ilaan ila ivot Yerusalem, ve lupuun to Krisi tiloona, tauta timbaan Banabas ila nugh Antiok, lesa ighit zi. ²³ Ila ivot toozi, ve ighita poia to Maaron tau igheen tomani zi na, le ighamu loolo poia kat. Ve ipalot zi ighe lolozi isaghav Tiina toit ve tikisi ariaan taghon gha ila. ²⁴ Banabas, i neer poia. Ngar to Avuvu Patabuyaana ivon ila loolo, ve ghuruun ila tooni iyaryaan kat. Saawe tana, eval tiina kat titoor ngar toozi ila pa Tiina toit Krisi ve timin le.

* **11:18:** Ro 10:12, 15:9 * **11:19:** Mban 8:1, 4 * **11:21:** Mban 13:1, 14:26+

²⁵ Tauvene Banabas ila nugh Tarsus to iil Saul. Ila ivot tooni, ra ighamu gha yesuru timuul tila pa Antiok. *

²⁶ Ndaman dodoli ee, Banabas yesuru Saul tileep tomania lupuun to Krisi izi sewe, ve tipaghazonjai eval tiina pa Krisi saveen tooni. Yes Antioka tau titaghon Krisi na, tauta tamtamon tipoi zi tigue 'Kristen' imin maata. *

²⁷ Saawe tana, propet siriv tileep Yerusalem, ve tizila nugh Antiok. ²⁸ Tamtamon toozi ee, eeza Agabus. Maaron Avuvu ipaburigini ve ivotia Maaron aliina pazi ighe pitool tiina pale ivot irau taan isov. (Pitool tawe ivot indeen saawe tau Klodias imin kinik tiina to Rom ve injin nugh.) *

²⁹ Yes tau titaghon Yesu na, tiloon saveen tana, ve timbu saveen to tighur nimazi imin uleen yes tonvetaz to Krisi tau tileep izi Yudea we. Tighita saa gabua ta irau tigham pazi, ene tighuru ila mon. *

³⁰ Tilup gabua le isov, ra tighuru ila to Banabas yesuru Saul, ve tighamu ila pa yes nginiina tau tileep izi Yerusalem. *

12

Kinik Erod irav Yakobus imaat, ve ighur Petrus ilonj ila ruum to yavyavuunj

¹ Saawe tana, kinik Erod iburig, ve ikis tamtamon siriv tau tileep ilonj ila lupuun to Krisi na. Leso ighur yavyavuunj pazi. ² Ve isaav gha tigham

* **11:25:** Mbanj 9:27 * **11:26:** 1Pe 4:16 * **11:28:** Mbanj 21:10

* **11:29:** Ro 15:26; 1Kor 16:1; Ga 2:10 * **11:30:** Mbanj 12:25

Yakobus tau Yoan toogha na, ve tirav motin luua pa mbuzaagh gha imaat. *

³ I ighita ngar tau ighamu na, ene igham yes Yuda lolozu poia. Tauvene ikis Petrus paam. Gabua tana ivot indeen saawe to lupuun tiina to ghaniin mberet tau le yis mako na. ⁴ Tauvene Erod ikis Petrus, ve ighuru ilon ila ruum to yavyavuun. Ve ighuru ila zaaba sanjavul liim ve ee (16) nimazi to tingini. Zaaba tawe tivalagh zi timin ngun paan, ve ngun paan tana tivayoli zi pa uraat to nginiin Petrus. Tamtamon paan tileep ila ngun enaenja. Erod maata ingal ighe saawe tau lupuun tiina to Pasova isov, mako igham Petrus, ve ipayooze pa savsaveen ila eval tiina matazi. ⁵ Tauvene tikis Petrus ileep ila ruum to yavyavuun loolo. Eemon lupuun to Krisi tisunjun ariiaan tigde Maaron iu-ule. *

Anjela ipas Petrus ivot pa ruum to yavyavuun

⁶ Tilepleep le mbon ee, Petrus ighengheen ila zaaba ru sosozi. I, tikauu pa sen ru. Ve zaaba siriv tiyozyooz ila ataman aavo, ve tinginngin ruum to yavyavuun. Erod maata ingal ighe mbon tane le nughizau, mako igham Petrus ivot pa ruum to yavyavuun, ve ipayooze pa savsaveen.

⁷ Malau mako ve anjela to Maaron ivot le mbonari isul ilon ila ruum to yavyavuun loolo. Anjela ivaan Petrus, ve isaav pani ighe: “Ai, uburig rekia!” I isavsav, ve sen tau tikau Petrus niima pani na, timazugh tizi.

⁸ Anjela isaav pani muul ighe: “Ugharaat ghom pa laghoon, ve ughur zuzuunja to aghem.” Petrus

* 12:2: Mt 4:21, 20:22+ * 12:5: Ro 15:30+; Ep 6:18

igharaat ghi le isov, ra anjela isaav pani muul ighe: “Utav ghom pa nonoghiina tsio to ngoaan, ve utaghon ghau.” ⁹ Tauvene Petrus itaghoni gha yesuru tila. Eemon igham ngar ighe ngar tau anjela igham pani na, ene ivot pani onoon mako. Ighe pa ighita tandaghiin mon. ¹⁰ Yesuru tila tivaliv zaaba ngun ee, ve tila tivaliv ngun ite, ra tila tivot ataman ariiaan tau igheen ila pa muuri. Tilaagh njaruini tila, ve ataman tauu ikaak sorok, ve yesuru malmalizi tivot tila. Tipul ruum to yavyavuun, ve titaghon eez tila rig, ra anjela ipuli ve ila. *

¹¹ Ra Petrus ngar tooni ivot, ve isaav pa tauu ighe: “Onoon kat, ngarig gha naghilaal: Maaron imbaan anjela tooni ilam to ipas ghau ila Erod niima, ve ngar sasaghati naol tau yes Yuda tigde tigham payau.”

¹² Saawe tau Petrus ighilaal gabua tana, malmali ila pa ruum to Maria, tau Yoan Markus tiina na. Ruum tana, yes eval tila tilup zi ila loolo, ve tisuun. ¹³ Petrus ila isen ataman, ve besoon li-vaa ee, eeza Roda, ila ighe ikaak ataman. ¹⁴ Eemon saawe tau ighilaal Petrus aliina, i loolo poia le poia kat. Tauta loolo iveegh pa kakoon ataman, ve ilaan muul ilon ila, ve ipaes pa eval tiina ighe: “Ale, Petrus tauu ta iyozyooz ila ataman aavo we!”

¹⁵ Yes tiyol aliina tigde: “Wai, ngar tsio ivaghamgham!”

Eemon i aavo iyaryaan ighe: “Mako, i tauu ta iyozyooz muuri we.”

* **12:10:** Mbo 34:7; Mban 5:19, 16:25+

Tauvene yes tisaav pani tighe: “Ewe aat anjela tooni taa?”

¹⁶ Petrus iyozyooz muuri, ve inoknok senjiin ataman. Tauvene tila tikaak ataman, ve tighita le tirur pani. ¹⁷ Eemon i itatan niima pazi leso tineneen. Ra ipaes pazi pa eez tau Tiina toit Yesu ighamu ivot pa ruum to yavyavuun. Ipaes pazi le isov, ve isaav pazi ighe tila tipaes pa Yakobus * ve tonjetaz siriv to Krisi pa gabua tau ivot pani na. Ra ipul zi, ve ila pa nugh ite.

¹⁸ Mbon tana le nughizau, ve yes zaaba tirur ve tigham ngar naol pa ghaon to Petrus. ¹⁹ Erod iloon paesiin tighe Petrus ileep ruum to yavyavuun loolo muul mako. Tauvene isaav pa zaaba tooni ighe tila tiilo. Eemon tiilo le mako. Tauvene Erod ighason rarai yes tau tinjin Petrus na. Ighason zi le mako, ra isaav gha tigham zi tila, ve tirav zi timaat.

Murei ra, Erod iburig, ipul taan sirivu to Yudea, ve izila nugh Sisarea, ve ileep rig ta sewe.

Maaron irav Erod imaat

²⁰ Saawe tana, Erod †

* **12:17:** Yakobus tane, i Yesu taazi duduun. I ta ibood Rau to Yakobus (o Jems) tau igheen Baibol loolo na. † **12:20:** Saveen to Maaron isavia tamtamon naol tau ezazi Erod. Saawe tau Maria ipoop Yesu, Erod tau imin maata na, ighamgham pooz pa yes Israela. Tiwaat eeza tighe ‘Erod Tau Eeza Tiina.’ I ta irav yes geegeu to Betelem timatmaat. Erod tane, ta naatu eeza Erod Antipas. I ta irav neer rughuzaanja Yoan imaat, ve ilup tomania Kaiapas gha Pontius Piladus, ve tirav Yesu imaat. Ngat tane isavia Erod Antipas naatu Erod Agripa. I ta irav Yakobus imaat, ve murei motmoot tighani. Erod Agripa naatu, eeza Erod Agripa tau imin ru pani. I ta murei tipayooz Paulus pa savsaveen ila naagho. Sinain tooni igheen ila Mbanjoonja 25:13 ila imuul 26:32.

aate yavyav kat pa nugh tintiina ru, Tiro ve Sidon. Nugh ru tawe, monmon tighamgham aniinj ila nugh to Erod. Tauvene tilup zi, ve timbaanj tamtamon toozi siriv tila pa Erod, leso tigharaat saveenj pani. Tila tivot, ve malmalizi tila to Blastus tau injin kinik ruum tooni na, ve tigham loolo, leso iuul zi pa savsaveenj. Ra tila to Erod tauu, ve yesnja tigharaat saveenj, leso tivalupu zi muul. Tisavsav tomania le isov, ra i ighur saawe pazi to timuul tilam, ve isavia loolo pazi.

²¹ Tisanjan le saawe tana ivot, ra timuul tilam to Erod. I inonogh ghi pa nonoghiinja tooni to kinik, ve mboole izala boor to gharatoonj saveenj, ve ipaburigin saveenj tooni. ²² Yes tau tiloonj saveenj tooni na, tiboboob tigne: “Tamtamon eta to taan aliinja tauvene mako. Ewe aat maaron taa!” ²³ Tipapait Erod tauvene ila ila le anjela to Maaron iravu gha itap izi. Pasaa, imin ta Erod isaav pazi gha tipait Maaron, kananj poia. Eemon mako. I iyok pa paitoonj toozi tawe. Tauta moroghoonj tiina ighamu, ve motmoot tighan loolo gha imaat.

²⁴ Saawe tana, Maaron saveenj tooni ilanlaan toman tapiri tiina irau nugh nugh. *

²⁵ Banabas yesuru Saul tighur yambaar to yes Antioka ila yes Yerusalema nimazi le isov, ra tigham Yoan Markus gha yesnja timuul tila pa Antiok. *

Laghoonj tau Paulus ighamu imin maata

* **12:24:** Mbanj 6:7, 19:20; Kol 1:6 * **12:25:** Mbanj 11:29, 12:12

13

Lupuun to Antiok tighur Banabas yesuru Saul pa uraat

¹ Yes Antioka tau titaghon Krisi na, propet siriv tomania paduduŋaŋa siriv tileep ilonj ila lupuun toozi. Ezazi tauvene: Banabas, Simeon tau tiwaato tigde ‘Gabgab’, Lusius to Sairini, Manaen (i yesuru Erod tau igham pooz pa nugh na tumbuun eemon), ve Saul. ² Saawe ee, tingun tauzi pa ghaniin aniiŋ itaghon sunuun ngara. Tisuŋsun ila le Avuvu Patabuyaŋ isaav pazi ighe: “Aghur Banabas yesuru Saul tivot, lesa tigham uraat tau napoi zi pani na.” *

³ Tauvene tingun tauzi pa ghaniin aniiŋ ve tisun, ve tighur nimazi izala yesuru pavozi imin palotiin zi le isov, ra tighur zi tila. *

Saul yesuru Banabas tivotia vaaru poia izi sisi Saiprus

⁴ Ene eez tau Avuvu Patabuyaŋ ighur Banabas ve Saul pa uraat. Yesuru tila tivot nugh Selusia, ve tigham waan ta sewe, ve tiraav tila pa sisi Saiprus.

⁵ Tiloon nugh Salamis, ve tivovotia Maaron aliin pa yes Yuda ila rumei toozi. Yoan Markus ila tomani zi paam to iuul zi.

⁶ Tilaagh taan tila tivot sisi ziige ite, ve tila peria nugh tiina Papos, le tizaa to mur tamazi ee ta sewe, eeza Bar-Yesu. I Yuda tamazi, ve i propet karom ee. *

⁷ Saawe naol, i ipakpaak Sergius Paulus tau inŋinŋin sisi tawe. Sergius Paulus, i neer ngara ee,

* **13:2:** Mbanj 9:15; Ro 10:15; Ep 3:7+; 1Tim 2:7 * **13:3:** Mbanj

6:6, 14:26 * **13:6:** Mbanj 8:9+

ve ighe le iloon Maaron aliiņa. Tauvene imbaan ıla pa Banabas yesuru Saul ighe tilam tooni. ⁸ Bar-Yesu eeza ite Elimas. Eez tane, puughu tauvene: ‘mur tamazi.’ I itovtoova to itatan yesuru saveen toozi, ve ingarum Sergius Paulus loolo, leso ighur ıla to Krisi sov. ⁹ Eemon Avuvu Patabuyaan izeev Saul, tau tiwaat eeza ite Paulus na, ve maata denja pa mur tamazi tawe, ¹⁰ ve isaav ariaan pani ighe: “Ai, yo tane, neer saghati ee! Neer Saghati naatu yo! Yo ughurghur koi pa ngar duduunja naol isov, ve lolom ivon pa ngar sasaghati ve ngar karom naol! Neez o upul ngar tsio tau ukaukau tamtamon ngar toozi ve upapaghau zi pa eez duduunja to Maaron? *

¹¹ Aazne, yo pale ughit katin Maaron niima. I aat igham matam ikumkum, ve irau ughita nugh muul mako. Ve pale uleep tauvene saawe malau rig!” Paulus isaav tauvene, ve rekia mon gabua imin naghavghavu tomania ndoroom ikau mur tamazi tana maata. Tauvene ivalaghlaagh, ve iliil tamtamon siriv to tiuule ighe tikis niima ve tipaduduunja pa eez. ¹² Daaba to sisi tawe ighita gabua tau ivot na, le irur pa saveen to Tiina Yesu tapiri ve ngar tooni imbool. Tauvene ighur ıla kat.

Paulus yesuru Banabas tila nugh Antiok tau igheen ıla taan sirivu to Pisidia

¹³ Paulus tomania zeetņa tigham waan izi nugh Papos, ve tiraav tila tivoon pa taan tiina. Ra tilaagh tila tivot nugh Perga tau igheen ıla taan sirivu to Pampilia. Tileep ta sewe, ve Yoan Markus ipul zi, ve ighau imuul ıla pa Yerusalem. *

* **13:10:** Yo 8:44; 1Yo 3:8

* **13:13:** Mban 13:5, 15:37+

14 Paulus yesuru Banabas tipul nugh Perga, ve tizala pa nugh Antiok tau igheen ila taan sirivu to Pisidia. Tilepleep ta sewe le saawe to umbom patabuyaaj, ra tilonj tila rumei to yes Yuda, ve mbolezi izi tomani zi pa sunjuun. 15 Tamtamon siriv to lupuun tawe tiwaat saveen siriv tau igheen ila tutuun to Mose, ve saveen siriv to yes propet le isov, ra yes nginiinja to lupuun tana tighason ila pa Paulus yesuru Banabas tigde: “Aiyoyam tonvetaz ru, ighe lemim savsaveen siriv to apalot lupuun tane, o asaav.” *

Mos tau Paulus ivotia izi nugh Antiok

16 Paulus iburig iyooz, ve itatan niima pazi, leso tineneen ve tighur talinazi pani. Ra ipaburigin saveen tooni ighe: “Yam zitamoot to Israel, ve yam siriv tau aroron pa Maaron ve ataghon ngar tooni na, aghur talinamim payau poi. 17 Iit Israela, muun Maaron toit isiigh timbuunja timin i tauu le. Ve saawe tau tila tileep timin loom izi Isip, i igham zi timasa timin naol. Ra itotoi tapiri pa yes Isipa, ve igherev timbuunja gha tipul taan to yes Isipa ve tivot. *

18 Yes tileep izi nugh nginaanja irau ndaman tamoot ru (40), ve monmon tizoor Maaron aliinja ve tighamgham ngar tau irau i loolo mako na. Eemon i iyai ghi, ve ingin zi pa laghoon toozi. *

19 Yes tilaagh tila tivot taan sirivu to Kanaan, ra i ireu tamtamon to nugh tintiina liim ve ru, ve igham taan toozi imin yes Israela lezi motot. *

* 13:15: Lu 4:16+
14:33+; Mbo 95:10

* 13:17: Igham 6:6, 12:51
* 13:19: Lo 7:1; Mbo 78:55

* 13:18: Nam

²⁰ Uraat isov tana igham ndaman 450.

“Murei ra, Maaron ighur lezi daaba siriv. Leso tingin zi ve tighagharaat saveen toozi. Ilam ilam le indeen saawe to propet Samuel, ²¹ ra tighason Maaron to igham lezi kinik eta. Tauvene i ighur Kis naatu Saul imin kinik pazi. Saul puughu tooni ivot ila to Benyamin. I ingin Israel irau ndaman tamoot ru (40). *

²² Eemon murei, ra Maaron izughuia izi, ve ighur David aana imin kinik. Maaron ipaesia David ngar tooni ighe:

‘David tau Yesi naatu na, yau naghita wa. Yeiru lolomai eemon. I aat itaghon dudunjai ngar tsiau pa gabua naol isov.’ *

²³ “Aazne, Maaron ighur neer ee imin Uleenja pa yes Israela itaghon saveen mbuaan tooni. I ivot ila sij to David. Eeza Yesu. *

²⁴ Yesu ipaburigin uraat tooni soone, ve neer rughuzaanja Yoan imuun pani, ve ivovotia saveen pa yes Israela ighe tiov tipul ngar toozi sasaghati ileple, ve titoor ngar toozi ila pa Maaron, ve tigham yaa. *

²⁵ Saawe igharau to Yoan ipasov uraat tooni, ra ighason tamtamon ighe: ‘Yam agham ngar aghe yau sei? Aghe yau Mesia tau asasanani na? Mako. Neer ee pale ilam murei payau. I iliiv ghau kat. Uraat sorok imin polaan waar pa zuzuuna to aaghe, ene yau poiag irau to naghama pani mako.’ *

* **13:21:** 1Sam 8:4, 10:17+ * **13:22:** 1Sam 13:14 * **13:23:** Mbo 132:11; Lu 1:32 * **13:24:** Lu 3:3 * **13:25:** Lu 3:16

26 Ra Paulus isaav pazi ighe: “Yam tonjvetaz, yam tau Abaram paaghu tooni, ve yam siriv tau aroron pa Maaron ve ataghon njar tooni na paam, aloonj. Maaron aliija tau isavia eez tau i igham mulin tamtamon, ene injarui ghiit. *

27-28 Eemon eval tiina to Yerusalem tomania yes daaba toozi tighilaal Yesu mako. Onoon, umbom patabuyaanj isov, yes tiwatwaat saveenj to yes propet. Eemon tighilaal saveenj tawe puughu mako. Yesu, i le puughu eta to imaat pani ne mako. Eemon saawe tau yes daaba titiir saveenj tooni, tighita tigde i igham sosor tiina, ve tighason Piladus to iravu imaat. Njar tau tighamu, ene iduduunj pa Maaron aliija tau muunj yes propet tivotia. Saveenj toozi tawe, aazne anoonja ivot wa. *

29 Saveenj tau yes propet tiboode iza to Yesu na, yes Yuda titaghon suvinia le isov, ra tamtamon siriv tighamu izi pa ai pambaroonj, ve tigham paata tila gha tighuru ilonj ila maet puura tau tigharaata pataghaanj imin naal pa mateegha. *

30-31 Eemon Maaron ipaburigini pa mateegh, ve ileep saawe malau rig izi taan. *

Saawe tana, i ila ivotvot to yes tau muunj yesja tilaagh izi Galilaia ve tila tivot Yerusalem na. Zeran tawe, tauta aazne tivovotia saveenj tooni pa eval tiina to iit Israela, ve tipariaanj zi to tighur ila

* **13:26:** Lu 24:47; Mbanj 2:39, 3:26 * **13:27-28:** Mt 27:20+;

Lu 23:18+; Mbanj 3:14+ * **13:29:** Lu 23:50, 24:44; Yo 19:36+

* **13:30-31:** Yesu iburig pa mateegh, ve ileep mbonj tamoot ru izi taan, ra imuul izala pa sambam. Maaron saveenj tooni isavia saawe sanjavul tau Yesu ivot to mbiwa tooni.

tooni. *

³²⁻³³ Yei nilam to nivotia vaaru poia tane payam: Maaron ipaburigin Yesu pa mateegh wa. Tauvene saveen tau muun i imbua tomania timbuunna na, tauta aazne anoonja ivot pa iit tau paaghu toozi ne! Saveenja igheen ila mbounj to sunjuunj tau imin ru. Ighe:

‘Yau natug yo.

Yo tamam ta yau.

Aazne, yau naghur ghom pa uraat.’ † *

³⁴ “Tauvene Yesu, Maaron ipaburigini pa mateegh wa. Ve i irau imuul izila naal gha imbuuz ne mako. Saveenja igheen tauvene:

‘Yau nambu saveen ariaanj tomani gham naghe yau aat naghim lemim gabua popoia ve patabuyaana imin muunj naghim pa David na.’ *

³⁵ Ve saveen ziiiri ite isaav ighe:

‘Yo irau upul besoonja tsio patabuyaanj imbuuz ila naal loolo ne mako.’ *

³⁶ “Iit tawatagh: Saawe tau kinik David ileep izi taan, i ibesbees pa Maaron itaghon Maaron ngar tooni. Ve saawe tau imaat, titavia tomania timja, ve paata imbuuz ila naal loolo. *

³⁷ Eemon neer tau Maaron ipaburigini pa mateegh na, paata imbuuz mako.

* **13:30-31:** Mt 28:6; Mbanj 1:3 † **13:32-33:** Yes Israela matazi ingal tige saawe tau tighur tamtamon eta imin kinik pazi, Maaron ighamu imin i naatu. Tauvene saveen ziiiri tane, puughu tauvene: Saawe tau Yesu iburig pa mateegh, Taama Maaron ighuru imin kinik. * **13:32-33:** Mbo 2:7; Mt 3:17; Hib 5:5 * **13:34:** 2Sam 7:8-16; Is 55:3 * **13:35:** Mbo 16:10 * **13:36:** Mbanj 2:29

38-39 “Tauvene yam tonvetaz, aloon! Yei nivotia saveen payam leso awatagh kat tauvene: Tutuun to Mose, ene irau ipas ghiit kat pa patanani to sosor toit ne mako. Eemon ila Yesu uraat tooni, Maaron ireu sosor toit kat. Tamtamon tisov tau tighur ila to Yesu na, i aat ipas zi pa saghati tapiri, ve ireu sosor toozi isov ilale, leso tiduduun ila Maaron maata.*

40 “Tauvene yam ayamaan gham. Uleenja tau Maaron imbaanjo pait ne, azori sov. Pa ighe agham tauvene, ene aat gabua tau yes propet tisavia na ivot payam. Saveenja igheen tauvene:

41 ‘Yam tamtamon to veleghiin Maaron, aloon!

Patanani tau naghe naghuru iza a tsiam pa saawe tane, ene aat maata ite.

Yam pale aghita, ve arur pani le ngar tsiam imbool, ve alalemim.

Ighe gabua tauvene ivot pa tamtamon siriv ve aloon vaaru mon, ene irau aghur ila mako.’ ”*

42 Paulus isavsaav le isov, ra yesuru Banabas tipul rumei tana, ve tivot tila muuri. Tamtamon to lupuun tana tiburig, ve tighason zi ariaan tige umbom patabuyaan ite ighe ivot, mako yesuru timuul tilam, ve tila saveen tana loolo muul.

43 Lupuun toozi isov gha tamtamon tighawaar, ve eval tiina titaghon Banabas yesuru Paulus gha yesna tila. Siriv, yes Yuda duduun. Ve siriv, ene yes tau titoor zi timin Yuda ve titaghon eez to Maaron. Yesuru tisavsaav tomani zi, ve tipalot zi

* **13:38-39:** Mban 2:38; Ro 3:28; Ga 2:16; 1Yo 2:2 * **13:41:** Hab 1:5

tighe lolozi isaghav Maaron ve tiyooz tunja ila poia tooni. *

⁴⁴ Tilepleep le umbom patabuyaaj ivot muul, ra tamtamon tisov to nugh tana tila tilup zi pa lojaaj saveej to Tiina toit. ⁴⁵ Yes Yuda tighita eval tiina kat timeke tila tighe tilooj Paulus yesuru Banabas saveej toozi. Tauta njuuaaj tiina ivot pazi, ve tiburig gha yesja Paulus tivazorai zi, ve tisik saveej veleghiin naol pani. *

⁴⁶ Eemon Paulus yesuru Banabas tiroi mako. Tiyooz ariaaj, ve tisaav ghazooja pazi tighe: “Maaron ighe ipamuuj gham pa saveej tooni. Eemon yam azori. Ngar tau aghamu na, ene imin agabiiz taumim aghe yam aat irau to agham lepoogh to mataan yaryaare ne mako. Tauvene aazne ve ila, yei aat nipul gham aleplemim, ve nila pa yes tau Yuda mako na. *

⁴⁷ Pasaa, Neer Tiina aavo iyaryaaj payei ighe:

‘Yau naghur ghom umin ghazooja pa yes nugh nugh tau Yuda mako na.

Naghe ulandoov saveej tsiau ila pa tamtamon irau taan ziige ta naol ne, lesa tiwatagh eez to naghm mulin zi.’ ” *

⁴⁸ Yes tau Yuda mako na, tilooj saveej tane, le lolozi poia kat ve tipait Maaron pa saveej tooni tau tilooja na. Ve tamtamon tisov tau Maaron isiigh zi to tigham lepoogh to mataan yaryaare na, yes tighur ila. *

* **13:43:** Mbanj 11:23, 14:22

Mt 21:41; Mbanj 18:6; Ro 1:16

* **13:48:** Ro 8:29+

* **13:45:** 1Tes 2:15+

* **13:46:**

* **13:47:** Is 42:6, 49:6; Lu 2:32

⁴⁹ Tauvene Maaron saveeŋ tooni ilaan toman tapiri irau taan sirivu tawe. ⁵⁰ Eemon yes Yuda tɨngarum yes daaba to nugh tana tomania zilivaa siriv tau ezazi tintiina ve titaghon yes Yuda pa sunjuuŋ toozi na lolozɨ. Tauvene yes daaba ve zilivaa tawe anazi tipazaagh eval tiina, ve tighur pataŋani pa yesuru, ve tinaan zi tighau pa nugh toozi.*

⁵¹ Saawe tau yesuru tipul nugh Antiok, tighatuun aghezi gha ŋgaupup to nugh tana izi. Leso imin ilaal pazi pa sosor toozi. Ra tilaagh tila tivot nugh Ikonium.*

⁵² Ve yes Antioka tau titaghon Yesu na, Avuvu Patabuyaan izeev zi tisov, ve tileep toman lolozɨ poia kat.*

14

Paulus yesuru Banabas tivotia Maaron aliinŋa izi nugh Ikonium

¹ Paulus yesuru Banabas tila tivot nugh Ikonium, ve titaghon ŋgar tau tighamɨ izi Antiok na. Yesuru tilon tila lupuuŋ niia to yes Yuda, ve tivotia mos pazi. Saveeŋ to yesuru iŋgal eval tiina lolozɨ, le titoor ŋgar toozi ve tighur ila to Yesu. Yes Yuda, ve yes Grika paam.

² Eemon yes Yuda tau tighur ila to Kriɨ mako, tɨngarum yes tau Yuda mako na lolozɨ, le titoor ŋgar toozi muul, ve tighur koi pa yes toŋvetaz to Kriɨ.

³ Tauvene Paulus gha Banabas tileep malau izi ta sewe. Yesuru tiroi mako. Tinumeer Maaron, ve

* **13:50:** 2Tim 3:11 * **13:51:** Mt 10:14 * **13:52:** Mbanj 16:34; Ro 14:17; 1Pe 1:8

tiyooz ariiaan pa votiaan Tiina toit vaaru. Ve i tauu ipalot zi, ve igham gabua ngeretazi naol tivot ila yesuru nimazi. Leso itotoi ighe i ileep tomani zi pa uraat toozi, ve tamtamon tighur ila saveen tau tisasavia pa poia tooni. *

⁴ Tamtamon to nugh tawe tighita yesuru uraat toozi, le tivalagh tauzi timin ru. Siriv titaghon yes Yuda, ve siriv tila tivool to mbanjoona ru tana. *

⁵ Ra Yuda siriv, ve yes tau Yuda mako na paam, tomania daaba toozi, tilup ngar toozi imin eemon, ve timbu saveen tige tighur patanani pazi ila eval tiina matazi, ve tirav zi pa maet. *

⁶ Eemon yesuru tiloon saveen to gabua tau tige tigham pazi na. Tauvene tighau tila pa taan sirivu to Likonia, ve tileep izi nugh Listara ve nugh Derbe, ve nugh geegeu siriv tau tighen tigharau. *

⁷ Yesuru tileep izi ta sewe, ve tivovotia vaaru poia pazi.

Paulus igharaat narape ee izi nugh Listara

⁸ Neer narape ee ileep izi nugh Listara. Saawe tau tiina ipooa, aaghe isaghat ve izi. Tauta muun ve ilam, irau ilaagh mako. ⁹ Paulus isavsaav, ve neer tawe ighurghur taliina pa saveen tooni. Paulus imarari, ve ighilaalo ighe ghuruun ila tooni irau to Maaron ighamu tiini poia. *

¹⁰ Tauvene isaav pani toman aliina tiina ighe: “Ai, uburig uyooz.” Ve neer tana rekia mon iburig ve ilaagh.

* **14:3:** Mk 16:20; Mbanj 5:12; 2Kor 12:12 * **14:4:** Lu 12:51+;
 Mbanj 28:25 * **14:5:** 2Tim 3:11 * **14:6:** Mt 10:23 * **14:9:**
 Mt 9:28+

Yes Likonia tigham ngar tigde Paulus gha Banabas, ene yes zimaronja toozi

¹¹ Eval tiina tighita Paulus igham gabua ngereeta tana, le tiboob ila tauzi aliñazi Likonia tigde: “Wai, aazne, maaron toit ru, tauta titoor zi timin tamtamon, ve tizilam toit.” *

¹² Ra tiwaat Banabas tigde i Zeus, ve tiwaat Paulus tigde i Ermes. Pasaa, yes tighita Paulus imunmuun pa savsaveen. *

¹³ Rumei to maaron toozi Zeus iyozyooz igharau ataman to didiin ariaanja tau ilivutin nugh tawe. Tauvene neer to watoonrau tau ingin rumei tawe, yesja eval tiina tigham makau siriv, ve tipabood zi pa manman, ra tila pa ataman tana, tigde tirav makau tawe timin watoonrau pa yesuru.

¹⁴ Tipaesia ngar tau tigde tighamu na pa yesuru le ireu lolozi. Tauvene tirangat nonoghiinja toozi, ve tilaan tilonj tila eval tiina tawe lolozi, ¹⁵ ve tiboob tigde: “Wai, zeran tsiei, agham vene sov! Yeiru tamtamon to taan raraate imin yam. Yei nilam to nivotia vaaru poia payam. Aloonj. Maaron tsiam tau abesbees pazi na, irau tigham anoonja eta mako. Aghur murimim pazi, ve apul zi tileplez. Ve aghur ila to Maaron tau ileep maata yaryaare irau saawe. Pa i ta ighur sambam, taan, ve te, tomania gabua naol isov tau tileep ve tighen ila na. *

* **14:11:** Mbanj 28:6 * **14:12:** Yes Grika lezi maaron katini. Yes tighur ila tauvene: Zeus, i maaron tau eeza tiina kat iliiv zimaronja toozi tisov. Ve Ermes, i maaron ite tau igham Zeus aavo, ve ivovotia aliinja pa tamtamon. * **14:15:** Gnp 1:1+; Mbanj 10:26; 1Kor 8:4

16 Muun, saawe to timbuunja ve ilam, i ipul nugh nugh titaghon tauzi ngar toozi. *

17 Eemon Maaron tauu, i iyoon pait mako. Saawe isov, i ighamgham poghani ghiit, lesu tawatagh taghe i ilepleep. I ighamgham lemim uman tau itap sambam ve izilam, ve ighamgham mariri ivotvot. Lesu lemim aniin katini, ve lolomim poia.”

*

18 Yesuru tisavia saveen tane imin ngalsekiin eval tiina tawe. Pasaa, ngar toozi iyaryaan tighe le tigham watoonrau eta pa yesuru.

19 Yesuru tilepleep izi ta sewe, ve Yuda siriv to Ikonium ve Antiok tilam ve tinjarum eval tiina lolozi. Tauvene titoor ngar toozi, ve tighur koi pa Paulus, ve tiburig tiravu pa maet. Ra tisasaara ivot ila nugh ziige, ve tipuli izi. Pasaa, tighe pa imaat wa. *

20 Eemon zeetja siriv tau titaghon Yesu na, tila tiyooz livutini, ve i iburig, ve yesja timuul tilon tila pa nughei. Mbon le nughizau, ra yesuru Banabas tiburig, ve tila pa nugh Derbe.

Paulus ve Banabas timuul tila pa nugh Antiok tau igheen taan sirivu to Siria

21 Paulus yesuru Banabas tila tivot nugh Derbe, ve tivotia vaaru poia izi ta sewe, le tamtamon katini timin Yesu ziineera ve titaghon ngar tooni. Ra tipamuul laghoon toozi, ve timuul tila pa nugh Listara, tila Ikonium, ve tila tivot nugh Antiok to Pisidia. 22 Yesuru tipapalot Yesu ziineera, ve avozi iyaryaan pazi tighe tikis ghuruun ila toozi tunja.

* **14:16:** Mban 17:30 * **14:17:** Mbo 147:8; Mt 5:45; Mban 17:27

* **14:19:** 2Kor 4:9, 11:25; Ga 6:17; 2Tim 3:11

Ve tisavsaav pazi tighē: “Iit aat tabaad patanani naol, o tataghon pooz to Maaron ve talonj tala nugh tooni sambam.” *

²³ Yesuru tighur tamtamon siriv timin nginiina pa lupuunj to Krisi irau nugh nugh. Saawe tau tighur zi, tingun tauzi pa ghaniin aniin ve tisonj, mako tighur zi tila Tiina Yesu tau tighur ila tooni na niima, leso ingin zi. *

²⁴ Ra yesuru tilaagh timbut taan sirivu to Pisidia, ve tila peria taan sirivu to Pampilia.

²⁵ Tivotia Maaron aliina izi nugh Perga, ve malmalizi tizila nugh Atalia. ²⁶ Yesuru tigham waan ta sewe, ve tiraav timuul tila pa Antiok tau igheen izi taan sirivu to Siria. Pasaa, saawe tau tighē tipaburigin laghoonj toozi, yes tonvetaz to Krisi tau tileep izi ta sewe, tauta tighur yesuru tila Maaron niima, leso ighur poia tooni iza toozi ve ipalot zi pa uraat. Tauvene saawe tau tipasov uraat tana, mako yesuru timuul tila pa ghitoonj zi. *

²⁷ Yesuru tila tivot Antiok, ra tipoi lupuunj to Krisi tilam tilup zi, ve tipaes pazi pa uraat naol isov tau Maaron igham zi tivot ila nimazi. Ve tipaes pazi tighē Maaron igharaat eez pa yes tau Yuda mako na, tauta tighur ila to Yesu wa. ²⁸ Ra yesuru tileep malau rig tomania zetazna izi Antiok.

15

Yuda siriv tighē Yesu ziŋeera tau Yuda mako na aat titaghon tutuunj to Mose

* **14:22:** Mt 7:14, 16:24; 1Tes 3:3+; 2Tim 3:12

* **14:23:** Mbanj

6:6, 13:1+; Tit 1:5 * **14:26:** Mbanj 13:1+

¹ Murei ra, Yuda siriv tau tighur ila to Yesu na tileep Yudea, ve tila pa nugh Antiok, ve tisaav pa yes tonvetaz to Krisi tigde: “Aloonj. Yam tau Yuda mako na, aat tirav waromim itaghon tutuunj to Mose. Ighes mako, ene aat Maaron irau igham mulin gham mako.” *

² Paulus yesuru Banabas tiloonj saveenj toozi, le ireu lolozi. Tauvene yesja zeran tawe tivazorai zi. Tisavsav le mako, ra timbu saveenj tigde timbaanj Paulus yesuru Banabas tomania zetazja siriv to Antiok tizala Yerusalem. Leso tighita yes mbanjoona siriv tomania yes nginiija ta sewe, ve tigharaat saveenj tane.

³ Tauvene lupuunj to Krisi tigharaat eez pazi, ve tighur zi tila. Tilaghlaagh taghon eez tau imbut taan sirivu to Ponisia ve Samaria, ve tipapaes pa tonvetaz to Krisi taghon nugh nugh tigde: Yes tau Yuda mako na, katini titoor ngar toozi ve tighur ila to Yesu wa. Zetazja tiloonj paesiinj toozi, le igham zi lolozi poia kat. ⁴ Tila tivot Yerusalem, ve lupuunj to Krisi tomania nginiija toozi ve yes mbanjoona tigham zi toman lolozi poia. Ra Paulus yesuru Banabas tipaes pazi pa uraat naol isov tau Maaron igham zi tivot ila nimazi.

⁵ Eemon zeran tutuunja siriv tau tighur ila to Yesu na, tiloonj saveenj toozi, ve tiburig gha tisaav tigde: “Yes tau Yuda mako na, isaav ighe tighur ila to Yesu, iit aat tarav warozi ve tapariaanj zi to titaghon tutuunj to Mose, o poia.”

Lupuunj tiina ivot izi Yerusalem, ve tivasavo zi pa yes tau Yuda mako na

* 15:1: Gnp 17:10-14

⁶ Tauvene yes mbanjoona ve nginiina tilup zi, ve titiir saveen to zeran tutuuna tawe. ⁷ Tivasavo zi ila ila, ra Petrus aana iburig ve isaav pazi ighe: “Yam tonvetaz, yam awatagh. Muun, Maaron isi-igh ghau ila sosomim, ve imbaan ghau nala to yes tau Yuda mako na. Tauta tiloon vaaru poia ila yau avog, ve tighur ila. *

⁸ Maaron iwatagh iit tamtamon loloon. Tauta igham Avuvu Patabuyaana pazi raraate imin papa-zoge igham pait. Leso igham ghiit taghilaal taghe i loolo pazi ve ighe igham zi timin i le paam. ⁹ I igham ngar ite ite mako. Itaghon ngar raraate mon pa iit, ve yes paam. Pasaa, i igham lolozu ingalaan itaghon ghuruun ila toozi. *

¹⁰ Tauvene puughu mindai ta aazne yam aghe atoov Maaron ve azoor ngar tooni? Ighe aghur patanani izaa to yes tau Yuda mako ve titaghon Yesu, ene pale agham Maaron aate yavyav. Aghita. Saawe to timbuunna ve ilam aazne, iit Yuda irau tataghon dudunai Mose tutuun tooni ne mako. Pasaa, ene ipatanan. *

¹¹ Yam awatagh: Iit taghur ila taghe: Poia to Tiina toit Yesu, tauta imin eez pait to Maaron igham mulin ghiit. Ve i ighur eez raraate mon pazi paam. Eez ite paam mako.” *

¹² Petrus isavsaav le isov, ve eval tiina to lupuun tana tineneen mon. Ra tighur taliqazi pa Banabas yesuru Paulus, ve anazi tipaesia gabua ngeretazi ve uraat tintiina tau Maaron igham zi tivot ila nimazi

* **15:7:** Mbanj 10:9-44 * **15:9:** Mbanj 10:43+; Ro 10:9+ * **15:10:** Lu 11:46; Ga 3:10 * **15:11:** Ro 3:24, 28; Ga 2:16; Ep 2:5+; Tit 3:4

na, saawe tau tileep ila yes tau Yuda mako na SOSOZI.

¹³ Tisavsaav le isov, ra Yakobus aana iburig, ve isaav pa eval tiina ighe: “Yam tonvetaz, aghur taliŋamim, pa anag naghe nasaav. ¹⁴ Maaron ighe iyau tamtamon to nugh nugh timin le, leso igham eeza ivot imin tiina. Ngarig gha Simon ipaesia saawe imin maata tau Maaron igham tamtamon siriv tau Yuda mako na timin le. ¹⁵ Ve yes propet tisavia ngar raraate mon. Pasaa, Maaron aliina siriv tau tiboode na isaav ighe:

¹⁶ ‘Aazne, saghatiŋ tiina ivot pa ziiri waaro to David ve ivaghamun zi.

Yes timin ruum tau tireu mbirisaini.

Eemon murei, yau aat nauul zi, leso tiyooz ariaan ve tigham pooz muul. *

¹⁷ Ve tamtamon siriv to nugh nugh tauvene paam. Yau aat napaburigin yes tau nasiigh zi timin leg na, leso tizuari zi to tiwatagh katin ghau.

¹⁸ Saveen tane, ene Maaron aliina. I tauu ivotia alok wa.’ ” *

¹⁹ Ra Yakobus iseen saveen tooni muul ighe: “Yau naghita naghe yes tau Yuda mako, ve aazne titoor ngar toozi gha tighur ila to Maaron na, iit irau tagham pataŋani pazi mako. ²⁰ Tauvene iit aat tabood lezi rau eta, ve tasaav ghazooŋa pazi pa saa tutuun tau pale titaghon zi. Tutuun tauvene: Aniiŋ tau tipakur maaron karomŋa pani, ene yes tighani sov. Pa aniiŋ tauvene pale igham zi tisaghat ila Maaron maata. Ve tighur boog sov. Ve

* **15:16:** Amos 9:11+ * **15:18:** Is 45:21

tighun gabua siŋizi sov. Ve tighan gabua mizazi tau siŋ ighengheen ila na sov.*

²¹ Tauvene yes aat titaghon tutuun tane. Leso tireu yes Yuda lolozi sov. Pa muun ve ilam, tivovotia tutuun to Mose irau nugh nugh. Ve umbom patabuyaana isov, tiwatwaat tutuun tawe ila yes Yuda rumei toozi lolozi.”

Rau tau tiboode pa yes tau Yuda mako na

²² Yes mbanjoona tomania yes nginiina ve zetazna tisov tau tileep ilon ila lupuun to Krisi na, tiloon Yakobus saveen tooni, ve tighita tige poia to titaghooni. Tauvene tighur tamtamon toozi ru tau timuunmuun pa lupuun toozi na, Yudas tau eeza ite Barsabas, ve Silas. Leso tigham naghozi, ve yesna Paulus gha Banabas tila pa Antiok. ²³ Ve tibood saveen tawe ila rau, ve tighuru ila toozi, lesa tikisi ve tila tomania. Rau toozi isaav tauvene:

“Yei mbanjoona ve nginiina, nibood rau tane ilat pa yam tonvetaz to Krisi tau Yuda mako na, tau alep izi Antiok, ve taan sirivu to Siria ve Silisia na. Yam tonvetaz, aaz poia tsiei ilat pa yam asov.

²⁴ “Yei niloon tige tamtamon tsiei siriv tilat, ve tisavia saveen siriv tau igham lolomim ipatana ve agham ngar naol. Eemon yei nimbaan zeran tawe mako. Yes titaghon tauzi ngar toozi ve tilat.

²⁵ Tauvene yei nilup ghei, ve nivasavo ghei pa patana tane le nivot pa ngar eemon. Tauta nighur tamtamon tsiei siriv tigham naghomai, ve nimbaan zi tilat. Ve Banabas yesuru Paulus, tamtamon toit ru tau lolomai ighen toozi kat

* **15:20:** Gnp 9:4; Igham 20:3+; 1Kor 6:18, 8:7, 10:14+; Ga 5:19+; Ep 5:3; 1Tes 4:3

na, tilat tomani zi paam. ²⁶ Yesuru tiroi mako, ve tirei tauzi pa uraat to votiaan Tiina toit Yesu Krisi vaaru. ²⁷ Tauvene yei nighur rau tane ila to Yudas gha Silas ve nimbaan zi tilat. Ve yesuru pale tipaesia alinamai ila avozi paam. ²⁸ Avuvu Patabuyaana igham pooz payei le nighita nighe irau nighur tutuun naol payam mako. Pa aat igham pataani payam. Tauvene yei aat nisavia gabua tintiina mon tau nighe ataghon zi. ²⁹ Aniin tau tipakur maaron karomna pani na, aghani sov. Ve aghun gabua sinizi sov. Ve aghur boog sov. Ve aghan gabua mizazi tau sin ighengheen ila na sov. Isaav ighe aleep soghan pa ngar tauvene, ene aat ataghon ngar poia. Saveen tsiei ilam imuul ta sene. Yam aleep toman lolomim poia.” *

Yes Antioka lolozi poia pa rau to yes mbanjoona

³⁰ Yes paan tau timbaan zi na, tila tivot Antiok, ra tipoi Krisi zineera tilam tilup zi, ve tighur rau tana ila toozi. ³¹ Yes Antioka tiwaato, ve tiloon saveen palotiin tau igheen ila rau loolo na, le lolozi poia kat. ³² Yudas gha Silas, yesuru propet paam. Tauvene tisavia saveen popoia naol pa yes Antioka to tipalot ghuruun ila toozi. Leso tiyooz ariiaan. ³³⁻³⁴ Yesuru tileep tomani zi malau rig, ra yes Antioka tighur zi tila toman lolozi poia, ve timuul tila pa zetazna tau timbaan zi tilam. *

* **15:29:** Syg 2:14, 20 * **15:33-34:** Baibol munganazi siriv lezi saveen siriv paam tau igheen ila ziiri tane. Saveen tauvene: “Eemon Silas igham ngar ighe poia to ileep tomani zi rig muul. Tauvene izi ileep ve Yudas zigani imuul izala pa Yerusalem.”

³⁵ Paulus yesuru Banabas tileep malau rig izi Antiok. Ve yesŋa zeran siriv tivovotia saveeŋ to Tiina toit pa tamtamon, ve tipaghazoŋai zi pani.

Laghoon tau Paulus ighamu imin ru

Paulus ve Banabas tivapuli zi

³⁶ Saawe siriv ilam ila, ra Paulus isaav pa Banabas ighe: “Aiyo, ituru tataghon agheen niia muul, ve tataghon nugh tau tavotia saveeŋ to Tiina toit Yesu pazi na. Ve tagig yes toŋvetaz ve taghita lepoogh toozi mindai.” ³⁷ Saawe tana, Banabas ighe igham Yoan Markus gha yesŋa tila. *

³⁸ Eemon Paulus loolo pa Markus ilaagh tomani zi muul mako. Pasaa muuŋ, saawe tau tilaagh pa uraat to votiaan vaaru poia, Yoan Markus ila tomani zi paam. Eemon i ipul zi tileep izi Pampilia, ve ighau pazi, ve yesŋa tilaagh pa uraat muul mako. *

³⁹ Yesuru tivazorai zi ila ila le tivapuli zi. Tauvene Banabas igham Yoan Markus, gha yesuru tigham waan, ve tiraav tila pa sisi Saiprus. ⁴⁰ Ve Paulus igham Silas ighe yesuru tilaagh. Tauvene yes toŋvetaz to Krisi tighur yesuru tila Tiina toit niima, ve tisun Maaron to ighur poia tooni izaa toozi. ⁴¹ Ra Paulus yesuru Silas tiburig gha tilaagh irau taan sirivu to Siria ve Silisia, ve Paulus ipalot lupuuŋ to Krisi irau nugh nugh izi ta sewe.

16

Paulus igham Timoti lesu yesŋa tilaagh

* **15:37:** Mbanj 13:5 * **15:38:** Mbanj 13:13; 2Tim 4:11

¹ Paulus yesuru Silas tila tivot nugh Derbe, ra tisakia tila pa nugh Listara. Nugh tawe, ñeer ee tau itaghon Yesu ilepleep, eeza Timoti. Tiina, i Yuda tinazi tau ighur ila to Yesu. Ve taama, i Grik tamazi. *

² Yes tonvetaz to Krisi tau tileep nugh Listara ve nugh Ikonium na, tisov tipait Timoti vaaru tighe i ñeer poia. ³ Tauvene Paulus ighe ighamu, leso yesña tilaagh pa uraat. Eemon Yuda katini tau tileep ta sewe, tiwatagh tighe Timoti taama, i Grik tamazi. Tauvene Paulus irav Timoti waaro. Leso yes Yuda tiyau avozi pani sov. *

⁴ Ra Paulus gha Silas, ve Timoti tipaburigin laghoon toozi muul, ve tilaagh irau nugh nugh, ve tipaesia yes mbanjoonja ve nginiinja tau tileep izi Yerusalem na alinjazi pazi. Leso tiwatagh saa ngar tau daaba tawe tighuru pa yes tau Yuda mako na to titaghoni. *

⁵ Saveen toozi ipalot lupuun to Krisi irau nugh nugh le ghuruun ila toozi iyaryaan le iyaryaan kat. Ve saawe isov tamtamon paghpaaghu tilonlon tila tomani zi. Tauta lupuun to Krisi tivot timin tintiina irau nugh nugh.

Maaron ipoi Paulus ighe ila ivotia vaaru poia izi Masedonia

⁶ Paulus tomania zeetnja tilaagh timbut taan sirivu to Galesia ve Pirigia. Eemon tila pa taan sirivu to Asia mako. Pasaa, Avuvu Patabuyaanj ipoon zi ighe tivotia Maaron aliinja ta sewe sov.

⁷ Tilaagh tila tivot taan to Misia ziige, ve tighe

* **16:1:** 1Kor 4:17, 16:10; Pil 2:19+ * **16:3:** 1Kor 9:20 * **16:4:** Mbanj 15:28+

tivool pa taan sirivu to Bitinia. Eemon Yesu Avuvu *

iyok pazi to tila nugh tawe mako. ⁸ Tauvene tilaagh timbut taan sirivu to Misia, ve tizila tivot nugh Troas tau igheen izi nari.

⁹ Ve mbon, tandaghiin ee ivot pa Paulus. I ighita neer ee to Masedonia iyozyooz, ve ipoipoi ighe: “Paulus, uraav ulam uvoool pa Masedonia, leso uul ghei.” ¹⁰ Paulus ighita tandaghiin tana le isov, ve rekia mon yeja niburig, ve niil eez to nila nivool pa taan sirivu to Masedonia. †

Pasaa, nighilaal gabua tau ivot na nighe: Ene Maaron tauu ipoi ghei to nivotia vaaru poia pa tamtamon ta sewe.

Paulus tomania zeetja tila tivot nugh Pilipai

¹¹ Tauvene yei nizaa waan izi Troas, ve nighau duduun nila nivot sisi Samotres. Mbon le nughizau, ra niraav muul nila, le niloon nugh Neapolis tau igheen taan tiina. ¹² Ra nilaagh taan, ve nilon nila pa Pilipai. Pilipai, ene nugh tiina ee to taan sirivu to Masedonia. Yes Roma tipaburigin nugh tawe ila taan to yes Grika. ‡

* **16:7:** Saveen ziiri katini tisavia Maaron Avuvu Patabuyaan. Eemon saveen ziiri tane iwaat Avuvu Patabuyaan ighe ‘Yesu Avuvu’. † **16:10:** Saveen ‘yeja’ itotoi ighe saawe tau Paulus tomania zeetja tileep izi Troas, Lukas ila tomani zi ve yesja tila. Masedonia, ene igheen taan sirivu to Yurop ziige. Tauvene saawe tau Paulus ila ivotia Maaron aliinja pazi, ene saawe imin maata tau mbanjoona to Krisi tivotia vaaru poia izi Yurop. ‡ **16:12:** Nugh Pilipai igheen izi taan to yes Grika, eemon titaghon yes Roma gabuazi ve tutuun toozi. Ve zaaba munghanazi katini to Rom tau tisov pa uraat na tizi tileep ta sewe.

Nila nivot ta sewe, ve nileep irau mbonj siriv le isov, ¹³ ra umbom patabuyaanj to Maaron ivot.

Tauvene nipul nugh tiina, ve nivot nila yaa tau igheen ila nugh ziige. Pasaa, yei nigham ngar nighe yes Yuda aat tiluplup zi pa sunjuunj izi ta sewe. Le onoon. Nila peria, ve nighita zilivaa siriv tilup zi ta sewe. Ra mbolemaj izi, ve yeja nivasavo ghei pa Maaron aliija. ¹⁴ Yes zilivaa tawe, toozi ee, eeza Lidia. I to nugh Tiatira. Ve irauraukol pa uuli popoiazij tau ngeretazij imin dagilgil. I Yuda tinazij mako. Eemon ighur ila to Maaron ve itaghon eez tooni, ve tomania yes Yuda tiluplup zi pa sunjuunj. Saawe tau i iloonj Paulus saveenj tooni, Maaron igham uraat ila loolo le ighur ila Paulus aliija. *

¹⁵ Tauvene i tauu ve yes tau tileep tomania ila ruum tooni na, tigham yaa. Le isov, ra isaav payei tauvene: “Isaav ighe yam aghit ghau aghe yau naghur ila kat to Tiina toit, o alam ruum tsiau, ve aleep tomani ghau.” I isaav ariaanj payei, tauvene niloonj aliija, ve nila ruum tooni. *

Yes Pilipai tighur Paulus yesuru Silas tilonj tila ruum to yavyavuunj

¹⁶ Saawe ee, yei nighe nimuul nila pa sunjuunj niia tau igheen yaa ziige na. Nila le nizaa to besoonja livaa ee. I, avuvu saghati izeeva le irau ivotia gabua siriv tau murei pale tivot. Tauvene yes daaba tooni tiyauyau maet tiina ila uraat tooni tawe. ¹⁷ I ighita yeja Paulus, tauvene itaghon ghei ve iboboob ighe: “Ai, aghita. Zeran tane, yes besoonja to Maaron Tiina Tau Iliiv Zimaronja

* **16:14:** Lu 24:45; Yo 6:44; Mbanj 13:48 * **16:15:** Mbanj 16:33, 18:8; 1Kor 1:16

Tisov. Yes tilam to tivotia eez to Maaron igham mulin gham, ve aleep poi.” *

¹⁸ Mataaz ta naol ne, i inoknok bobaan mon le Paulus tiini imum pani kat. Tauta saawe ee, itoor ghi, ve iyaon avuvu saghati tawe igha: “Ai! Yau nasaav ariaan payo ila Yesu Krisi eeza: Upul livaa tana, ve ughau ula!” Saawe duduun tana, avuvu saghati ipul livaa tawe, ve ighau. *

¹⁹ Tauvene yes daaba to livaa tana atezi yavyav kat pa Paulus yesuru Silas. Pasaa, yes tighita eez toozi to ghamuun maet, ene ivool wa. Tauvene tikis yesuru, ve tisasaar zi tila maaran, lesu tipayooz zi ila yes pooza to nugh naghozi. *

²⁰ Tigham zi tila, ve tipayooz zi ila yes pooza naghozi, ra tungal saveen pazi tigha: “Zeran tane, yes Yuda. Tilam nugh toit, ve tigherev patanani naol ivotvot ila nugh loolo. *

²¹ Ve yesuru timalaan pa tutuun toit Roma paam. Pasaa, tipapazaagh tamtamon to tigham ngar siriv tau tutuun toit ingalsekin ghiit pani na.”

²² Eval tiina tau tilam pa lupuun na, tiloon saveen toozi, le anazi atezi yavyav pa yesuru, ve tungal saveen pazi paam. Tauvene yes pooza to nugh tisaav gha tirangat nonoghiinja to yesuru, ve timbaan tamtamon siriv to tigham toon ve tilos zi. ²³ Tilos katin zi le naghozi isaghat. Ra tigham zi tila, ve tisik zi tilon tila ruum to yavyavuun loolo, ve tisaav ariaan pa neer tau ingin ruum to yavyavuun na, tigha i aat ingin poghani zi. *

* **16:17:** Mk 1:24, 34

* **16:18:** Mk 16:17; Mbanj 5:16, 8:7

* **16:19:** Mbanj 19:25+

* **16:20:** Mbanj 17:6

* **16:23:** 2Kor

6:5, 11:23+; 1Tes 2:2

24 Neer tawe iloon alinjazi, ve isasaar zi tilonj tila ruum loolo tau igheen loonja kat. Ra ikapis aghezi pa ai tintiina ru, ve ikau ai tawe matazi le tunja.

25 Paulus gha Silas tilepleep le mbonj anoonja. Yesuru tisunjon ve timboubou mbounj to tipakur Maaron, ve zeran siriv tau tileep tomani zi ilonj ila ruum to yavyavuunj loolo na, tighurghur talinjazi pazi. *

26 Malau mako ve yogyoog tiina kat itok taan le ivatoki ruum to yavyavuunj tawe, ve ataman tisov tikaak. Ve sen tau tikau tamtamon pani na, tisov timazugh tizi. *

27 Neer tau injin ruum to yavyavuunj na, irur iburig, ve maata ila le ighita ataman tisov tikaak. Tauvene ighe pa tamtamon tisov tighawaar tila wa. Tauta ipas mbuzaagh tooni, ve ighe ighurum tauu imaat. 28 Eemon rekia mon Paulus iboob ila pani ighe: “Ai, ukaria taum sov! Yei nisov nilepleep ne. Tsiei eta ighau mako.”

29 Neer tana iboob ila, ve tigham yaryaroonja ilam. Ra ilaan ilonj ila toman roinj tiina, ve itap izi Paulus gha Silas aghezi puughu. 30 Ra iburig muul ve igham zi tivot tila muuri, ve ighason zi ighe: “Zolman tsiau ru, pale naghama mindai, lesa Maaron igham mulin ghau ve naleep poi?” *

31 Yesuru tiyol alinja tige: “Ughur ila to Tiina tsiei Yesu, lesa igham mulin ghom tomania yes tau tileep ila ruum tsio na paam.” *

32 Ra neer tana iyau yes tau tileep tomania ila ruum tooni na tilam, ve Paulus yesuru Silas tivotia

* 16:25: Mbo 119:62; Ep 5:19 * 16:26: Mbanj 5:19, 12:7+

* 16:30: Lu 3:10, 10:25; Mbanj 2:37 * 16:31: Yo 3:16, 36, 6:47

saveeŋ to Tiina toit pazi. ³³ Mboŋ eemon tana, i igham yesuru tila, ve imin mbotozi. Le isov, ra rekia mon i tomania yes tau tileep tomania ila ruum tooni na, tisov tigham yaa. *

³⁴ Ra igham Paulus gha Silas tiloŋ tila ruum tooni loolo, ve igham lezi aniin. I loolo poia kat. Pasaa, yesŋa zeetŋa tisov tau tileep tomania ila ruum tooni na, tighur ila to Maaron wa. *

³⁵ Nughizau, ra yes pooza to nugh timbaaŋ tataliin siriv tila to ŋeer tau ingin ruum to yavyavuunŋ na, ve tisaav pani tigha: “Zeran ru tana, upul zi tila.”

³⁶ Tauvene i ila ve ipaesia yes tataliin aliŋazi pa Paulus igha: “Yes pooza timbaaŋ ghau nalam tigha yau napul gham ala. Tauvene yamru avot ala toman lolomim poia.”

³⁷ Eemon Paulus isaav pani igha: “Mako kat! Yes pooza to nugh tane timalaan pa tutuun to Rom wa. Pasaa, yeiru tamtamon to Rom. Eemon yes titiir poghania saveeŋ tsiei mako, ve tilos sorokin ghei ila eval tiina matazi, ve tizeev ghei niloŋ nila ruum to yavyavuunŋ loolo. Ve aazne, tigha tiziir ghei imin yonŋaan? Ene aat mako! Tauzi tilam, o tigham ghei nivot nila.”

³⁸ Tauvene yes tataliin timuul tila, ve tipaesia Paulus aliŋa pa yes pooza. Saawe tau yes pooza tiloŋ tigha Paulus gha Silas, yesuru tamtamon to Rom, roinŋ tiina igham zi. ³⁹ Tauvene tauzi tila, ve tirav yesuru atezi, ve tighason zi to tipul sosor

* **16:33:** Mbanj 2:41, 16:15, 18:8 * **16:34:** Mbanj 13:52; Ro 14:17; 1Pe 1:8

toozi. Ra tigham zi tivot tila muuri, ve tighason zi to tipul nugh toozi ve tila.

⁴⁰ Yesuru tipul ruum to yavyavuun, ve tinjarui Lidia ruum tooni tila. Tila peria ve yesnja yes tonvetaz to Krisi tilup zi ta sewe. Ve tipalot zi pa saveen siriv le isov, ra tipul zi ve tila.

17

Paulus gha Silas tivotia vaaru poia izi nugh Tesalonika

¹ Paulus tomania zeetnja tilaagh tila tivot nugh Ampipolis, ve tisakia muul tila nugh Apolonia. Ra tilaagh muul tila tivot nugh Tesalonika. Nugh tawe, yes Yuda rumei toozi ee ighengheen.

² Paulus yesnja yes Yuda tiluplup zi pa sunjuun itaghon ngar tau monmon ighamghamu na. Tauvene umbom patabuyaen tol, i ila rumei tawe, ve yesnja yes Yuda tivasavo zi pa Maaron aliinja tau ti-boode na. ³ I ipaghazonjai zi pa Maaron aliinja, leso tighilaal tigue: Mesia, i aat iyamaan yavyavuun ve imaat, mako iburig pa mateegh itaghon Maaron ngar tooni. Ve isaav pazi muul ighe: “Yesu tau navovotia vaaru payam ne, i ta Mesia.” *

⁴ Yuda siriv tiloon saveen tane, ve tighur ila. Tauvene tila tilup zi tomania Paulus gha Silas ve titaghon eez to Yesu. Ve yes mon mako. Yes Grika eval tau matazi ingalngal Maaron ve yesnja yes Yuda tiluplup zi pa sunjuun, tomania zilivaa siriv tau ezazi tintiina na, yes paam tighur ila to Yesu, ve titaghon eez tooni.

* **17:3:** Lu 24:26, 46; Mbanj 3:18, 18:28

⁵ Eemon yes Yuda tighita eval tiina titaghon Paulus gha Silas, le ireu lolozi. Tauvene tila maaran, ve tiyau zeran sasaghati siriv tau tirourou sorok taghon maaran na, ve yesŋa zeran tawe tilup zi, ve tipazaagh eval tiina to nugh, leso tipaburigin malmal iŋarui yesuru. Malau mako, oroor tiina iburig, ve tikeet ŋarui Yason ruum tooni tila. Tila tivot ruum, ra tirav valaghin ataman, ve tilonj tila tiil Paulus yesuru Silas. Tighe tigham zi tivot, leso tipayooz zi ila eval tiina naghozi. *

⁶⁻⁷ Eemon tiil zi le mako. Tauvene tigham Yason tomania tonvetaz siriv to Krisi, ve tisasaar zi tila, ve tipayooz zi ila yes daaba to nugh naghozi. Ra tiboob tigde: “Zeran tau Yason igham zi tila tileep ruum tooni na, tilaghlaagh irau taan isov, ve tipapazaagh tamtamon pa ghamuunj ŋgar sasaghati naol. Ve aazne, tilam tivot toit wa. Zeran tawe tizoroor kinik tiina to Rom tutuunj tooni. Pasaa, tisavsaav tigde kinik ite ilepleep, eeza Yesu.” *

⁸ Eval tiina tomania yes daaba to nugh tiloonj saveenj tane, le ireu lolozi ve oroor tiina iburig muul. ⁹ Tauvene yes daaba to nugh tisaav pa Yason tomania zeetŋa tigde tighur maet siriv izi tikisi. Leso tiroi, ve tigham pataŋani ivot pa nugh muul sov. Maet tawe, ŋgara tauvene: Isaav ighe tigham sosor ite paam muul mako, ene murei pale tigham mulini. Yason tomania zeetŋa tighur maet tana ila toozi le isov, ra yes daaba tipul zi tila.

Paulus gha Silas tivotia mos izi nugh Berea

* **17:5:** 1Tes 2:16+

* **17:6-7:** Lu 23:2; Yo 19:12; Mbanj 16:20

¹⁰ Paulus gha Silas tileep le mbon̄ izi, ra yes ton̄vetaz to Krisi rekia mon tipaghau zi tila pa nugh Berea. Tila tivot ta sewe, ve tin̄arui yes Yuda rumei toozi. ¹¹ Yes Yuda to nugh Berea, n̄gar toozi poia kat. Tiliiv yes Yuda to nugh Tesalonika. Pasaa, tighē le tiloon̄ katin saveen̄ tau Paulus ivovotia na. Ve mataaz ta naol ne, tigagabiiz saveen̄ tooni tomania Maaron aliin̄a tau tiboode na. Leso ti-watagh: Saveen̄ tooni iduduun̄, ma mako? *

¹² Tauta Yuda katini titoor n̄gar toozi ve tighur ila to Yesu. Ve Grika katini tau ezazi tintiina na, tighur ila paam. Yes zilivaa ve zitamoot.

¹³ Eemon yes Yuda to nugh Tesalonika tiloon̄ Paulus vaaru tighē i ivovotia Maaron aliin̄a izi nugh Berea. Tauvene tiburig gha titaghon zi tila, ve tikau eval tiina to Berea n̄gar toozi, ve tipaza-agh zi, lesu tigham malmal pani. ¹⁴ Tauvene yes ton̄vetaz to Krisi rekia mon tin̄guaaz Paulus tizila nari, ve Silas yesuru Timoti mon tileep izi Berea. ¹⁵ Yes tau tin̄guaaz Paulus na, tin̄gini le tila tivot nugh tiina Atens. *

Tila peria, ra Paulus isaav pazi ighe: “Amuul ala, mako asaav pa Silas ve Timoti rekia mon titaghon ghau tilam.” Tauvene tipul Atens ve timuul tila.

Paulus ileep izi nugh Atens

¹⁶ Saawe tau Paulus isan̄an Silas ve Timoti izi Atens, ilaghlaagh taghon nugh loolo, ve ighita nugh ivon pa maaron karom̄n̄a anunuzi, le irau loolo mako kat. ¹⁷ Tauvene ilon̄lon̄ ila yes Yuda rumei toozi, ve yesn̄a yes Yuda ve zeran siriv

* **17:11:** Yo 5:39 * **17:15:** Nugh Atens eeza tiina pasaa, zeran n̄gara katini tilepleep izi sewe.

tau matazi ingalngal Maaron ve yesnja yes Yuda tiluplup zi pa sunjuun na, tivavasavo zi pa Maaron aliinja. Ve mataaz ta naol ne, i ilala maaran aate, ve isavsaav tomania yes tau tileep izi sewe.

¹⁸ Tamtamon katini to nugh Atens titaghon ngar to yes zeran ngara to muun. Lupuun toozi tintiina ru, tiwaat ezazi tighe ‘Epikurian’, ve ‘Stoik.’ † Epikurian siriv tomania Stoik siriv tiloon Paulus ivotia Yesu vaaru ve burigiin to yes mateegha, ve tiburig gha yesnja Paulus tiparזור pa savsaveen. Tamtamon toozi siriv tisaav tighe: “Aghita. Borau tawe iyau aavo pasaa? Saveen tau isasavia we, i tauu ighazoon pani mako. Aat ighamu ila zeran siriv avozi.”

Ve tamtamon siriv tisaav tighe: “Mako. I aat isavia nugh siriv maaron toozi, lesa igherev ghiit to tataghon zi.”

¹⁹ Tauvene tighamu tila pa lupuun tiina to yes daaba tau tiluplup zi izala nugh mbua Areopagus na, ve tisaav pani tighe: “Laak, ngar paaghu tau yo uvovotia pa tamtamon na, usavia payei gha niloonja. Lesa nighazoon pani. ²⁰ Pa ngar tau yo usasavia na, yei niloonja imin paaghu payei.

† **17:18:** Yes Epikurian titaghon ngar to neer ee, eeza Epikurus. Ve yes Stoik titaghon ngar to neer ite, eeza Zeno. Saawe tau Paulus ileep izi Atens, Epikurus ve Zeno timaat alok wa, irau ndaman 300 ma vene. Eemon tamtamon titataghon ngar toozi soone. Epikurus isavsaav pa eez to tamtamon tileep toman tintinisi. Ngar tooni tauvene: Saa ngar tau ighe igham ghom lolom poia, ene utaghoni tauvene le irau isoonj matin ghom. Ula pa naghom mon. Ve Zeno ngar tooni, ene vene: Iit aat tatatan tauun, tail eez to ngar toit ivot imin tiina, ve tauun tagham uraat. Ve saa gabua tau ighe ivot pait, poia ma saghati, ene tayok pani mon. Tagham ngar naol sov. Lesa taleep poi.

Tauvene nighe usavia muul. Leso nighazoon kat pa puughu.” ²¹ Tisaav tauvene pasaa, tamtamon tisov to Atens tomania yes loomba tau tila tileep tomani zi na, lezi uraat ite paam mako. Tilepleep ve tighurghur talinjazi pa saa ngar ma saveen paaghu tau tamtamon tisavia ivot, mako tivasavo zi pani.

Mos tau Paulus ivotia izi nugh Atens

²² Paulus iburig ve iyooz ila bodbodaan to lupuun tiina tawe, ve isaav pazi ighe: “Yam zitamoot to Atens, yau nawatagh: Yam azuari gham aghe le abees kat pa zimaronja tsiam. Ngar tsiam, yau naghita wa. ²³ Pasaa, saawe tau nalaagh taghon nugh tane loolo, yau naghita maaron tsiam maata maata anunuzi tau asunjon pazi na. Ve naghita artaal ee tau tibood saveen izala paavo tauvene: ‘Artaal tane, ene to maaron tau yei niwataghi mako.’ Laak, Maaron tau yam awataghi mako ve abesbees pani na, tauta aazne naghe navotia payam.

²⁴ “I Maaron tau ighur sambam ve taan, tomania gabua naol isov. Ve i Tiina tau injin sambam ve taan. I ileep ilonj ila rumei to sunjuun tau tamtamon tirau zi pa nimazi ne mako. *

²⁵ Ve imbool pa gabua eta gha lesa iit tamtamon taghur nimaan pa uleenj ne mako. I tauu ta igham iit tasov leen avuvuun, ve igham ghiit taleep mataan yaryaare. Ve gabua toit naol isov, ene i ta igham pait. *

* **17:24:** Gnp 1:1+; Mbanj 7:48+ * **17:25:** Mbo 50:10+

²⁶ “Muun̄ geeg, i ighur tamtamon eemon. Ve igham iit nughmariŋ to taan tasov tavot ila to tamtamon eemon tawe, ve ighur ghiit taleep irau taan isov. I tauu ighur tamtamon tileep irau nugh toz toz, ve ighur ŋgat pa taan toozi. Ve ighur saawe pazi pa lepoogh izi nugh toz toz. *

²⁷ “Maaron igham tauvene, leso ipaburigin ghiit to tazuari ghiit pa ilooŋni. Onoon, i ileep malau pait mako. Eemon saawe tau tailo, iit tamin yes matazi kumkuuma tau titaŋtaan̄ pa gabua.

²⁸ Lepoogh toit ve saa ŋgar tau ighe taghamu, ene i ileep tomani ghiit. Ve i ta ighur ghiit tauvene. Ene imin tamtamon tsiam ŋgara ee isavia ila mboun̄ tooni alok wa. Ighē: ‘Iit tasov Maaron natŋa.’

²⁹ “Aiyo, isaav ighe Maaron natŋa iit, ene irau tagham ŋgar taghe Maaron, i imin gabua anunuzi tau tamtamon tigharaat zi pa gol, silva, ve maet siriv ne mako. Pasaa, Maaron tauu, i imin maaron karomŋa anunuzi tau tamtamon tigharaat zi pa nimazi itaghon tauzi ŋgar toozi ne mako. *

³⁰ “Muun̄, tamtamon matazi dodoli, ve tikankaan pa Maaron. Tauta loolo kurun̄ja pazi, ve maata ila pa sosor toozi geeg mako. Eemon aazne, i isaav ariaan̄ pa nughmariŋ ighe tipul ŋgar toozi sasaghati ileple, ve titoor ŋgar toozi ila pani. *

³¹ Pasaa, i tauu ighur saawe ee pataghaan̄ wa. Saawe tana ighe ivot, i pale igabiiz tamtamon tisov to taan, ve ighur atuya pazi. Ve gabizoon̄ tooni, ene pale iduduun̄ mon. Uraat to gabizoon̄

* **17:26:** Gnp 2:7 * **17:29:** Is 40:18+; Ro 1:22+; Mban̄ 19:26

* **17:30:** Lu 24:47; Mban̄ 14:16; Ro 3:25; Tit 2:11+

tawe, i ipuli ila neer ee niima. Neer tawe, Maaron ipaburigini pa mateegh wa. Leso iit tawatagh taghe i eeza pa uraat tana.” *

³² Saawe tau tiloon Paulus aavo ila pa burigiin to Yesu pa mateegh, tamtamon toozi siriv tiin, ve tisik saveen veleghiin pani. Eemon siriv ti-saav pani tigde: “Yei nighe saawe ite paam, o usavia saveen tane payei gha niloonja muul.”

³³ Paulus isavsaav tomani zi le isov, ra ipul zi ve ila. ³⁴ Tamtamon siriv tau tiloon saveen tooni na, tighur ila to Krisi ve tila tomania. Toozi ee, eeza Dionisis. Yes daaba tau tiluplup zi izala nugh mbua Areopagus na, i toozi ee. Ve livaa ee, eeza Damaris, i paam tomania tamtamon siriv tighur ila.

18

Paulus igham uraat izi nugh tiina Korin

¹ Murei ra, Paulus ipul Atens, ve ilaagh ila ivot nugh tiina Korin. ² Ilepleep ta sewe, ve ighita Yuda ee, eeza Akwila. I to taan sirivu to Pontus, ve azaawa eeza Prisila. Muun, yesuru tileep izi taan sirivu to Itali. Eemon Klodias, tau kinik to Rom na, isaav ariaan ighe yes Yuda tau tileep izi nugh tiina Rom na, tisov tipul Rom, ve tighau tila. Tauta Akwila yesuru Prisila tighau tila ve ngarig tileep izi Korin. *

³ Paulus ila ileep tomani zi, ve yesna tilup zi pa uraat. Pasaa, uraat tau yesuru tighamghamu na, ene i uraat tooni paam. Yes tighagharaat ngai uuli

* **17:31:** Mbo 9:8, 96:13; Yo 5:22; Mbanj 10:42 * **18:2:** Ro 16:3; 1Kor 16:19; 2Tim 4:19

ve tisaii, leso tamtamon tidaado imin balbaal (o haus sel). *

⁴ Umbom patabuyaaj ta naol ne, Paulus ilonjon ila yes Yuda rumei toozi, ve yesja yes Yuda ve yes Grika tivasavo zi pa Maaron aliinja. Pasaa, i ighe ipaburigin ngar toozi, leso tighur ila to Yesu.

⁵ Murei ra, Silas gha Timoti tipul Masedonia, ve anazi tilam tivot Korin. Tila peria to Paulus, ra i ipul uraat tooni to sain ngai uuli, ve ileep ila uraat to votiaaj mos mon. I ivovotia Yesu saveej tooni pa yes Yuda, leso tighur ila tigde Yesu, i Mesia. ⁶ Eemon yes tizoroor Paulus aliinja, ve tisik saveej veleghiinj naol pani. Tauvene itir ngaupup izi pa nonoghiinja tooni imin ilaal pazi pa sosor toozi, ve isaav pazi ighe: “Poia. Isaav ighe Maaron ighur atuya payam gha alalemim, ene puughu to taumim. Yau mako. Aazne ve ila, yau aat napul gham aleep, ve nala navotia Maaron aliinja pa yes tau Yuda mako na.” *

⁷ Tauvene Paulus ipul zi, ve ila ileep tomania neer ee, eeza Titius Yastus. I Yuda mako. Eemon ighur ila to Maaron ve itaghon eez tooni, ve yesja yes Yuda tiluplup zi pa sunuuj. Ruum tooni igharau yes Yuda rumei toozi. ⁸ Daaba tau injin rumei toozi tawe, eeza Krispus. Yesja yes tau tilepleep tomania ila ruum tooni na, tisov tighur ila to Tiina toit. Ve yes mon mako. Eval tiina to Korin tau tiloon Paulus saveej tooni na, tighur ila to Yesu, ve tigham yaa. *

⁹ Mbonj ee, Tiina toit Yesu ivot to Paulus ila

* **18:3:** Mbanj 20:34; 1Kor 4:12 * **18:6:** Ezek 33:7+; Mt 10:14+;
Mbanj 13:46 * **18:8:** 1Kor 1:14

tandaghiin, ve isaav pani ighe: “Uroi ve uneneen sov. Uyooz ariiaan pa savsaveen.” *

¹⁰ Eta irau ivaghamun ghom mako. Pasaa, yau naleep tomani ghom. Ve tamtamon tsiau katini tileep izi nugh tane.” *

¹¹ Tauta Paulus ileep izi nugh Korin irau ndaman ee ve kaiyo liim ve ee, ve ipapaghazonai zi pa Maaron aliina.

¹² Ighamgham tauvene le saawe tau Galio ingin taan sirivu to Akaia, ra yes Yuda tilup lolozi imin eemon ve tighe tingalsekin Paulus pa savsaveen tau i ivovotia na. Tauvene tighamu tila nugh to gharatoon saveen, ve tipayooze ila Galio naagho, ¹³ ve tisaav pani tighe: “Neer tane ikaukau tamtamon ngar toozi, ve ighegherev zi ighe tisu pa Maaron itaghon eez paaghu tau isapir pa tutuun na.”

¹⁴ Paulus ighe isavia saveen tooni, eemon Galio rekia mon irav motin saveen tooni, ve isaav pa yes Yuda ighe: “Yam Yuda aloon. Imin ta neer tane imalaan pa tutuun ve igham sosor tiina eta, kanaan irau naloon gham, ve itina tagharaat saveen tsiam. ¹⁵ Eemon aazne, yamna avazorai gham pa savsaveen siriv, ve tamtamon ezazi, ve yam taumim tutuun tsiam. Irau nagharaat saveen tauvene ne mako. Taumim ala ve agharaata.” *

¹⁶ Ra iziir zi tivot tila muuri. ¹⁷ Eval tiina tighit zi, ve tiburig tikis Sostenes izi nugh to gharatoon saveen tawe, ve tiravu pataghaan. Pasaa, i ta ingin

* **18:9:** Mban 23:11 * **18:10:** Mt 28:20; Yo 10:16 * **18:15:** Yo 18:31; Mban 23:29, 25:18+

yes Yuda to Korin rumei toozi. Eval tiina tiravu le naagho isaghat, eemon Galio maata ila pazi mako.

Paulus ighe imuul ila pa nugh Antiok

¹⁸ Paulus ileep malau rig izi nugh Korin tomania yes tonvetaz to Krisi, ra itak nimazi, ve ipul zi. Prisila gha Akwila tila tomania, le tila tivot nugh Kenkria. Tila tivot ta sewe, ra tikot Paulus daaba raua imin ilaal pa saveen tau i imbua tomania Maaron na. *

Ra yes tol tigham waan tigde tiraav tila pa taan sirivu to Siria. *

¹⁹⁻²¹ Tiraav tila le tiloon nugh Epesus, ra Paulus ipul yesuru tizi tileep ta sewe. I malmali ilon ila yes Yuda rumei toozi, ve yesja Yuda tivasavo zi pa Maaron aliina. Yes Yuda tinguruuta tigde i ileep tomani zi rig. Eemon i ipasul. Tauvene itak nimazi, ve isaav pazi tauvene: “Isaav ighe Maaron loolo ighe namuul, ene aat namuul nalam.” Isaav pazi tauvene, ra ila izaa waan gha tipul Epesus ve tivot, ve tiraav tila pa Sisarea. *

²² Paulus iraa ila iloon nugh Sisarea, ve malmali izala pa Yerusalem. Ila igig lupuun to Krisi ta sewe, ve yesja tisavsaav rig, ra izila pa nugh Antiok.

Laghoon tau Paulus ighamu imin tol

* **18:18:** Ngar tau Paulus ighamu na, ngara tauvene: I ighe ighur tauu imin Maaron le kat pa saawe siriv. Saawe tana, i irau ighun vaen mako, ve tikot daaba mako le saawe tana isov. Mako tikot daaba muul, ve i igham watoonrau pa Maaron. Ngar tane saveenja igheen ila Namba 6:1-21. * **18:18:** Nam 6:1-21; Mban 21:24

* **18:19-21:** Yems 4:15

²³ Paulus ileep malau rig izi Antiok, ra ipaburigin laghoonj muul, ve ilaagh irau taan sirivu to Galesia ve Pirigia, ve ipapalot Yesu ziñeera.

Apolos ivotia Maaron aliiña izi Epesus ve Korin

²⁴ Saawe tana, Yuda ee ila ivot nugh Epesus, eeza Apolos. I to nugh tiina Aleksandria. I le ngar tiina, ve i ñeer to savsaveen. Ve iwatagh katin Maaron aliiña tau tiboode na. ²⁵⁻²⁶ I, tipaghazonjaini pa eez to Tiina toit Yesu wa. Ve loolo ipazaagha pa votiaan Maaron aliiña. Saawe tau ipaghazonjai tamtamon pa Maaron aliiña, saveen tooni isapir mako. Iduduun mon. I ilonlonj ila yes Yuda rumei toozi, ve iyooz ariaan pa votiaan Yesu vaaru. Iroi mako. Eemon eez tau Yoan itaghoni pa ghamuun yaa, tane mon ta i iwataghi. Eez ite paam mako. Tauvene saawe tau Prisilagha Akwila tiloonja, tighamu tila ruum toozi, ve tipaghazonjaini pa eez to Maaron, leso ighazonj panikat.

²⁷ Murei ra, Apolos maata ingal ighe irav ila ivool taan sirivu to Akaia, leso ivotia mos izi ta sewe paam. Yes tonvetaz to Krisi tau tileep izi Epesus na, tipaloti pa ngar tau i ighe ighamu na, ve tibood rau ee ila pa yes to Akaia tau titaghon Yesu na. Leso saawe tau Apolos ila peria toozi, tighamu toman lolozipoa. Tauvene Apolos ila ivot Akaia, ve iuul katin yes tau Maaron igham zi tighur ila to Krisi itaghon tauu poia tooni.*

²⁸ Pasaa, i iyooz ariaan kat pa savsaveen, ve ivovotia Maaron aliiña tau tiboode na puughu pa tam-

* **18:27:** 1Kor 3:6

tamon, lesu tighilaal tigde Yesu, i Mesia. Tauta i itatan saveeŋ to yes Yuda ila eval tiina matazi. *

19

Paulus ivotia Maaron aliija izi nugh Epesus

¹ Saawe tau Apolos ilepleep izi nugh Korin, Paulus ilaghlaagh irau nugh nugh tau tighen taghon loloz. Le isov, ra indari izila pa nugh Epesus. Ilepleep ta sewe, ve indeeŋ Yesu ziŋeera siriv. ² Ighason zi ighe: “Mindai, saawe tau aghur ila to Yesu, yam agham Avuvu Patabuyaana, ma mako?”

Yes tiyol aliija tigde: “Mako. Avuvu Patabuyaana tau yo usavia na, yei nilooŋ saveeŋa rigta mako.” *

³ Paulus ilooŋ saveeŋ tane, ve ighason zi muul: “Ighe tauvene, agham yaa itaghon saa eez?”

Yes tiyol aliija tigde: “Yei nigham yaa itaghon eez to ŋeer rughuzaana Yoan.” *

⁴ Paulus isaav pazi muul ighe: “Muun, Yoan irughuuz tamtamon imin ilaal pazi ighe yes titoor ŋgar toozi ve tigde titaghon ŋgar paaghu. Ve i isaav pazi ighe tighur ila to ŋeer ite tau pale ilam murei pani na. Ene Yesu.” *

⁵ Yes tilooŋ saveeŋ tane, ve rekia mon tigham yaa ila Tiina toit Yesu eeza. ⁶ Ra Paulus ighur niima izala pavozi, ve Avuvu Patabuyaana izeev zi tisov. Tauvene tisaav ila nugh nugh aliŋazi, ve tivotia Maaron aliija imin propet. *

* **18:28:** Mbanj 9:22 * **19:2:** Yo 7:39; Mbanj 2:38 * **19:3:** Mk 1:4; Mbanj 1:5 * **19:4:** Mt 3:11+ * **19:6:** Mbanj 2:4, 8:17, 10:44+

⁷ Zitamoot tawe irau saŋavul ve ru.

⁸ Paulus ileep izi Epesus irau kaiyo tol. Saawe tana, i ilonlon ila yes Yuda rumei toozi, ve yesŋa tivavasavo zi pa pooz to Maaron. I iroi mako. Aavo iyaryaan, ve isavsaav ghazooŋa pazi. Pa ighe igham zi titoor ŋgar toozi ve tighur ila to Yesu. ⁹ Eemon tamtamon toozi siriv, ŋgar toozi iyaryaan kat. Tauta tighur ila mako, ve tisik saveeŋ sasaghati naol pa eez to Tiina toit Yesu ila eval tiina matazi. Tauvene Paulus ipul zi, ve igham Yesu ziŋeera tila soghan. Ve mataaz ta naol ne, yesŋa tiluplup zi ila Tiranus ruum tooni to ghamuun ŋgar, ve tivasavo zi pa Maaron aliija. *

¹⁰ Paulus itaghon ŋgar tana irau ndaman ru. Tauta saveeŋ to Tiina toit ilaan irau tamtamon tisov to taan sirivu to Asia gha tilooŋa. Yes Yuda ve Grika paam. *

Yuda siriv titoova to tiziir avuvu sasaghati pa tamtamon ila Yesu eeza

¹¹ Maaron itotoi tapiri ve igham gabua ŋgeretazi maata maata tivotvot ila Paulus niima. Gabua tawe, tamtamon tighit zi imin paaghu pazi. *

¹² Isaav ighe tigham gabua rigta to Paulus imin uuli tooni to musuun punita, ma uuli tooni siriv, ve tighuru izala yes moroghoonja pavozi, ene rekia mon tinizi poia. Ve yes tau avuvu sasaghati tizevzeev zi na paam, avuvu sasaghati tipul zi, ve tighau tila. *

¹³ Yuda siriv tilaghlaagh irau nugh nugh ve tizirziir avuvu sasaghati pa tamtamon imin lezi

* **19:9:** 2Kor 6:14+ * **19:10:** Kol 1:6 * **19:11:** Mbanj 14:3;
2Kor 12:12 * **19:12:** Mk 16:17+; Mbanj 5:15-16

uraat. Yes paam titoova to tiwaat Yesu eeza, leso ipalot zi pa uraat tau tighamghamu na. Tisavsaav pa avuvu sasaghati tigde: “Yesu tau Paulus ivovotia vaaru na, yau nayooz ila i eeza, ve nasaav ariiaan payam naghe aghau ala!” ¹⁴ Yuda ee, i daaba to watoonrau. Eeza Skeva. Natnja zitamoot liim ve ru tighamgham tauvene paam.

¹⁵ Saawe ee, titoova to tiziir avuvu saghati pa neer ee. Eemon avuvu saghati tawe iyol alinjazi ighe: “Yesu, yau nawataghi. Ve Paulus, nalonloon vaaru. Eemon yam savunugha?” ¹⁶ Ra neer tau avuvu saghati izeeva na, iyaat izala pavozi, ve irav zi le naghozi isaghat kat, ve ivaragatin nonoghiinja toozi paam. Pasaa, tapiri iliiv zi tisov. Tauvene tipul ruum loolo, ve tilaan kambanmbanji, ve tivot tila muuri.

¹⁷ Gabua tana vaaru ilaan irau tamtamon tisov to nugh Epesus. Yes Yuda ve yes Grika paam. Tauvene tamtamon tisov tirur ve roinj tiina igham zi, ve tipait Tiina toit Yesu eeza. ¹⁸ Ve tamtamon katini tau tighur ila to Yesu na, tilam ve tivotia ngar sasaghati naol tau muun tighamgham zi na, ila eval tiina matazi. ¹⁹ Yes mura katini tilam paam tomania rau toozi tau var ma mur saveenja ighenaar ila na, ve tindou zi ila eval tiina naghozi, ve tighur yav pazi. Rau tawe, tinin atuyazi le irau maet silva 50,000. *

²⁰ Tauta saveen to Tiina toit Yesu ilaan irau nugh toman tapiri tiina.

²¹ Gabua naol tana tivot le isov, ra Avuvu Patabuyaanj ipaburigin Paulus gha loolo ighur

* **19:19:** Maet silva 50,000, ene irau wan milion Kina ma vene.

ighe ilaagh irau taan sirivu to Masedonia ve Akaia. Le isov, o ila pa Yerusalem. Ve maata ingal paam ighe: “Yau nala Yerusalem, mako nala naghita Rom. [Leso navotia vaaru poia izi ta sewe.]” *

²² Tauvene imbaan uleena tooni ru, Timoti gha Erastus, timuun tila Masedonia. Ve i tauu ileep rig izi Asia.

Malmal tiina ivot izi Epesus

²³ Saawe tana, eez to Tiina toit Yesu imin pu-ughu pa malmal tiina ivot izi nugh Epesus. *

²⁴ Neer ee ilepleep. Eeza Demetrius. I neer to gharatoon gabua pa silva. Yesna uraata tooni tighagharaat gabua geegeu katini tau ghitozazi imin Artemis †

rumei tooni, leso tamtamon tighol zi. Uraat toozi tawe, yes tighamgham maet tiina pani. ²⁵ Tauvene Demetrius ipoi uraata tooni, tomania tamtamon siriv tau uraat toozi eemon na, tilam tilup zi, ve isaav pazi ighe: “Aloonj. Yam awatagh: Uraat toit tane, iit taghamgham katin maet pani. ²⁶ Paulus tawe, yam taumim aghita ve aloonja wa. I isavsaav ighe zimaronja anunuzi tau tamtamon tigharaat zi pa nimazi na, ene Maaron tauu mako. Tauta ikau eval tiina to Epesus ngar toozi, le tighur murizi pa zimaronja toit wa. Ve iit Epesus mon mako. Eval tiina tau tileep irau taan isov to Asia na, tighur ila saveen tooni wa. *

²⁷ Tauvene tayamaan ghiit. Malau mako pale taleep ila patajani tiina loolo. Pasaa, neer tawe

* **19:21:** Ro 1:11, 15:23 * **19:23:** 2Kor 1:8+ † **19:24:** Artemis, i maaron livaa to yes Epesus. Rumei tooni ene tiina kat. * **19:26:** Mbo 115:4; Mbanj 17:29; Syg 9:20

imot, ve isaav. ³⁴ Eemon saawe tau tighilaalo tighe i Yuda, tilup avozi, ve tipaburigin bobaan muul tighe: “Maaron to iit Epesus, ene Artemis. I eeza tiina kat!” Tinoknok bobaan tauvene le malau rig.

³⁵ Ra daaba to Epesus tau ingin uraat to bodeen rau na, iburig injaar zi ighe tineneen, ve isaav pazi ighe: “Yam nugh tauja to Epesus, aloon. Tamtamon tisov tiwatagh tighe iit to nugh Epesus tangin maaron Artemis tau eeza tiina na rumei tooni, tomania anunu tau itap sambam ve izilam taan.

³⁶ Tamtamon eta irau izoor ghiit pa gabua tane mako. Tauvene lolomim ipazaagh gham rekia sov. Atemim izi, ve agabiiz poghania saveen.

³⁷ Zeran tau yam agham zi tilam ne, yes tium gabua eta ila rumei toit loolo mako. Ve tisik saveen veleghiin eta pa maaron livaa toit Artemis mako.

³⁸ Isaav ighe Demitrius tomania uraata tooni lezi saveen pa neer eta, nugh to gharatoon saveen ighengheen. Yes irau tila ta sewe, ve yesja yes daaba tigharaat saveen toozi. ³⁹ Ve isaav ighe yam lemim saveen siriv paam to asavia, na ataghon tutuun toit, ve aghuru ila lupuun tiina to nugh niima. Leso tigharaata. ⁴⁰ Aazne, iit tasosor wa. Tauvene yau naroi. Isaav ighe gavman to Rom tiloon oroor tane vaaru, ene pale tighita tighe iit tagham malmal, ve tighur atuya pait. Isaav ighe tighason ghiit pa oroor tane puughu, pale tasaav mindai? Pasaa, oroor tane le puughu mako.” ⁴¹ I isavsaav le isov, ra iziir zi gha tighau tila.

20

Paulus ila ighita yes Masedonia ve yes Grika

¹ Oroor tiina tawe isov, ra Paulus ipoi Yesu ziñeera tilam tilup zi, ve ipalot zi pa savsaveen siriv. Le isov, ra itak nimazi, ve iburig ila pa taan sirivu to Masedonia. ² Ilaagh irau taan sirivu tawe, ve ipapalot yes tau titaghon Yesu na, le ila ivot taan sirivu to yes Grika. *

³ I ileep izi ta sewe irau kaiyo tol le isov, ra igham ngar ighe igham waan, ve iravv ila pa taan sirivu to Siria. Eemon tipaes pani tighe yes Yuda timbu saveen pa ravuunni imaat. Tauvene itoor ngar tooni, ve imuul ila pa Masedonia. *

⁴ Tamtamon siriv tau yesna Paulus tila na, ene Pirus naatu Sopater, i to nugh Berea, Aristarkus gha Sekundus, yesuru to nugh Tesalonika, Gaius i to nugh Derbe, Timoti, ve Tikikus gha Tropimus, yesuru to taan sirivu to Asia. ⁵ Yes timuun tila, ve tisaan ghei izi nugh Troas. ⁶ Yei siriv nileep izi nugh Pilipai le saawe to lupuun tiina to ghaniin mberet tau le yis mako na isov. Ra nizila nari, ve nizaa waan nila. Nileep te paavo irau mbon liim, ra niloon nugh Troas, ve nindeen zeetmaina liim ve ru ta sewe. Yena nileep izi Troas irau mbon liim ve ru.

Paulus ipaburigin Yutikus pa mateegh

⁷⁻⁸ Saawe imin maata (o Sande) to wik tana, yena zeetmaina to nugh Troas nilup ghei pa ghanghaniin ve sunuun ilon ila ruum ee loolo tau igheen saana. Yes titun lam katini, ve yesna Paulus tivasavo zi pa Maaron aliina ila le mbon anoonja. Pasaa, Paulus ighe nughizau, mako ipul zi, ve ila.

* **20:2:** Taan sirivu to yes Grika, eeza ite Akaia. * **20:3:** 2Kor 11:26; 1Tes 2:15+

⁹ Neer paaghu ee ilepleep tomani zi, eeza Yutikus. Mboole izala sooso to ghamuun yaghur (windua), ve ighurghur taliina pa saveen. Paulus ikis saveen malau kat. Saawe tau isavsaav, Yutikus igheen le loolo iveegh ve itap pa muuri. Itap ta ruum loolo imin tol pani we ve izila taan. Tauvene rekia mon tilaan tizila tigde tighamu. Tisuru izaa, eemon imaat wa. ¹⁰ Tauvene Paulus izila taan, itugh ghi izi ve isaghav Yutikus, ra isaav pazi ighe: “Lolomim ipatanan sov. I iburig wa. Imaat mako.” *

¹¹ Paulus imuul izala pa ruum loolo tau tilepleep pani na, ve iteev mberet gha yesna tighan. Isavsaav tomani zi le nughizau, ra ipul zi, ve iburig gha ila. *

¹² Ve neer paaghu tau imaat ve iburig muul na, tighamu tila pa ruum tooni toman lolozu poia kat.

Paulus ipul nugh Troas ve ila pa Miletus

¹³ Paulus ighe ilaagh taan. Tauvene isaav payei ighe nigham waan, ve nimuun nila nisanani izi nugh Asos le ilam ivot, o yena niraav muul. Tauta yei nigham waan gha niraav, ve i ilaagh taan. ¹⁴ I ilam peria Asos, ra yena niraav nila niloon nugh Mitilene. ¹⁵ Nivot muul nila ve nighaughau le mbon nughizau, ra matamai iloon pa sisi Kios ve malmalimai. Nighaughau nila le mbon nughizau muul, ra nila nivool sisi tiina Samos. Nipot ta sewe le nughizau, ra malmalimai nila niloon taan tiina, ve nipot izi nugh Miletus. ¹⁶ Paulus ipasul ighe rekia ila ivot Yerusalem. Leso ighita lupuun tiina to Pentekos izi sewe. Tauvene loolo pa waan ilon

* **20:10:** 2King 4:32+; Mban 9:40 * **20:11:** Lu 22:19

ila nugh Epesus mako. Pasaa, iroi: Pale tikisi ileep malau muul izi taan sirivu to Asia.

Paulus ipalot yes nginiina to Epesus

¹⁷ Tauvene Paulus ileep izi nugh Miletus, ve imbaan ila pa lupuun to Krisi tau tileep izi Epesus na ighe nginiina toozi tilam pani. ¹⁸ Yes tila tivot, ve i isaav pazi ighe: “Aloon. Saawe imin maata kat tau yau nalam navot taan sirivu to Asia, ve ilam le aazne, ngar tau yau naghhamghamu ila sosomim na, yam aghita ve awataghi wa. ¹⁹ Saawe naol, lolog ipatanan ve natan. Pasaa, yes Yuda monmon tiliil eez to titatan ghau, ve tighurghur patanani naol izazaa tsiau. Eemon yau nayooz ariaan pa badoon patanani, ve naghham ngar pa ezag mako, ve nabesbees pa Tiina toit Yesu. ²⁰ Ve yam awatagh: Saveen isov tau irau iuul gham, tauta nasavia payam le isov. Yau naroi mako, ve nangooz saveen eta payam mako. Yau nasavsaav ghazoonja payam ila eval tiina matazi, ve ilala ruum tsiam tsiam paam. *

²¹ Saawe isov, nasavsaav ariaan pa yes Yuda ve yes Grika paam naghe tipul ngar toozi sasaghati ileple, titoor ngar toozi ila pa Maaron, ve tighur ila to Tiina toit Yesu. *

²² “Eemon aazne, Avuvu Patabuyaan ipaburigin ghau ighe yau aat nala pa Yerusalem. Ve nakankan: Pale saa gabua ivot payau izi sewe? ²³ Eemon nugh isov tau nala pazi ne, Avuvu Patabuyaan isavsaav payau ighe ruum to

* **20:20:** Mbo 40:10 * **20:21:** Lu 24:47

yavyavuun tomania patanani naol tisanan ghau ta sewe. *

²⁴ Ve yau naghita naghe lepoghag to taan, ene gabua tiina mako. Isaav ighe tirav ghau namaat, ene kaut sorok. Eemon yau aat nataghon dudunai eez tau Tiina toit Yesu Krisi ighuru payau na le napasovu. Ve uraat tau i tauu ighuru ila nimag na paam, naghe napasovu le isov kat. Uraat tauvene: Yau aat nayooz ariiaan ve napariaan saveen to vaaru poia. Leso tamtamon tiwatagh eez tau poia to Maaron izazaa to iit tamtamon sasaghatiin. *

²⁵ “Aghita. Muun, yau naleep ila sosomim, ve navovotia pooz to Maaron payam. Ve aazne, nawatagh naghe tsiam eta aat irau ighita naghog muul mako. ²⁶ Tauvene aazne, nasaav ghazoonja payam tauvene: Mbon Murei, isaav ighe tsiam eta ilale, ene yau sosor tsiau mako. *

²⁷ Pasaa, yau naroron payam mako, ve nanngooz saveen eta payam mako. Ngar isov tau Maaron ighe yam ataghoni, tauta nasavia payam le isov.

²⁸ “Matamim imomoos poi pa taumim, ve angin poghania sipsip tisov to Maaron tau Avuvu Patabuyaana ighur gham amin nginiin pazi na. Yam irau angin poghania lupuun to Maaron. Pa sinj to tauu Naatu imalin pazi, ve i igham zi timin le wa. *

²⁹ Yau nawatagh. Saawe tau napul gham ve nala, ene pale zeran karomja siriv tilam tizool gham, ve

* **20:23:** Mbanj 9:16 * **20:24:** 2Kor 4:1; Ga 1:1; Pil 1:20; 2Tim 4:7; Syg 12:11 * **20:26:** Ezek 3:17+; Mbanj 18:6 * **20:28:** 1Tim 4:16; 1Pe 1:18, 5:2+; Syg 5:9

tivaghamunia Maaron sipsip tooni imin ngavuun sagsagna. *

³⁰ Ve yam taumim paam, tamtamon tsiam siriv pale tiburig, ve tikau Maaron saveen tooni. Leso tigherev yam tau aazne ataghon Yesu na gha apul saveen onoon ileple, ve ataghon zi pa ngar toozi. *

³¹ Tauvene ayamaan gham pazi. Matamim ingal ndaman tol tau itinja talepleep na. Saawe tana, yau napul gham pa savsaveen mako. Mbon ve mataaz, yau napaduduun gham asov. Lolog igheen tsiam kat, tauta nasavsaav payam toman tanjiiz. *

³² “Aazne, naghur gham ala Maaron tauu niima, ve nasaav payam naghe: Matamim ingal Maaron aliinja tau isavia poia tooni tau izazaa to iit tamtamon sasaghatiin na. Pa saveen tawe irau ipalot gham, ve iseen ngar tsiam. Leso yamja zeran tooni patabuyaana asov agham gabua popoia naol isov tau Maaron ighe igham pait. *

³³ Saawe tau itinja talepleep, lolog ighaar pa silva, gol, ma nonoghiinja to tamtamon eta mako. *

³⁴ Ve taumim awatagh: Taug nimag iyaryaan pa ghamuun uraat. Tauta nauul taug, ve zetagna tau tilepleep tomani ghau na paam. *

³⁵ Naghah tauvene to natotoi gham pa eez to tagham uraat ariaan. Leso leen gabua to tauul yes tau tirau uraat mako na. Iit irau mataan ingal Tiina toit Yesu aliinja tau isaav tauvene: ‘Yes tau

* **20:29:** Mt 7:15; Yo 10:12; 2Pe 2:1 * **20:30:** 1Tim 1:3, 19+;
 1Yo 2:19 * **20:31:** Mk 13:37; 1Tes 2:11 * **20:32:** Mbanj 14:23;
 Kol 1:12; 1Pe 1:4+ * **20:33:** 1Kor 9:15; 2Kor 2:17, 7:2; 1Tes 2:5
 * **20:34:** Mbanj 18:3; 1Kor 4:12; 2Kor 12:14+; 1Tes 2:9

matazi rein, ene pale poia tiina to Maaron izaa toozi, ve loloji poia iliiv yes tau tamtamon tigham lezi gabua na.' ” *

³⁶ Paulus isavsaav le isov, ra iput aaghe daaba izi taan ve yesnja tisuñ. ³⁷ Tisuñ le isov, ra tiburig tila tisaghavu, ve yesnja titan tiina. ³⁸ Pasaa, aliinja ziiri rig tau ighe yes aat irau tighita naagho muul mako, tauta igham zi loloji isaghat. Titan le isov, ra tighamu tila lesu tighuru izaa waan.

21

Paulus tomania zeetja tigham waan tighe tila pa Yerusalem

¹ Yenja yes nginiinja to Epesus nivataki nimamai le isov, ra nizaa waan. Tiravia lai izala, ve niraav duduun nila sisi Kos. Mbon le nughizau, ra niraav muul nila pa sisi Rodos. Ra niraav muul nila, ve niloon nugh Patara. ² Niloon Patara, ve nindeen waan ite tau ighe imbut te ila ivool taan sirivu to Ponisia. Tauvene nizaa waan tawe, ve niraav muul. ³ Nighaughau nila le matamai iloon pa sisi Saiprus. Ighen pa nimamai nas. Niravu imuul pa murimai, ve nighau duduun pa taan tiina Siria. Nila le niloon nugh Tiro. Pasaa, tighe tighur yauyaun siriv izi ta sewe. ⁴ Nizi nileep ta sewe, ve nila nighita Yesu zineera siriv to nugh tawe. Tauvene nila nileep tomani zi irau mbon liim ve ru. Patanani tau pale ivot pa Paulus na, Avuvu Patabuyaun ivotia pazi wa. Tauvene tighe tinjuruuta, lesu izala Yerusalem sov. Eemon Paulus iloon alinjazi mako. ⁵ Yenja nileep le saawe

* **20:35:** Ep 4:28; 1Tes 4:11+; 1Tim 6:18

tau waan ighe iraav muul, ra zeran tawe, tomania azuwaznja ve natuznja tisov tighur ghei. Yenja nipul nughei, ve nizila peria nari, ra niput aghemai izala sausau paavo, ve nisun. *

⁶ Nisun le isov, ra nivataki nimamai, ve nizaa waan, ve yes timuul tila pa nughei.

⁷ Nipul Tiro, ve niraav muul nila niloon nugh Tolemais. Yei nila nigig tonvetaz siriv to Krisi tau tileep izi ta sewe, ve nileep tomani zi pa mbon eemon. ⁸ Nughizau, ra nipul zi, ve niraav muul nila niloon nugh Sisarea, ve malmalimai nila ruum to Pilip. I neer to votiaan vaaru poia pa yes tau tighur ila to Krisi mako. Zeran liim ve ru tau muun tighur zi to tiuul yes mbanjoonja pa uraat siriv na, i toozi ee. *

⁹ I natlivanja paan tau tivai soone. Maaron irei tapiri pazi ve tivovotia aliinja pa tamtamon imin propet.

¹⁰ Yei nileep izi nugh Sisarea mbon siriv, ra neer ee ileep Yudea ve izilam, eeza Agabus. I paam ivovotia Maaron aliinja pa tamtamon imin propet.

¹¹ Ilam peria tsiei, ra ipool puus to Paulus pa ngaali, ve ighamu gha ikau i tauu niima ma aaghe pani, ve isaav ighe: “Avuvu Patabuyaanj isaav tauvene: Ngar raraate mon pale ivot pa puus tane tauja. Pasaa, yes Yuda tau tileep Yerusalem we pale tikau niima ma aaghe, ve tighuru ila yes tau Yuda mako na nimazi.” *

¹² Yei niloon saveenj tooni le yenja zeetmainja to nugh tawe lolomai ipatajan ve nitan rarai Paulus nighe izala Yerusalem sov. ¹³ Eemon i isaav payei

* **21:5:** Mbanj 20:36
20:23, 21:33

* **21:8:** Mbanj 6:5, 8:5

* **21:11:** Mbanj

ighe: “Tanjiiz tsiam tane, gabua mindai? Aghe agham ghau lolog isaghatin gham, lesu natoor ŋgar tsiau, ve nazi naleep? Ene aat mako. Yau nasaŋan mon pa badoon pataŋani. Isaav ighe nala Yerusalem ve tikau nimag ma agheg, tikau ghau lak! Ve isaav ighe tirav ghau namaat izi ta sewe ve mateegh tsiau ipait Tiina toit Yesu eeza, ene poia. Tirav ghau lak.” *

¹⁴ Yei nisaav ariiaan pani, eemon iloon ghei mako. Pasaa, ŋgar tooni iyaryaŋ ighe ila. Tau-vene nipul saveeŋ pani, ve nisaav nighe: “Poia, gabua aat ivot itaghon Tiina toit loolo.”

Paulus ila ivot Yerusalem

¹⁵ Murei ra, nigharaat gabua tsiei pa laghoon, ve niburig gha nizala pa Yerusalem. ¹⁶ Yesu ziŋeera siriv to nugh Sisarea tilaagh tomani ghei paam. Yei nila peria Yerusalem, ve tigham ghei nila ruum to Nason, ve nileep tomania. Nason, i to sisi Saiprus. Yesu ziŋeera tau titaghoni imin maata na, i toozi ee.

¹⁷ Saawe tau nila nivot Yerusalem, yes tonvetaz to Krisi tigham ghei toman lolozi poia. ¹⁸ Nileep mbon le nughizau, ra yeŋa Paulus nila nighita Yakobus. Ve ŋginiŋa tisov to lupuun to Krisi tilam tileep tomani ghei paam. ¹⁹ Paulus igham aaz poia pazi, ra ipaes pa gabua naol isov tau Maaron igham zi tivot ila i niima, saawe tau igham uraat pa yes tau Yuda mako na.

²⁰ Yes tiloon saveeŋ tooni, le tipait Maaron eeza pa tapiri ve poia tooni. Ra tisaav pani tighe: “Toghamai, paesiŋ tsio poia. Eemon ughita. Yes

* **21:13:** Lu 9:51; Mbanj 20:24

Yuda eval le eval kat tighur ila to Yesu wa. Ve yes tISOV tIZUARI zi tIGHE le titaghon dudunjai tutuun to Mose. ²¹ Varum ilam gha tiloona wa. Pasaa, zeran siriv tikau saveen tsio tIGHE yes Yuda tau tileep ila yes tau Yuda mako na sosozi, yo usavsaav pazi ughe tighur murizi pa tutuun to Mose. Ve ungalsekin zi pa ravuun natuzna warozi, ve ughe titaghon iit Yuda gabuaan muul sov. *

²² Tauvene pale tagham mindai, lesO tarav motin saveen toozi tawe? Pasaa, tamtamON aat tiloon varum tIGHE yo ulam wa.

²³ “Tauvene, yo aat utaghon saveen tsiei tane. Tamtamon tsiei paan tilepleep. Yes timbu saveen tomania Maaron wa. ²⁴ Ugham zi, ve yamna ala agharaat taumim, lesO angalaan ila Maaron maata. Mako uul zi, ve ughol lezi gabua siriv, lesO tigham watoonrau pani, ve tiin dabazi. *

Ighe ugham tauvene, ene pale tamtamON tISOV to nugh tane tighilaal tIGHE varum tau tilonloona na, ene karom, ve tiwatagh tIGHE yo utataghon tutuun to Mose soone. *

²⁵ “Ve nugh nugh tau Yuda mako ve tighur ila to Tiina toit na, yei niyambaar rau ila pazi wa. Rau tawe, nipaesia saveen tau lupuun toit imbua na. Nighe: Aniin tau tipakur maaron karomna pani na, tighani sov. Ve tighun ngai siinji sov. Ve gabua tau ighe tipuleel luua gha imaat, ene paam tighani

* **21:21:** 1Kor 7:18+; Ga 5:2, 6:15 * **21:24:** Yes Yuda tighamgham tauvene: Isaav ighe tamtamON eta imbu saveen ari-aanja tomania Maaron, ene irau tikot daaba mako le saveen tooni ighur anoonja. Mako irav gabua siriv imin watoonrau, ve tiin daaba.

* **21:24:** Mban 18:18; 1Kor 9:20

sov. Ve tighur boog sov.” *

²⁶ Tileep mboŋ le nughizau, ra Paulus igham zeran paan tawe, ve yesŋa tila tipaburigin uraat to gharatoon tauzi, leso tingalaan ila Maaron maata. I ilon ila sirsiir to Rumei Tiina loolo, ve ila ighita yes zeran to watoonrau, ve isavtarai zi pa saawe sindei tau pale tipasov uraat to gharatoon tauzi, ve tigham watoonrau toz toz.

Yes Yuda tikis Paulus ilon ila sirsiir to Rumei Tiina loolo

²⁷ Uraat to gharatoon tauzi leso tingalaan ila Maaron maata, ene ikis zi irau mboŋ liim ve ru. Saawe tana igharau ighe isov, ve Yuda siriv tau tileep Asia ve tilam Yerusalem na, tighita Paulus ilepleep ilon ila sirsiir to Rumei Tiina loolo. Tauvene tila tikisi, ve tipazaagh eval tiina to tighur koi pani. ²⁸ Tiboboob tige: “Ai, yam zeran to Israel, alam auul ghei! Neer tauta ene. I tane ta alonloon vaaru tige ilaghaagh irau nugh nugh, ve ivovotia saveen pa tamtamon tisov, leso tivelegh ghiit tomania tutuun toit, ve Rumei Patabuyaan tane paam. Ve aazne, i igham sosor tiina ite muul. Pasaa, igherev Grika siriv tilon tila sirsiir to Rumei Tiina loolo. Tauta tivaghamunia nugh patabuyaan tane gha isaghat ila Maaron maata wa.” *

²⁹ Yes tisaav tauvene pasaa, muun tighita Tropimus to nugh Epesus yesuru Paulus tilaghaagh ila Yerusalem loolo. Tauvene tigham ngar sorok tige Paulus ighamu gha yesuru tilon tila sirsiir to Rumei Tiina loolo. *

* **21:25:** Mbanj 15:29

* **21:28:** Mbanj 6:13, 24:5+

* **21:29:**

Mbanj 20:4

³⁰ Tamtamon tiloon saveen toozi tawe, le yes Yerusalema tisov tiburig, tiparlanlaan tilon tila sirsiir to Rumei Tiina loolo, ve tikis Paulus gha tisasaara tivot tila pa muuri. Ra rekia mon tipoon ataman to rumei ila ivool. ³¹ Tizuari zi tigde le tiravu imaat. Eemon saveen ilaan ila igham daaba tau ingin zaaba tisov to Rom tau tilepleep Yerusalema na tigde: “Yes Yerusalema tisov tileep ila malmal tiina loolo!” ³² Tauvene daaba tawe rekia mon iyau zaaba siriv tomania daaba toozi, ve tilaan tizila pa nugh tau malmal iburig pani na. Yes Yuda tiravrav Paulus le tighita daaba tana tomania zaaba tooni tilam peria, ra tipuli.

³³ Daaba tana ilam ivot toozi, ve isaav pa zaaba tooni gha tikis Paulus, ve tikau niima pa sen ru. Ra ighason yes Yuda ighe: “Ene sei? I igham saa sosor ta yam aravu ne?” *

³⁴ Eval tiina tau tilepleep ve tiboboob na, tisa-avia saveen maata ite ite. Tauvene daaba tana irau igham saveen ghazoonja eta pa malmal tana puughu mako. Pasaa, oroor tiina matini. Tauvene isaav ila pa yes zaaba tooni ighe tinguaaz Paulus ilon ila ruum toozi loolo. ³⁵ Yes zaaba tigham Paulus gha tila ndeet puughu, ra tisuru izaa tibaado. Pasaa, tighita tigde eval tiina tiyaryaan tigde le tirav Paulus imaat. ³⁶ Eval tiina titaghon zi tila, ve tiboboob tigde: “Ileep sov. Aravu imaat!” *

Paulus ighe isavsaav pa eval tiina

* **21:33:** Mban 20:23, 21:11 * **21:36:** Lu 23:18, 21; Mban 22:22

³⁷ Yes zaaba tigham Paulus tigde tilon tila pa ruum toozi loolo, ve Paulus isaav ila pa daaba toozi ighe: “Mindai, irau nasavsaav tomani ghom rig?”

Daaba tana iyol aliinja ighe: “Wai! Yo uwatagh Grika alinjazi? ³⁸ Yau naghe pa yo Isip tamazi tau wariiz mon ipazaagh tamtamon ndinndin ndinndin paan (4,000) gha tigham malmal tiina, ve igherev zi tila nugh nginaanja. Yes zeran popoiazi mako. Tiyonyoon ila eval tiina lolozu ve tiravrav tamtamon pa mbuzaagh.”

³⁹ Paulus isaav pani ighe: “Mako, yau Yuda. Nugh tsiau puughu, ene Tarsus tau nugh tiina ee to Silisia na. Yau naghe naghason ghom. Irau uyok payau ve nasavsaav rig pa eval tiina tawe?”

⁴⁰ Daaba tana iyok pani, tauvene Paulus iburig iyooz izala ndeet, ve itatan niima pazi. Leso oroor imot, ve isavia saveen tooni. Eval tiina tighita le tineneen. Ra Paulus ipaburigin saveen tooni ila tauzi alinjazi Hibru.

22

Paulus ivotia puughu tau i ighur ila to Yesu

¹ Paulus isaav pazi ighe: “Yam tamanja ve tonvetaz tsiau, aghur talinamim payau. Pa yau naghe nasavia puughu tau nataghon eez paaghu tane. Leso aghilaal aghe yau naghham sosor eta mako.”

² Yes tiloon Paulus isaav pazi ila alinjazi duduun Hibru, le tineneen kat.

³ Paulus isaav muul ighe: “Yau Yuda. Tipoop ghau izi nugh Tarsus tau igheen taan sirivu to Silisia. Saawe tau yau kukuag, tigham ghau nalam

ta sene. Naleep izi nugh tane le namin olman. Tu-tuun to timbuunja, olman Gamaliel ipaghazonjai ghau pani le isov. Ve yau nazuari ghau naghe le nataghon dudunjai ngar isov tau Maaron loolo pani na, raraate imin aazne yam asov azuari gham pa taghoniinji. *

⁴ Yes tau titaghon eez paaghu tane, muun yau naghurghur patajani pazi ve naghham saghatin zi kat. Tamtamon toozi siriv, narav zi timatmaat. Ve siriv, nagherv zi tila, ve naghur zi tilon tila ruum to yavyavuun. Yes zitamoot, ve zilivaa paam. *

⁵ Daaba to watoonrau tomania nginiinja tisov tau tileep ila lupuun tiina to pooza toit, yes ti-watagh ngar tau muun naghhamghamu. Yes irau tipariaan saveen tsiau tane. Muun, yau naghe nakis yes tau titaghon eez paaghu tane izi nugh Damaskus, ve naghham zi tilam Yerusalem, leso tighur yavyavuun pazi. Tauvene naghason yes daaba toit gha tibood saveen yokiin payau ila rau siriv. Leso naghham zi nala, ve natotoi zi pa yes tonvetaz toit tau tileep izi Damaskus, ve tiwatagh tigne yau ezag pa uraat tauvene.

*Paulus isavia saawe tau Yesu ivot tooni
(Mban 9:1-18, 26:9-18)*

⁶ “Tauvene naburig ve nala. Nalaagh nala le nagharau nugh Damaskus. Aaz izalam imin zeg-matuugh ma vene. Malau mako ve mbonari tiina kat igheen sambam ve izilam, le isul livutin ghau.
⁷ Tauvene natap nazi taan, ve naloon saveen ilam

* **22:3:** Ga 1:13+; Pil 3:5+
1:13

* **22:4:** Mban 8:3; 1Kor 15:9; 1Tim

payau ighe: ‘Saul, Saul, puughu mindai ta unoknok ghuruun patañani payau?’

⁸ Yau nayol aliina naghe: ‘Tiina, yo sei?’

Ve i isaav payau ighe: ‘Yau Yesu to Nasaret. Yau ta yo ughurghur patañani payau ne.’ *

⁹ Zetagna tau yena nilaghlaagh na tighita mbonari tawe paam. Eemon tiloon neer tau isavsaav payau na aliina mako.

¹⁰ “Yau naghasoni naghe: ‘Tiina, ughenagham mindai?’

I iyol aliinag ighe: ‘Uburig ve ulon ula nugh Damaskus. Mako tipaes payo pa uraat naol isov tau naghe naghuru ila nimam.’ ¹¹ Mbonari tana isul tiina kat le igham matag ikumkuum. Tauvene zetagna tilam tikis nimag, ve tipalele ghau gha nilon nila nugh Damaskus.

¹² “Nugh tawe, neer ee ilepleep, eeza Ananias. I maata ingalngal Maaron, ve izuari ghi ighe le itaghon duduñai tutuun tooni. Tauvene Yuda ti-sov to nugh Damaskus tipapait eeza tighen i neer poia ee. ¹³ I injarui ghau ilam, iyooz zigeg, ve isaav payau ighe: ‘Tazig Saul, matam poia ve ughita nugh!’ Saawe duduun tana, matag poia, ve naghita Ananias iyozyooz. ¹⁴ Ra isaav payau ighe: ‘Maaron to timbuunna, i tauu isiigh ghom wa. Leso igham ghom ughazoon pa loolo ve ngar tooni. Tauta ughit katin Neer To Ngar Duduunna, * ve uloon saveen ila i tauu aavo. *

* **22:8:** 1Kor 15:8-9; Ga 1:15-16 * **22:14:** Neer To Ngar Duduunna, ene Yesu. * **22:14:** Ga 1:12+; Ep 3:2+

¹⁵ Gabua tau uloona ve ughita pa taum matam na, yo aat usavia irau nughmarin. Leso upariaan Yesu saveen tooni, ve tamtamon tighur ila tooni. *

¹⁶ Tauvene usan sa muul? Uburig ta aazne, ugham yaa, ve ughason Yesu. Leso ireu sosor tsio ilale, ve igham ghom ungalaan ila Maaron maata.’
*

Maaron imbaan Paulus ighe ila pa yes tau Yuda mako na

¹⁷ “Murei ra, namuul nalam Yerusalem, ve nalepleep ta sene le saawe ee, nalon nala sirsiir to Rumei Tiina loolo, lesu nasun. Nasunsun ila, le tandaghiin ee ivot payau. ¹⁸ Naghita Yesu isaav payau ighe: ‘Uburig rekia mon, upul Yerusalem, ve ughau. Pa ighe yo upariaan saveen tsiau izi ta sene, yes irau tiloon ghom mako.’

¹⁹ “Yau nasaav pani naghe: ‘Tiina, tamtamon to nugh tane tiwatagh tigde: Muun, yau nalaghlaagh irau rumei toozi, ve naghurghur yes tau tighur ilat tsio na tilon tila ruum to yavyavuun, ve naloslos zi. ²⁰ Ve saawe tau Stepanus ivotia saveen tsio, ve tilin sin pani gha imaat, yau nayok pa ngar tana. Tauta nayooz tomania yes tau tiravu na, ve nanjin nonoghiina toozi to ngoaan.’ *

²¹ “Eemon Tiina tsiau isaav payau ighe: ‘Uburig ve ula. Yau naghe nambaan ghom ula pa nugh malau. Leso ugham uratoi yes tau Yuda mako na.’ ” *

* **22:15:** Mban 23:11, 26:16

* **22:16:** Ro 10:13; 1Pe 3:21

* **22:20:** Mban 7:58, 8:1

* **22:21:** Mban 9:15, 26:17+; 1Tim

Paulus ipaes pa yes zaaba ighe i tamtamon to Rom

²² Eval tiina tighur talinazi pa Paulus ila le tiloon aliina ighe Maaron imbaano ila pa yes tau Yuda mako na. Ra tiboob muul tighe: “Ah, aravu imaat ila! Ileep ne, i poia eta? Tamtamon tauvene ileep sov!” *

²³ Yes tiboboob, ve tizuzuum nonoghiina toozi to ngoaan gha tisuruuv zi tizi, ra tikor taan, ve tisuruuva izazaa. †

²⁴ Tauvene tiina to yes zaaba isaav pa zaaba tooni ighe tigham Paulus gha tilon tila ruum toozi loolo, ve tilosi ‡
le irau i ivotia puughu tau eval tiina atezi yavyav kat ve tiboboob pani tauvene.

²⁵ Tauvene tilon tila ve tipagheena izi, ve tikau niima ila ai, lesa tilosi. Eemon Paulus ighason daaba to yes zaaba tau iyooz igharau na ighe: “Mindai, isaav ighe tamtamon eta, i to Rom, ve yes daaba to gharatoon saveen titiir saveen tooni soone, ve yam alos sorokini, pale iduduun pa tutuun to Rom?” *

²⁶ Daaba tawe iloon saveen tane, ve ila ipaes pa daaba toozi tau ingin zaaba tisov na ighe: “Uyamaan ghiit wa? Pa neer tawe, i to Rom. Pale ugham saa ngar pani?”

²⁷ Daaba tana iloon paesiin tooni, ra i tauu ila ighason Paulus ighe: “Ai, usaav ghazonja payau.

* **22:22:** Mbanj 21:36 † **22:23:** Isaav ighe yes Yuda tiloon saveen eta tau irau lolosi mako kat, ene tighamgham tauvene.

‡ **22:24:** Ravraav tau Roma tiloslos tamtamon pani na, timbit gabua matazi ila, lesa irangat mizazi. Saawe naol, tilos tamtamon timaat.

* **22:25:** Mbanj 16:37

Onoon? Yo to Rom?”

Paulus iyol aliinja ighe: “Vee. Yau to Rom.”

²⁸ Daaba tana isaav pani ighe: “Yau napul maet tiina kat, tauta namin tamtamon to Rom.” §

Paulus isaav pani muul ighe: “Ena yo. Ve yau napul maet eta mako. Pasaa, saawe tau tipoop ghau, yau to Rom.”

²⁹ Yes zaaba tau tigde tilos Paulus na, tiloon saveen tane, ve rekia mon tipuli. Ve daaba toozi paam iroi pa tauu. Pasaa, Paulus, i tamtamon to Rom. Eemon daaba tana isaav gha tikau niima ma aaghe sorok.

Tipayooz Paulus ila lupuun to yes pooza tau tinginjin yes Yuda na naghozi

³⁰ Daaba tau injin zaaba tisov na ighe iwatagh kat: Paulus igham saa ngar ta yes Yuda tighita tigde isosor. Leso ighazon pa saveen tooni puughu. Tauvene tileep mbon nughizau, ra isaav gha tipool sen tau tikau Paulus pani na, ve ipoi yes daaba to watoonrau tomania pooza tisov to yes Yuda tilam tilup zi, ve igham Paulus ilam gha ipayooze ila naghozi.

23

Paulus isavia puughu tau i itaghon Yesu

§ **22:28:** Tamtamon lezi eez naol to timin tamtamon (o sitisen) to Rom. Isaav ighe neer eta, i to Rom, ene pale natja paam to Rom. Ve isaav ighe tamtamon eta, i to Rom mako, eemon kinik to Rom loolo poia pani ve ighe igham poghania, ene i irau ighamu imin tamtamon to Rom. Zeran siriv tighol maet tiina pa gavman to Rom, lesa timin tamtamon to Rom. Gavman to Rom irau tighur patajani pa tamtamon to Rom imin tighamgham pa tamtamon siriv ne mako. Ve yes aat tingin poghani zi.

¹ Paulus maata denja pa yes daaba tau tileep ila lupuunj tawe, ve isaav pazi ighe: “Yam tonjvetaz, yau nayamaan taug naghe ta muunj ve ilam aazne, laghoonj tsiau, ene nataghon njar ngalaanja mon ila Maaron maata.” *

² Daaba to watoonjrau, eeza Ananias, iloonj saveenj tane, ve isaav pa yes tau tiyooz tigharau Paulus na, ve tiposai Paulus aavo. *

³ Tauvene Paulus isaav pani ighe: “Yo, Maaron pale irav ghom paam! Yo umin didiinj mbuuzaa, tau tikumu pa ko, lesa tamtamon tighita tige poia. Mbolem izi ta sena to ugabiiz ghau itaghon tutuunj toit. Eemon yo taum umalaanj pa tutuunj wa. Pasaa, usaav pazi gha tiposai sorokin ghau.” *

⁴ Tamtamon siriv tau tiyooz tigharau Paulus na, tisaav pani tige: “Wai, daaba to watoonjrau, i uraata to Maaron. Mindai ta uroron pani mako, ve uveleghi?”

⁵ Paulus iyol alinjazi ighe: “Yam tonjvetaz, yau naghilaalo naghe i daaba to watoonjrau mako. Imin ta naghilaalo, kanaan irau nasik saveenj tauvene pani mako. Pasaa, Maaron alinja tau tiboode na isaav ighe:

‘Asik saveenj saghati pa daaba tsiam eta sov.’ ” *

⁶ Paulus iwatagh: Yes tau tileep ila lupuunj tana, siriv, ene yes Sadusi, ve siriv, ene zeran tutuunja. Tauvene isaav pazi toman alinja tiina ighe: “Yam tonjvetaz, aloonj. Yau tane, neer tutuunja ee paam.

* **23:1:** Mbanj 24:16; 2Kor 1:12; 2Tim 1:3 * **23:2:** Yo 18:22+

* **23:3:** Lo 25:1+; Mt 23:27+ * **23:5:** Igham 22:28

Ve tamanj gha tinanj ve tibugnja paam, yes zeran tutuunja. Yau naghur matag pa burigiinj to yes mateegha, tauta aazne tipayooz ghau pa savsaveenj.”
*

7-8 Paulus isik saveenj tane, le ireu zi ve parzoraanj tiina iburig ila sosozi. Pasaa, yes Sadusi tighur ila tigde: Yes mateegha irau tiburig muul mako. Ve tigde anjela eta ileep mako, ve avuvu eta ileep mako. Eemon yes zeran tutuunja tighur ila gabua isov tana. ⁹ Tauvene oroor tiina iburig, ve tivazorai zi ila ila le, tamtamon ngara siriv to yes zeran tutuunja tiburig tiyooz, ve tisaav ariaanj tigde: “Yei nighita nighe njeer tane, i igham sosor eta mako. Takankaan. Aat avuvu eta, ma anjela eta isavsaav pani.”

¹⁰ Daaba tau injin zaaba tisoov to Rom na ighita saveenj toozi iparav kat. Tauvene iroi ighe tivatukai Paulus ila ilam, ene pale tirangati ve imaat. Tauvene isaav pa zaaba tooni, ve tila tinguaaz Paulus ighau pa yes daaba tana, ve tighamu tilonj tila ruum toozi loolo muul.

¹¹ Mbonj tana, Tiina toit Yesu ivot to Paulus, iyooz igharauu, ve isaav pani ighe: “Paulus, uroi sov. Uyooz ariaanj. Pa varug tau uvotia izi Yerusalem na, yo aat uvotia izi Rom paam.” *

Yes Yuda timbu saveenj pa ravuunj Paulus imaat

¹² Tileep le nughizau, ra Yuda siriv tilup zi, ve tiil eez pa ravuunj Paulus. Yes timbu saveenj ariaanj ila Maaron maata tigde: Yes aat irau tighan aniiinj mako, ve tighun yaa mako, le irau tirav

* **23:6:** Mbanj 24:21, 26:5+; Pil 3:5 * **23:11:** Mbanj 18:9, 27:23+

Paulus imaat. ¹³ Zeran tau timbu saveen pa ravuun Paulus na, yes irau tamoot ru ve geege. ¹⁴ Tauvene tiburig tila to yes daaba to watoonrau ve yes nginiina, ve tipaesia ngar toozi pazi tigde: “Yei tane nimbu saveen ariaana ila Maaron maata wa. Nighe aazne ve ila, avomai aat itut aniin eta mako, le irau nirav Paulus imaat. ¹⁵ Tauvene yamna daaba toit siriv ala to daaba tau ingin yes zaaba to Rom na, ve atombaana tauvene aghe: ‘Yei nighe ugham Paulus izilam payei. Leso nighason poghania pa saveen tooni puughu ve nighazon pan kat.’ Yam agham tauvene, ve yei aat nisanani izi eez livuugha. Saawe tau ilam peria tsiei, mako niravu imaat. Leso ilat ivot tsiam sov.”

¹⁶ Eemon Paulus waagha taliina irav saveen mbuaan toozi tawe. Tauvene ila ivot ruum to yes zaaba, ve ilon ila ighita waagha, ve ipaesia saveen tana pani. ¹⁷ Paulus iloon saveen tooni, ve imbaan ila pa daaba ee to yes zaaba ilam, ve isaav pani ighe: “Ugham neer paaghu tane ila to daaba tsiam tau ingin yam zaaba asov na. Pa i le saveen rig pani.” ¹⁸ Tauvene daaba tawe igham Paulus waagha ila to daaba tooni, ve isaav pani ighe: “Paulus tau nikisi ilepleep tomani ghei ne, imbaan payau, tauta nala tooni. Ve ighason ghau ighe naghama neer paaghu tane ilam ighit ghom. Pasaa, i le saveen rig payo.”

¹⁹ Tauvene daaba tooni ikis Paulus waagha nima, ve yesuru tila ziige, ra ighasoni ighe: “Aiyo, saa saveen tau ughe usavia payau ne?”

²⁰ Paulus waagha isaav pani ighe: “Yes Yuda timbu saveen tigde tilam tighason ghom, lesa bogzo, mako ugham Paulus, ve yamru azila pa

daaba to yes Yuda lupuun toozi. Saawe tau tilam, yes pale tigham karom payo tigde i tauu aat ila toozi, leso tighasoni poi pa saveen tooni ve tighazon pa puughu. ²¹ Eemon uloon zi sov. Pa tamtamon toozi irau tamoot ru ve geege pale tisaan pa ravuunni izi eez livuugha. Yes timbu saveen ariaanja ila Maaron maata tigde aat irau tighan aniin mako, ve tighun yaa mako le irau tirav Paulus imaat. Yes tighurghur matazi payo ve tisaan. Isaav ighe uloon zi, ene aat tigham ngar tana.”

²² Daaba tana iloon saveen tooni, ve ingalsekini ighe: “Saveen tau yo usavia payau ne, upaesia pa ite paam sov.” Isavsaav pani le isov, ra ipuli gha ila.

Yes Roma tipaghau Paulus izila pa nugh Sisarea

²³⁻²⁴ Daaba tana iburig, ve ipoi daaba ru to yes zaaba tilam, ve isaav pazi ighe: “Ala ayau yes zaaba irau ndinndin ru (200), tomania zaaba tamoot tol sanavul (70) tau tilalandoov hos na. Ve agham yes zaaba to kisiin iiz paam, irau ndinndin ru (200). Ve agharaat hos siriv pa Paulus paam. Mbon aazne, aaz anunu ighe igham liim ve paan, mako agham Paulus, ve yamja aburig azila pa nugh Sisarea. Anjin poghania le ila ivot to gavana toit Feliks.” ²⁵ I isavsaav tomani zi le isov, ra ibood paesiin ila rau tauvene:

²⁶ “O gavana Feliks, tiina tsiau. Yau Klodias Lisius nagh aaz poia payo.

²⁷ “Neer tau ilat na, yes Yuda tikisi, ve rigmon kanan tiravu imaat. Eemon yau naloon tigde i

to Rom, tauvene nala tomania zaaba tsiau, ve nigham mulini ve ninguaaza pazi. *

²⁸ Yau naghe nawatagh: I igham saa ngar tau Yuda tighita tige isosor. Tauvene naghama ila, ve napayooze ila daaba to yes Yuda naghozi. ²⁹ Yau naleep, ve naloon saveen toozi iparav ila ilam, ve naghita naghe i igham sosor tiina eta irau to taghuru ilon ila ruum to yavyavuun, ma taravu imaat ne mako. Yes tivazorai zi pa tauzi tutuun toozi mon. *

³⁰ Murei ra, tipaes payau tige Yuda siriv tigham lilini tige tiravu imaat. Tauta rekia mon naghaua ilat. Leso anam utiir saveen tooni. Ve nasaav pa yes tau tige tipayooze pa savsaveen na naghe tizilat tsio ta sena, o tivotia sosor tooni ila naghom. Aiyo, saveen tsiau, tauta ilam imuul ta sene. Uleep toman lolom poia.”

³¹ Tauvene mbon tana, yes zaaba titaghon saveen to tiina toozi, ve tigham Paulus gha yesna tila tivot nugh Antipatris. ³² Tileep ta sewe le nughizau, ra yes zaaba tau tilaagh taan na, timuul tila pa niazi ta Yerusalem we. ³³ Ve yes tau tilandoov hos na, tigham Paulus gha malmalizi tila tivot nugh Sisarea. Tila peria, ra tizuzuun rau to Klodias ila to gavana Feliks, ve tighur Paulus ila niima. ³⁴ Feliks iwaat rau tau Klodias iboode na le isov, ra ighason Paulus ighe: “Nugh tsio igheen taan sirivu sindei?”

Paulus ipaes pani ighe: “Yau nalam pa taan sirivu to Silisia.”

* **23:27:** Mban 21:30+ * **23:29:** Lu 23:14+; Mban 18:14, 25:25, 26:31

³⁵ Feliks isaav pani ighe: “Poia. Uleep le irau yes tau tigde tipayooz ghom pa savsaveen na tilam tivot, o naloon saveen tsiam.” Ra isaav pa zaaba siriv ighe tigham Paulus tila rum tiina tau muun Erod irao na, ve tinjini ta sewe.

24

Yes Yuda tipayooz Paulus ila Feliks naagho

¹ Mbonj liim ilam ila, ra Ananias tau daaba to watoonrau, yesja nginiina siriv to yes Yuda tizila pa Sisarea tigde tipayooz Paulus ila gavana Feliks naagho. Neer ngara ee tau iwatagh katin tutuun to Rom na, ilaagh tomani zi paam, leso igham avozi ve iuul zi pa savsaveen. Eeza Tertulus. ²⁻³ Tauvene timbaan pa Paulus ilonj ilam, ra Tertulus ipaburigin saveen tooni ighe:

“O tiina tsiei Feliks, yei lolomai poia kat payo. Pasaa, nginiinj tsio, ene poia kat. Gabua naol tau muun tisaghat, ene yo ugharaat zi wa. Tauvene saawe malau tau ungin ghei, lepoogh tsiei poia kat. Tauta yei nisov irau nugh nugh lolomai poia payo ve nipapait ghom. ⁴ Eemon irau naseen saveen tsiau malau geeg mako. Pale umbuzir pa alinjag. Yo neer poiam. Tauvene naghason ghom: Irau uloon saveen tsiei tuuku tane?

⁵ “Yei nighita neer tane nighe ngar tooni poia mako. I imin moroghoon saghati. Pasaa, i ipaburigin parzoraan ve malmal tintiina ila yes Yuda sosozi irau taan naol isov. Yo uwatagh: Yes tau titaghon Yesu to Nasaret na, tipet tauzi tila soghan pa yes Yuda ve tipaburigin lupuun paaghu

wa. Tauta yes eval tirere pazi. Ve neer tane, i imunmuun pa lupuun toozi.*

⁶ Ve itoova to ivaghamunia Rumei Tiina paam, leso ighamu isaghat ila Maaron maata. Tauta nikisi. Yei nighe taumai nipayooze, ve nitiir saveen tooni itaghon tutuun tsiei. ⁷ Eemon Lisius tau ingin zaaba tisov to Yerusalem na, ilam ireu ghei, ve isandi ila nimamai, ve inguaaza ila. Ra isaav payei ighe nilam nighit ghom, ve nisaav ghazooja payo pa sosor tooni. ⁸ Tauvene poia to taum ughason poghania neer tane pa saveen tooni. Leso ughilaal ughe saveen isov tau yei nisavia pa sosor tooni ne, ene onoon mon.”

⁹ Tertulus isavia saveen tane le isov, ra Yuda siriv anazi tiburig ve tipariaan saveen tooni tigde saveen isov tau i isavia na, ene onoon mon.

Paulus ipaghazonai tauu ila Feliks naagho

¹⁰ Ra Feliks itotoi ila pa Paulus, leso aana isaav. Tauvene Paulus ipaburigin saveen tooni ighe:

“O gavana Feliks, yau nawatagh: Ndaman ndaman ta yo ukaria gharatoon yei Yuda saveen tsiei wa. Tauvene lolog poia pa nayooz ila naghom, ve napaghazonai taug. Leso uwatagh ughe yau naghom sosor eta mako. ¹¹ Saveen tane, patajani mako. Isaav ighe yo ughason tamtamon pani, ene pale tisaav payo tauvene: Wariiz mon, mbon sanavul ve ru tau ila wa, yau nazala pa Yerusalem pa sunuun. ¹² Yeiru tamtamon eta ni-parzoor ilon ila sirsiir to Rumei Tiina loolo mako. Ve napazaagh tamtamon pa gabua eta ilon ila yes Yuda rumei toozi, ma ila nugh tiina loolo, ene

* 24:5: Mban 16:20, 17:6, 21:28

mako paam. Yes tau aazne tingal saveen payau ne, toozi eta ighit ghau naghamau tauvene ne mako. ¹³ Tauvene saveen ngaliin toozi tau inarui ghau ne, ene tauzi tisaav. Ve lezi gabua eta tau ipalot saveen toozi ve itotoia ighe ene onoon ne mako. Tisaav sorok.

¹⁴ “Eemon saveen toozi ziiri ee, ene yau nayok pani. Yau nasaav ghazoonja payo: Yau nabesbees pa Maaron to timbumainja itaghon eez to Krisi tau yes tirere pani na. Eemon ngar isov tau itaghon tutuun to Mose, tomania saveen isov tau igheen ila rau to yes propet, ene yau naghur ila. *

¹⁵ Yenja yes zeran tane, ngar tsiei eemon. Pasaa, nisov nighur matamai pa saawe tau Maaron pale ipaburigin yes mateegha. Yes zeran dudunaji, ve yes sasaghatizi paam. *

¹⁶ Tauta saawe isov, yau nazuari ghau naghe le lolog tomania ngar tsiau isov ingalaan mon ila Maaron maata, ve tamtamon matazi paam. *

¹⁷ “Yau nala naleep irau nugh nugh ndaman siriv wa. Tauta namuul nalam taug nugh tsiau, leso naghita tamtamon tsiau ve naghur uleen siriv pa yes mbolaanja. Ve naghe naghamau watoonrau siriv pa Maaron paam. *

¹⁸ Yau naghe naghamau uratoi gabua tana, tauta nalon nala sirsiir to Rumei Tiina loolo. Saawe tau tighit ghau izi sewe, yau nagharaat taug gha nanjalaan ila Maaron maata wa. Ve eval tileep

* **24:14:** Mban 26:22, 28:23; 2Tim 1:3 * **24:15:** Yo 5:28+; Mban

23:6, 26:6+; 2Kor 5:10 * **24:16:** Mban 23:1; 2Kor 1:12; 2Tim 1:3

* **24:17:** Ro 15:25+; 2Kor 8:1+; Ga 2:10

tomani ghau mako, ve napaburigin oroor mako.
*

¹⁹ Eemon Yuda siriv tau tileep taan sirivu to Asia ve tilam na, tighit ghau ve tipaburigin patanani tane. Tauta isaav ighe zeran tawe tighita tigde yau naghham sosor eta, o poia pa tauzi tilam tiyooz ila yo naghom, ve tisavia payo. ²⁰ Ve isaav ighe mako, ene yes tau yeŋa niyozyooz ne, tauzi irau tisaav ghazoonja payo. Saawe tau tipayooz ghau pa savsaveeŋ ila daaba to yes Yuda lupuuŋ toozi na, tindeeŋ saa sosor kat tau yau naghamu ne? ²¹ Aat saveeŋ tsiau ziiri ee, ta ireu lolozu. Saawe tau nayozyooz ila sosozi, naboob naghe: ‘Yau naghur matag pa burigiin to yes mateegha, tauta aazne tipayooz ghau pa savsaveeŋ ila naghomim!’ ” *

²² Feliks, i ighazoon kat pa ngar to yes tau titaghon eez to Yesu. Tauvene Paulus isavsav le isov, ra Feliks irav motin saveeŋ toozi ighe: “Poia. Saveeŋ aat imuul tauvene, ve tasaan Lisius tau daaba to yes zaaba to Yerusalem na. Tauu izilam, o nagabiiz saveeŋ tsiam, ve nagharaata.” ²³ Ra isaav pa daaba to yes zaaba ighe ighur Paulus ilon ila ruum to yavyavuun, ve ingin poghania. Eemon ighur patanani pani sov, ve ipuli ilaagh ve ileep sorok ila ruum to yavyavuun loolo. Ve isaav ighe Paulus zeetja tilam to tiuule pa le aniin ma gabua siriv, na ingalsekin zi sov. *

Paulus ipaghazonjai Feliks pa eez to Yesu

* **24:18:** Mbanj 21:26+ * **24:21:** Mbanj 23:6+ * **24:23:** Mt 25:36; Mbanj 27:3; Hib 10:24

²⁴ Mbon siriv ilam ila, ra Feliks yesuru azaawa Drusila tilam. Drusila, i Yuda tinazi. Feliks imbaan ila pa Paulus ighe ilam ve yesna tisavsav. Paulus ilam ivot toozi, ve aavo ila pa eez to taghur ila to Yesu Krisi, ve yesuru tilonloona. ²⁵ Paulus ipaghazonai Feliks pa ngar duduuna, ngar to nginiin tauun poi, ve gabizoon ve ghuruun atuya tau pale Mbon Murei ivot. Feliks iloon saveen tana le iroi. Tauvene irav motin saveen ighe: “Poia. Imuul ta sene. Umuul ula, ve naghita saawe poia eta, o nambaan payo umuul ulam, ve tavasavo ghiit muul.” ²⁶ Feliks ighur maata ighe Paulus igham le maet siriv imin gholiin, lesa ipuli ila. Tauvene saawe naol imbanmbaan pani ilamlam, ve yesuru tisavsav.

²⁷ Ndaman ru isov, ra Feliks isov pa uraat, ve Porsius Festus igham niia. Feliks ighe igham yes Yuda lolosi poia pani, tauvene ipul Paulus ileep ilon ila ruum to yavyavuun.

25

Paulus iyooz ila Festus naagho

¹ Festus tau gavana paaghu to Yudea na, ila ivot nugh Sisarea, ve ipaburigin uraat tooni. Ileep ta sewe irau mbon tol, ra izala pa Yerusalem. ² Yes daaba to watoonrau yesna zolmana siriv to Yuda tila to Festus, ve tingal saveen naol pa Paulus, ve tighason Festus ariaan tige: ³ “Mindai, irau uul ghei, ve ugham Paulus imuul izalam Yerusalem?” Tighasoni tauvene pasaa, yes timbu saveen pa ravuunni izi eez livuugha.

⁴ Eemon Festus iyol alinazi ighe: “Paulus tikisi ileep izi Sisarea. Ve yau, malau mako pale nazila.

⁵ Isaav ighe yam aghita aghe i igham sosor, poia to daaba tsiam siriv tiburig tomani ghau, ve yeŋa nizila. Leso tipayooze pa savsaveeŋ izi ta sewe.”

⁶ Festus ileep tomania yes Yuda izi Yerusalem irau mboŋ liim ve tol ma saŋavul ma vene, ra iburig ve imuul izila nugh Sisarea. Mboŋ le nughizau, ra ila mboole izi nugh to gharatoon saveeŋ, ve imbaaŋ ila ighe tigham Paulus ilam. ⁷ Paulus ilam ivot, ra yes Yuda tau tileep Yerusalem ve tizilam na, tiyooz livutini, ve tiŋgal saveeŋ naol pani. Tighe i ighamgham ŋgar sasaghati kat. Eemon lezi gabua eta tau ipalot saveeŋ toozi ve itotoia ighe ene onoon ne mako. Tisaav sorok.

⁸ Tisavsaav le isov, ra Paulus aana iyol saveeŋ toozi ighe: “Yau namalaan pa tutuun eta to yes Yuda mako, ve naghamsosor eta pa Rumei Tiina mako. Ve kinik tiina to Rom paam, naghamsosor eta pani mako.” *

⁹ Festus ighe igham yes Yuda lolozipoia. Tau-vene ighason Paulus ighe: “Mindai, irau uzala Yerusalem, ve naloon saveeŋ tane muul izi sewe?”

¹⁰ Eemon Paulus iyol aliina ighe: “Mako. Yomon ta kinik tiina to Rom ighur ghom pa uraat to gharatoon saveeŋ. Tauta aazne, nayooz ila naghom izi nugh tane, lesougharaat saveeŋ tsiau. Ve yo uwatagh wa: Yau naghamsosor eta pa yes Yuda mako. ¹¹ Eemon isaav ighe ughit ghau ughe naghamsosor tiina eta irau to namaat pani, na urav ghau namaat! Yau naroi pa atuya tsiau mako. Eemon isaav ighe saveeŋ ŋgaliin tau tigham

* 25:8: Mban 24:12, 28:17

payau ne onoon mako, ene njeer eta irau ighur ghau nala nimazi ne mako. Poia. Ighe vene, yau naghe nala naghita kinik tiina to Rom, lesu tauu iloon saveen tsiau.”

¹² Festus iloon saveen tane, ve yesna zeran ngara tooni siriv tivasavo zi pani. Le isov, ra isaav pa Paulus ighe: “Yo ughe kinik tiina to Rom iloon saveen tsio. Poia, ula ughita.”

Festus ipaesia Paulus saveen tooni pa Kinik Agripa

¹³ Festus, i gavana paaghu. Tauvene mbon siriv ilam ila, ra kinik Agripa yesuru liivu Benis tila tivot Sisarea tigde tighita. ¹⁴ Yesuru tileep malau rig izi Sisarea, tauvene Festus ipaesia Paulus saveen tooni pa Agripa ighe: “Njeer ee, Feliks ighuru ilon ila ruum to yavyavuu, ve ilepleep soone. Eeza Paulus. ¹⁵ Saawe tau nazala Yerusalem, yes daaba to watoonrau tomanina yes nginiina to yes Yuda tilam tighit ghau, ve tingal saveen naol pani. Ve tighason ghau ari-aan tigde natiir saveen tooni, ve naghur atuya pani. ¹⁶ Eemon yau nayol alinazi naghe: ‘Yei Roma gabuamai tauvene mako. Irau nighur tamtamon eta ila koina nimazi sorok ne mako. Isaav ighe tamtamon siriv tingal saveen pa njeer eta, i yesna yes tau tingal saveen pani na, aat tilup zi ila nugh eemon, ve nighur sooso pa njeer tana, lesu ipoon tauu pa saveen toozi.’

¹⁷ “Nasaav pazi tauvene, ve murei, ra yena zeran tawe nizilam Sisarea. Nilam nivot ve naghur saawe mako. Mbon le nughizau, ra yena nila gha mboleg izi ila niag to gharatoon saveen, ve

nambaan ila pa Paulus gha ilam. ¹⁸ Yes tau ti-payooze pa savsaveen na, tiburig tiyooz ve tivotia sosor tooni. Yau naghe pa tisavia sosor tiina eta. ¹⁹ Eemon mako. Yesna tivazorai zi pa sunjuun toozi ngara, ve neer ee tau imaat ila wa, eeza Yesu. Ene Paulus aavo iyaryaan ighe i ileep maata yaryaare. ²⁰ Naloon saveen toozi le nakankaan. Nagham ngar naghe: ‘Pale naghazoon pa saveen tane pu-ughu mindai?’ Tauvene naghason Paulus naghe: ‘Mindai, irau uzala Yerusalem, ve naloon saveen tane muul izi ta sewe?’ ²¹ Eemon i iyok mako. Ighason ghau ariiaan ighe ila Rom, o kinik tiina itiiir saveen tooni. Ve ighason paam ighe yes zaaba tingen poghania le ila ivot ta sewe. Tauvene yau nasaav pa yes zaaba naghe tikisi ileep ta sene le irau nandeen eez eta, mako naghuru ila pa kinik tiina to Rom.”

²² Kinik Agripa iloon saveen tana, ve isaav pa Festus ighe: “Yau naghe taug naloon neer tawe saveen tooni paam.”

Festus isaav pani ighe: “Poia. Bogzo, o uloona.”

Paulus iyooz ila kinik Agripa naagho

²³ Mbon le nughizau, ra kinik Agripa yesuru liivu Benis tila tomania yes zolman to nugh ve yes daaba to yes zaaba, gha tilon tila ruum loolo to lupuun, ve tilup zi ta sewe. Tigham mogheraan siriv imin pakuruun Agripa yesuru Benis le isov, ra Festus imbaan ila ighe tigham Paulus ilam. *

²⁴ Paulus ilam ivot, ve Festus isaav ighe: “Kinik Agripa, ve yam asov tau alam aleep tomani ghei ne, aghita neer tane! Yes Yuda tisov tighason ghau

* **25:23:** Lu 21:12+

pani izi Yerusalem ve izi sene paam. Ve azezi katitiin pa bobaan tigde i ileep sov. Naravu imaat.
*

²⁵ Eemon naloon saveen tooni, ve naghita naghe i igham sosor tiina eta irau to naravu imaat ne mako. Ve i tauu ighason ghau ighe ila ighita kinik tiina to Rom, lesu itiiir saveen tooni. Tauvene yau nayok pa aliina, ve aat naghuru ila. ²⁶ Eemon nakankaan pa saa saveen tau pale naboode ila rau imin paesiin pani, lesu tiina toit ighazoon pa saveen tooni puughu. Kinik Agripa, puughu tane ta naghamu ilam iyooz ila yo tomania tamtamon tisov tane naghomim. Naghe tasov taloon saveen tooni le isov, mako yam auul ghau pa ngar siriv, ve naboode ila rau. ²⁷ Pasaa, ngar tsiau tauvene. Isaav ighe neer eta ileep ila ruum to yavyavuuŋ, ve taghuru ila to kinik tiina to Rom, i aat ila tomania rau eta tau ipaesia sosor tooni, o poia. Ighe paesiin eta mako, ve taghur sorokini ila, ene ngar to boraunja.”

26

Paulus ipaghazonai tauu ila kinik Agripa naagho

(Mbanj 9:1-18, 22:3-16)

¹ Tauvene kinik Agripa isaav pa Paulus ighe: “Aiyo, yo anam usavia saveen tsio.”

Paulus itatan niima pazi ve ipaburigin saveen tooni. Ighe ipaghazonai tauu, lesu tighilaalo tigde i le sosor mako: ²⁻³ “O kinik Agripa, yo uwatagh

* **25:24:** Mbanj 22:22

katin yei Yuda gabuamai. Ve saa saveen tau niva-zorai ghei pani, ene yo ughazoon pani. Tauvene aazne, yau lolog poia pasaa, nalam nayooz ila yo naghom to napaghazonai taug. Leso uwatagh ughe yau naghom sosor eta mako, ve saveen naol tau yes Yuda tisiki payau ne, ene karom mon. Yau naghason ghom: Irau ughur taliŋam poi pa aliŋag? Pa saveen tsiau, ene malaua rig. Pale tinim iŋgal.

⁴ “Ngar tsiau ve gabuag tau kukuag ve ilam aazne, ene Yuda tisov tiwataghi. Ngar tau naghomu izi taug nugh tsiau Tarsus, ve izi Yerusalem paam na, yes tikankaan pani mako.

⁵ Yes Yuda tiwatagh katin ghau. Muun ve ilam, yau neer tutuuna ee. Lupuun tsiei, nizuari ghei kat nighe le nitaghon duduŋai tutuun tisov to Maaron. Besoon tsiei, ene niliiv Yuda tisov. Isaav ighe zetagna tane lolozu pa uleŋ ghau, ene tauzi irau tipariaan saveen tsiau tane.*

⁶ Saveen mbuaan to Maaron tomania timbunmaiŋa, yau naghurghur matag pa saawe to anoonja tooni ivot. Tauta aazne, tipayooz ghau pa savaaveen ta sene.*

⁷ Yei Yuda rumei tsiei sanjavul ve ru nighurghur matamai pa saveen mbuaan tawe, ve sujuun tsiei iŋanarui Maaron irau mbon mataaz to igham anoonja tooni ivot. O kinik, yau paam naghur matag pa saveen mbuaan tana, tauta yes Yuda tiŋgal saveen naol payau. ⁸ Puughu mindai ta yam siriv aghita aghe Maaron irau ipaburigin yes mateegha mako?

⁹ “Muun, ngar tsiau iyaryaan naghe yau aat

* 26:5: Pil 3:5 * 26:6: Mban 13:32, 23:6, 28:20

nataghon ngar maata maata to navaghamunia Yesu to Nasaret eeza, ve natatan saveen tooni. *

¹⁰ Yau naghham tapirig ila to yes daaba to watoonrau, ve naghham tauvene izi Yerusalem imin maata. Nakis Maaron tamtamon tooni patabuyaana katini, ve naghur zi tilon tila ruum to yavyavuun. Ve saawe tau yes daaba timbu saveen pa ravuun zi timatmaat, yau paam nayok pa ngar toozi, ve naghe ene poia to tirav zi. ¹¹ Monmon, yau nalaghlaagh irau yes Yuda rumei toozi, ve naghurghur patanani pazi. Ve naghhamgham ariiaan pazi naghe le tighur murizi pa Yesu, ve tisik saveen saghati pani, o poia. Yau ateg yavyav pazi kat. Tauvene nalala nugh nugh ta malau we paam. Leso nakis tamtamon toozi tau tighur ila to Yesu na, ve naghham ngar raraate mon pazi.”

Paulus isavia saawe tau Yesu ivot tooni

¹² Paulus iseen saveen tooni ighe: “Tauta saawe ee, naghham tapirig ila to yes daaba to watoonrau, ve timbaan ghau nala nugh Damaskus, lesu naghham ngar raraate mon izi sewe.

¹³ “Nalaagh taghon eez nala le aaz anunu izalam imin zegmatuugh. Ra mbonari tiina kat igheen sambam ve izilam le isul livutin ghau, ve yes tau tilaagh tomani ghau na paam. Mbonari tawe, tapiri iliiv aaz maata. ¹⁴ Yei nisov nitap nizi taan, ve naloon neer ee aliina. Isaav payau ila saveen Hibru ighe: ‘Saul, Saul, puughu mindai ta yo unoknok ghuruun patanani payau. Ngar tsio tau uzorzoor ghau ne, tauta ivaghamunia taum. Yo

* 26:9: Mban 8:3; 1Kor 15:9; Ga 1:13; 1Tim 1:13

umin bapolo tau isosor pa eez ve tinjal ziige pa ai maata, leso tipaduduuna.’

¹⁵ “Tauvene yau naghasoni naghe: ‘Tiina, yo sei?’

“Tiina iyol alinag ighe: ‘Yau Yesu. Yau ta yo unoknok ghuruun patanani payau ne. ¹⁶ Uburig uyooz. Yau navot tsio to naghur ghom umin uraata tsiau. Gabua tau aazne ughita, tomania gabua siriv tau murei pale navoti zi payo na, yo aat uvoti zi pa tamtamon, leso upariaan zi to tighur ilam tsiau. ¹⁷ Isaav ighe yes Yuda ve yes tau Yuda mako na titoova to tivaghamun ghom, yau pale napas ghom uvot pa nimazi ve nanjin ghom. Yau aat nambaan ghom pa yes tau Yuda mako na. ¹⁸ Ve yo aat upaghazonai ngar toozi payau. Leso titoor ngar toozi, ve tighur murizi pa Sadan tapiri ve ngar sasaghati to ndoroom, ve tinjarui Maaron ve ghazona tooni. Ighe tigham tauvene, ene aat nareu sosor toozi ilale. Ve saawe tau Maaron irei gabua popoia pa tamtamon tooni patabuyaana, ene pale yes lezi abuzi paam. Pasaa, tighur ilam tsiau ve timin i le wa.’ *

Paulus isavia uraat tooni

¹⁹ “O kinik Agripa, gabua tau yau naghita, ene ilaagh sambam ve izilam. Tauvene irau nazooro mako. ²⁰ Tauta navotia saveena izi nugh Damaskus imin maata, ra navotia izi Yerusalem, ve irau taan sirivu to Yudea. Murei, ra navotia pa yes tau Yuda mako na paam. Yau nasavsaav pa tamtamon naghe tipul ngar toozi sasaghati isov ileple, ve titoor ngar toozi ila pa Maaron, ve

* **26:18:** Yo 8:12; Mbanj 2:38; Ep 1:18, 5:8; Kol 1:13; 1Pe 2:9

titaghon ngar poia. Leso titotoi tauzi tigde yes titoor ngar toozi wa. *

²¹ Puughu tane ta yes Yuda tikis ghau ilonj ila sirsiir to Rumei Tiina loolo, ve tigde tirav ghau namaat.

²² Eemon muunj ve ilam, Maaron iuluul ghau. Tauta aazne, naleep matag yaryaare, ve nayooz ila naghomim. Yau napariaanj Yesu saveenj tooni ila tamtamon tisov matazi, lesa naghama zi tighur ila to Yesu. Yes tau lezi ezazi mako, ve yes tau ezazi tintiina na paam. Ve saveenj tau nasasavia ne, paaghu mako. Gabua tau muunj Mose ve yes propet tisavia tigde murei pale ivot, tauta nasavia. *

Pa muunj, tisaav tigde: ²³ Mesia aat iyamaan yavyavuunj ve imaat, ve iburig pa mateegh imin maata. Mako ivotia ghazooja to Maaron pa tamtamon. Yes Israela, ve nugh nugh tau Yuda mako na paam.” *

Paulus ighe le Agripa ighur ila to Yesu

²⁴ Paulus ipasov saveenj tooni soone, ve Festus isaav pani toman aliinja tiina ighe: “Paulus, ngar tsio ikaukau! Tipaduduunj katin ghom pa ngar naol, tauta dabam ivaghamgham!” *

²⁵ Eemon Paulus iyol aliinja ighe: “Tiina tsiau Festus, dabag ivaghamgham mako. Yau nasavia saveenj onoon mon tomania ngar. ²⁶ Gabua tau nasavi zi ne, kinik Agripa iwataghiir zi wa. Eta iyoonj pa maata ma taliinja mako. Pasaa, gabua tane ngozaanj mako. Tauta naroi mako, ve nasaav

* **26:20:** Mt 3:8; Mbanj 9:20+ * **26:22:** Lu 24:27, 44+; Mbanj 10:43; Ro 3:21 * **26:23:** 1Kor 15:20, 23; Kol 1:18 * **26:24:** Yo 10:20; 1Kor 2:14; 2Kor 5:13

ghazoonja pani. ²⁷ O kinik Agripa, yo ughur ila saveen to yes propet, ma mako? Yau nawatagh naghe yo ughur ila.”

²⁸ Kinik Agripa iyol aliinja ighe: “Wai Paulus, ene mindai? Ughe rekia mon ugham ghau namin Krisi le ta aazne?”

²⁹ Paulus isaav pani: “Ighe aazne, ma saawe ite paam, ene poia mon. Ve yau naghe le Maaron igham ghom tomania tamtamon tISOV tau aazne tilonloon saveen tsiau ne paam, atoor ngar tsiam ve ataghon ngar tau yau nataghoni, o poia. Eemon tikau aghemim ma nimamim pa sen, ve tighur gham alon ala ruum to yavyavuun imin yau sov.”

³⁰⁻³¹ Paulus isavsaav le isov, ra kinik Agripa tomania gavana Festus, Benis, ve tamtamon tISOV tau tileep tomani zi na, tiburig tivot tila muuri, ve tivasavo zi tigde: “Neer tawe igham sosor eta irau to taravu imaat, ma taghuru ilon ila ruum to yavyavuun ne mako.” *

³² Ve Agripa isaav pa Festus ighe: “Izi le neer tawe izoornugh ighe kinik tiina to Rom itiir saveen tooni, tauta aat ila tooni. Imin mako, kanaan tapuli ila.” *

27

Paulus igham waan ila pa Rom

¹ Yes timbu saveen to tighur ghei nizaa waan, leso niraav nila pa Itali. Tauvene tigham Paulus yesna tamtamon siriv tau tileep tomania ilon ila ruum to yavyavuun na, ve tighur zi tila daaba ee niima, eeza Yulius. I ingin zaaba to Rom irau

* **26:30-31:** Lu 23:14+; Mban 23:9, 25:25 * **26:32:** Mban 25:11

ndinndin ee (100). Tomania zaaba tooni tileep ilonj ila zaaba 600 tau kinik tiina to Rom tauu zaaba tooni. ² Waan ee to nugh Adramitium ighe irav ila pa nugh siriv tau tighen taghon nari to Asia. Yei nizaa waan tawe, ra tiravia lai iza ve nivot. Aristarkus paam iza tomani ghei. I to nugh Tesalonika tau igheen taan sirivu to Masedonia.

³ Mbon le nughizau, ve nighau nila niloon nugh Sidon. Yulius igham poghania Paulus, ve ipuli ila igig zeetja siriv tau tileep izi ta sewe. Leso tiuule pa le aninj ve gabua siriv. *

⁴ Yei nipul Sidon ve niraav muul, eemon yaghur isoop ghei. Tauvene nimbutu loonja, lesa nipa-poon pa sisi Saiprus. ⁵ Nighau potla taghon nari to Silisia ve Pampilia, le malmalimai nila niloon nugh Mira tau igheen taan sirivu to Lisia. ⁶ Niloon ta sewe, ve Yulius tau daaba to yes zaaba na, ighita waan ee to nugh Aleksandria tau ighe irav ila pa Itali. Tauvene isaki ghei nila nivool pa waan tawe.

⁷ Yei nivot, ve yaghur irav pa naghomai ilam. Tauvene irau nighau rekia mako. Yes uraata to waan tigham uraat ariaan, ve nighau poipoi irau mbon siriv le nila nigharau nugh Nidus. Eemon yaghur isoop ghei kat le irau nighau duduun muul mako. Tauvene titoor waan, ve naghomai ingal sisi Krit, lesa nipa-poon pa yaghur. Nighau nila le nigharau nonnon ee to Krit, eeza Salmone. ⁸ Yes uraata to waan tigham uraat ariaan le nipaliv ghei pa nonnon, ra nighau poipoi taghon sisi ziige, le nila niloon nugh marani ee, eeza 'Aavo Poia.' Igheen igharau nugh tiina Lasea.

* **27:3:** Mt 25:36; Mban 24:23, 28:16; Hib 10:24

⁹ Raveen tsiei tau niraav nilam na, igham saawe malau. Saawe tau niloon aavo tawe, saawe to yes Yuda tingun tauzi pa ghaniin aniin, * ene isov wa, ve saawe to karaz ighe ivot. Tauvene Paulus isaav pazi ighe: ¹⁰ “Zeran tsiau, aloon. Yau naghita naghe iit aat tayamaan ghiit. Isaav ighe taraav muul, ene pale tandeen patanani tiina ila te paavo. Pale waan imbiriiis, ve yauyaun isov ilale, ve iit paam pale tasov tamatmaat.” ¹¹ Eemon daaba to yes zaaba ighur ila Paulus aliina mako. I itaghon ngar to neer tau ighamgham pooz na ve waan tauja. ¹² Yei nigham ngar nighe: Saawe tau yaghur tiina iburig, aavo tawe pale poia pa potiin mako. Tauvene yes eval tiyok tighe nisakia ghaon muul nila niliv aavo ite tau izaar ila pa daudau, eeza Finiks. Leso nipot izi ta sewe ve nisaan yaghur itoora, o niraav muul. Pa aavo tana poia pa potiin.

Karaz tiina iburig

¹³ Nileep ta sewe le daudau avuvu ilaan. Tauvene yes uraata to waan tigde pa saawe poia to raveen. Yes tiyau padewaan (o anga) izaa, ra tiravia lai ve nivot. Yei nighaughau taghon taan nila, le ¹⁴ malau mako ve kaagu iyaat malonon sisi toman tapiri ve ilam, le izaban lai. ¹⁵ Tauvene uraata to waan titoova to tipaduduun waan naagho, lesu nimbul nilon nila. Eemon

* **27:9:** Saawe tiina to rewaan sosor ighe ivot, ene yes Yuda tingun gun tauzi pa ghaniin aniin itaghon sunuun ngara. Saawe tana ivotvot pa Septemba ma Oktoba. Murei pa tane, saawe to nugh yauna ivot ve nugh isaghat.

tirao mako. Tauvene tipul waan ve ighau taghon yaghur.

¹⁶ Nighau nila le nipapoon pa sisi marani ee muuri, eeza Kauda. Ra nigham uraat ariaan pa yaan waan marani tau nigherevu na ilam igharau waan tiina ziige. ¹⁷ Waan marani ilam ipaak, ra niyauu izalam, ve yes uraata to waan tipoosa ila waan tiina le tunja. Le isov, ra tigham uraat pa waan tiina. Tigham ravraav siriv, tipaliv zi tilivut waan tiina, ve tipoos zi tunja, leso ipalot waan. Yes tiroi pa yaghur ivuvuur zi tila, mako tizala maghat tiina tau igheen igharau Aprika na, eeza Sirti. Tauvene tirav lai izi, ve titugh gabua siriv izila te loolo, leso ikis waan, ve tighau poipoi.

¹⁸ Nugh isaghat le isaghat kat, ve dibom ivatoki waan ila ilam. Tauvene nughizau, ra tisuruuv yauyaun siriv izila pa te. ¹⁹ Mbon le nughizau muul, ra roin tiina igham yes uraata to waan le tisaaneen kat. Tauvene nimazi ila pa gabua siriv to waan paam, ve tisuruuv zi tizila pa te. ²⁰ Yei nileep te paavo saawe malau, ve nimomoghan. Mbon ve mataaz, nugh isaghat kat le irau nighita aaz ve pitum mako. Ve dibom irav katin ghei. Tauvene nigham ngar nighe yei irau nileep mako. Pale nisov nilalemai.

²¹ Saawe malau tana, tamtamon tighan aniin mako. Tauvene Paulus iburig iyooz ila sosozi, ve isaav pazi ighe: “Yam zeran tsiau, imin ta yam aloon saveen tsiau ve tapul Krit sov, kanan irau patajani tane ivot pait mako, ve yauyaun toit eta irau ilale mako. ²² Eemon tambaanjo paam. Yau naghe napalot gham tauvene. Yam aroi sov. Pa toit eta irau ilale mako. Waan mon ta pale

imbiriis. ²³ Pasaa, noor mbon, Maaron tsiau tau nabesbees pani ne, imbaan anjela tooni ee ilam iyooz izi zigeg, ve isaav payau ighe: *

²⁴ ‘Paulus, uroi sov. Yo aat ula uvot to kinik tiina to Rom itaghon Maaron ngar tooni. Ve Maaron iloon sunjuunj tsio wa. Tauvene i pale maata pa yes tau yamja araav ne, lesa toozi eta ilale sov.’ ”

²⁵ Ra Paulus iseen saveen tooni muul ighe: “Tauvene yau nasaav payam: Aroi sov. Lolomim poia. Pa yau naghur ila to Maaron naghe gabua aat ivot imin tau i isavia payau ne. ²⁶ Eemon iit pale tazala maghat to sisi eta.”

Waan imbiriis

²⁷ Mbon imin sanjavul ve paan, ve yaghur ivu-vuur ghei gha nimomoghan ila mazavan to Te Mediterenian. Mbon anoonja, ra yes uraata to waan tighilaal tigde nigharau taan wa. ²⁸ Tauvene tigham ravraav to tovaan maghat, titughu izila, ve tighita sooso to te paavo ve izila konja sausau, ene irau 40 mita. Nimomoghan nila, ra titoova muul, ve tighita maghat izalam irau 30 mita wa. ²⁹ Yes tiroi tigde waan pale irav ghi izala maet tintiina tau tighen ila te loolo. Tauvene tila waan mboole, ve tizuur padewaan (o anja) tintiina paan tizila pa te. Lesa ikis waan ipot tunja ta sewe. Ve tipasul tigde rekia gha nughizau!

³⁰ Yes uraata to waan tiil eez tigde tighau. Tauvene tila waan naagho, ve titoom pa sikiinj padewaan. Ve mako. Titugh waan marani izila pa te, lesa tizaa ve tighau. ³¹ Eemon Paulus ighit zi, ve ighilaal ngar toozi. Tauvene isaav pa yes zaaba

* 27:23: Mbanj 23:11

tomania daaba toozi ighe: “Aghit ghiit wa? Isaav ighe yes uraata to waan tawe tipul ghiit ve tighau, tsiam eta irau poia mako. Pale asov amatmaat.”

³² Tauvene yes zaaba tila tirav motin ravraav pa waan marani gha itap izila te, ve imoghan ilale.

³³ Mbonoozo ndoromroome soone, ve Paulus ipalot zi ighe tighan aniin, o poi. I isaav pazi ighe: “Aghita. Iit taleep ila patanani tane loolo, ve roinj igham gham le aleep toman apomim nginaanja irau mbon sanjavul ve paan (14) wa. ³⁴ Yau naghe napalot gham: Agham aniin gha aghan, leso ipalot gham ve amaata ila patanani tane loolo sov. Agham ngar naol sov. Pa tsiam eta irau igham saghat mako. Iit tasov pale popoiaan mon.” ³⁵ Isavsav pazi le isov, ra igham mberet, ipakur Maaron pani ila eval tiina matazi, ve iteev sirivu, gha ighan. *

³⁶ Eval tiina tighita Paulus ighan, tauta ipalot zi gha anazi tighan paam. ³⁷ Yei tau nileep ila waan ne, yei irau ndinndin ru, tamoot tol, sanjavul, liim ve ee (276). ³⁸ Yauyaun tiina tau waan ighuuzana, ene wit mon. Tauvene tisov tighan le apozi isun, ra tila tisuruuv wit isov izila pa te. Leso waan iraurau, ve imoghan ilon ila pa taan.

³⁹ Nughizau, ra yes uraata to waan matazi ilon ila le tighita nari. Eemon tighilaal nugh mako. Ve tighita aavo gomoloon ee tau le sausau poia. Tauvene tigham ngar tige tipaduduun waan leso nighau duduun nilon nila ta sewe. ⁴⁰ Yes tiburig gha tirav motmotin ravraav pa padewaan tisov tau tikis waan na. Ve tipool ravraav pa waan pooza ru, ve tizeev zi tizila te. Ra tiravia lai

* 27:35: Mt 15:36

tiina izala, ve yaghur izabani, ve niraav ninjarui aavo tawe niloŋ nila. ⁴¹ Nighaughau nila le waan naagho ikokrak izala maghat, ve mboole mon ta kausia. Tauta dibom iravu iravu le imbiriiis. *

⁴² Zeran siriv tau yeŋa niraav na, yes zaaba tikis zi to tighur zi tila daaba to gavman nimazi. Yes zaaba tiroi tigha zeran tawe pale tiwai tiloŋ tila taan, mako tighau tila. Tauvene tiburig ve tigha tiravuur zi tisov timatmaat. *

⁴³ Eemon daaba to yes zaaba ighe iuul Paulus, leso imaat sov. Tauvene ingalsekin zaaba tooni ighe tigham njar tauvene sov. Ra isaav pa yes tau tiwatagh waen na ighe: “Yam ayaat muuŋ azila, ve awai aloŋ ala pa nari.” ⁴⁴ Ve yes tau tiwatagh waen mako na, i isaav pazi ighe tighita lezi waan ndiua, ma gabuaaŋa siriv siriv, mako tikis zi ila, ve tiwai tiloŋ tila pa nari. Yei tigham tauvene, tauta nisov niloŋ nila nari. Eta igham saghat mako.

28

Paulus ileep izi sisi Malta

¹ Yei niloŋ nila nari, ve tipaes payei tigha sisi tana eeza Malta. ² Yes nugh tauŋa njar toozi poia le poia kat. Yes tigham poghani ghei kat. Saawe tana, uman izi le nugh iyaun. Tauvene tindav yav, ve tipoi ghei tigha nila yav ilaav ghei.

³ Paulus ila ikor ai siriv ilam, ve ighe indou zi izala yav. Eemon moot saghati ee ileep ila ai tawe sosozi. Saawe tau iyamaan yav tuntunu, sookia ivot le injaan Paulus niima, ve liivo kikia pa niima.

⁴ Yes nugh tauŋa tighita moot tawe ituuk ila Paulus

* **27:41:** 2Kor 11:25 * **27:42:** Mbanj 27:1

niima, ve tivasavo zi tighē: “Wai, njeer tane aat irav tamtamon eta imaat. Onoon, te iravu imaat mako. Eemon maaron livaa toit tau iyatyat dudunjai ngar sasaghati to tamtamon na *

irau ipuli ileep maata yaryaare mako. Tauta patanani tane ivot pani.” ⁵ Eemon Paulus itir niima le itapaar moot tana izala yav, ve gabua eta ivot pani mako. *

⁶ Yes nugh taunja tighur matazi tighē pale Paulus niima isarsar, ma itap izi gha imaat. Eemon tisanan le malau, ve gabua eta ivot pani mako. Tauvene titoor ngar toozi, ve tisaav tighē: “Wai, i aat maaron eta taa?” *

⁷ Daaba to sisi tawe, eeza Publius. Taan tooni igheen igharau nugh tau yei niloon pani. I igham ghei toman loolo poia, ve nila nileep tomania ila ruum tooni irau mbonj tol. I injin poghani ghei kat. ⁸ Publius taama, moroghoonj tiina ighamu gha ighengheen. Tiini iyes, ve imbeghaz sinj. Tauvene Paulus ilonj ila tooni, ve ighason Maaron to iuule. Ra ighur niima izala paavo, ve tiini poia muul. *

⁹ Yes nugh taunja tighita kaut ngereeta tana, le moroghoonja toozi tisov tinjarui Paulus tilam, ve i iuul zi tisov gha tinizi poia. ¹⁰ Tauvene yes tipakur ghei kat, ve tigham lemai gabua katini. Ve saawe tau nitartar pa raveenj muul, saa gabua tau nimbool pani na, yes tiuul ghei pani.

Paulus ila ivot nugh tiina Rom

* **28:4:** Zeran to sisi Malta, yes Kristen mako. Maaron livaa tau tisavia, ene maaron toozi ee. * **28:5:** Mk 16:18; Lu 10:19

* **28:6:** Mbanj 14:11 * **28:8:** Mk 16:18; Mbanj 9:34, 14:8+; Yems 5:14+

¹¹ Saawe tau karaz tiina iburig ve ilam, yaghur ilil waan ee to nugh Aleksandria le ipot izi sisi Malta. Waan tawe naagho, tisap maaron toozi Zeus natja ru anunuzi ila. Yei nileep ta sewe irau kaiyo tol, le saawe tau yaghur aate izi, ra nizaa waan tana, ve nipaburigin raveen tsiei muul. ¹² Nighaughau nila le niloon nugh Sirakius, ve nipot izi ta sewe irau mbon tol. ¹³ Mako nipul Sirakius, ve nivot muul, gha niraav nila niloon nugh Regium. Nipot izi sewe le mbon nughizau, ra daudau iburig. Tauvene nipul Regium, ve niraav muul nila. Nighau irau mbon ru, ra niloon nugh Puteoli, ve raveen tsiei isov. ¹⁴ Niloon ta sewe, ve nindeen tonvetaz siriv to Krisi. Yes tighit ghei, ve tigham ghei nila nileep tomani zi irau mbon liim ve ru. Ra nipaburigin laghoon tsiei to nila pa nugh tiina Rom.

¹⁵ Tonvetaz siriv to Krisi tau tileep izi Rom we tiloon varumai wa. Tauvene tiburig tilam tighe tighit ghei. Siriv tindeen ghei izi maaran to nugh Apius. Ve siriv tindeen ghei izi nugh tau tiwaat eeza: 'Ruum tol to yes loomba.' Paulus ighit zi tilam, le loolo poia, ve ipait Maaron pa poia tooni. Pasaa, laghoon toozi tau tilam na, imin palotiinini. ¹⁶ Yei nilaagh nila le nivot nugh tiina Rom, ve tiyok pa Paulus to zigani ileep ila ruum ee, tomania zaaba ee to injini. *

Paulus ivotia vaaru poia izi nugh tiina Rom

¹⁷ Mbon tol ilam ila, ra Paulus imbaan ila pa nginiinja to yes Yuda tau tileep izi Rom na ighe tila tooni. Yes tila tilup zi, ve i isaav pazi ighe:

* **28:16:** Mban 24:23, 27:3

“Yam tonvetaz, aloon. Yau naghham ngar eta to navaghamunia tamtamom toit Yuda mako, ve nalam pa tutuun eta to timbuunna ne mako. Eemon tikis ghau sorok izi Yerusalem, ve tighur ghau ila yes Roma nimazi. ¹⁸ Ve saawe tau yes Roma titiir saveen tsiau, yes tighita tigha yau naghham sosor eta irau to tirav ghau namaat ne mako. Tauvene tigha tipul ghau nala.” *

¹⁹ Eemon yes Yuda tizoor zi pa ngar tana, ve naghita naghe leg eez eta muul mako. Tauta nasaav pazi naghe: ‘Yau naghe nala naghita kinik tiina to Rom, lesa itiiir saveen tsiau.’ Eemon yau nalam pa ngaliin saveen pa taug tamtamom tsiau ne mako. ²⁰ Puughu tane ta napoi gham alam. Lesa naghita gham, ve nasaav ghazoonna payam tauvene: Aazne tikau ghau pa sen tane pasaa, yau nabesbees pa Mesia tau iit Israela tasov taghurghur mataan pani ne.” *

²¹ Yes tisaav pani tigha: “Saveen tsio poia. Eemon zetaanna tau tileep izi Yudea we, tibood rau eta ilam to tipaesi ghom payei ne mako. Ve tamtamom eta ileep Yudea ve ilam gha isavia varum payei, ma isik aliina saghati eta inarui ghom, ene paam mako. ²² Ve poia pa taum ulam peria wa. Lesa niloon katin ngar tsio ila taum avom. Pasaa, yei niwatagh mon tauvene: Nugh-marin tiyauyau avozi pa lupuun tsiam paaghu tane tigha ngar tsiam siriv isosor.” *

²³ Ra tighur saawe ite to yesna Paulus tilup zi muul pa savsaveen. Tileep le saawe to lupuun

* **28:18:** Mban 26:31+ * **28:20:** Mban 26:6+; Ro 15:8 * **28:22:** Mban 17:6-7, 24:5

tana ivot, ra mbonoozo kat ve eval tiina kat tila pa ruum tau Paulus ilepleep ila na. I ipaghazonjai zi pa pooz to Maaron ngara, ve ivotia tutuun to Mose tomania yes propet alinjazi, leso ipariaan Yesu saveen tooni, ve igham zi tighur ila tooni. I ikiskis saveen ila ila le mbon izi. *

²⁴ Tamtamon siriv tiloon saveen tooni, ve tighur ila tigha ene onoon. Eemon yes siriv, tighur ila mako. ²⁵ Tauvene tiparzoor pa savsaveen ila le mako, ve tigha tighawaar. Eemon Paulus isik aliinja rig pazi ighe: “Saveen ziiri ee tau Avuvu Patabuunaan ivotia pa timbuunja ila propet Isaia aavo na, ene iduduun kat pa ngar tsiam. Pasaa, i isaav ighe:

²⁶ ‘Ula to yes zeran tawe ve usaav pazi tauvene: “Yam pale alonloon saveen. Eemon irau aghazoon pani mako.

Ve yam pale aghitghita gabua. Eemon irau aghilaal puughu mako.”

²⁷ Pasaa, zeran tawe, ngar toozi iyaryaan kat. Talinjazi tilonloon saveen mako. Ve tiponpoon matazi paam, leso tighita gabua sov.

Ve imin ta lolozi pa ghitoon gabua ve lonjaan saveen,

kanan tighilaal, ve titoor ngar toozi imuul ilam payau,

leso nauul zi tileep poia muul.’ ” *

²⁸⁻²⁹ Paulus isaav pazi muul ighe: “Tauvene yau naghe yam awatagh kat tauvene: Yam Yuda azor eez tau Maaron igham mulin iit tamtamon pani.

* **28:23:** Lu 24:27+ * **28:27:** Is 6:9+; Mt 13:13+; Ro 11:18

Tauta i isakia vaaru ila irau nugh nugh tau Yuda mako na. Ve yes pale tiloona, ve tighur ila.” † *

³⁰ Paulus ileep izi Rom irau ndaman dodoli ru. Ruum tau i ileep ila na, i tauu igholgholi ila to ruum tauja. Tamtamon tison tau tilamlam pa gigiin ni na, i igham zi toman loolo poia. ³¹ I iroi mako. Iyooz ariaan pa votiaan pooz to Maaron, ve ipapaghazonai tamtamon pa Tiina toit Yesu Krisi saveen tooni. Ve tamtamon eta ingalsekini pa uraat tooni tawe mako. ‡ *

† **28:28-29:** Baibol siriv, tiseen ziiri tane pa saveen tauvene: ‘Paulus isavsaav le isov, ve yes Yuda tiparזור kat pa savsaveen, ve tivot tila pa muuri’.
 * **28:28-29:** Mbo 67:2; Lu 3:6; Mban 13:46+; Ro 11:11
 ‡ **28:31:** Sios histori mungaana siriv isaav tauvene: Saawe tau tipayooz Paulus pa savsaveen, gabua ighur poi pani, ve tipuli ila. Ra ilaagh muul pa uraat to votiaan vaaru poia, ve ila pa nugh siriv imin Spen (Ro 15:24, 28), sisi Krit (Tit 1:5), Miletus (2Tim 4:20), Kolosi (Plm 1:22), Epesus (1Tim 1:3), Pilipai (Pil 2:23-24), ve Nikopolis Tit (3:12). Murei pa tane, imuul ila pa Rom, ve yes Roma tikisi muul. Saawe tana, tipayooze pa savsaveen, eemon ighur poi pani mako (2Tim 4:6-8). Tauta tiravu imaat. Ve sios histori isaav tauvene: Yesuru Petrus timaat pa aaz eemon. Paulus, tirav motin luua, ve Petrus, tiravu izala ai pambaroon. Daaba izi ve aaghe izaa.

* **28:31:** Ep 6:19

**Maaron Saveen Tooni Patabuyaang
The New Testament and portions of the Old Testament
in the Tuam dialect of the Saveeng language of Papua
New Guinea. The Saveeng language is also called the
Mutu language.
Sampela hap Buk Baibel long tokples Saveeng Tuam
long Niugini.**

copyright © 2011 Wycliffe Bible Translators, Inc.

Language: Saveeng (Mutu)

Dialect: Tuam

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-31

PDF generated using Haiola and XeLaTeX on 22 Feb 2024 from source files dated 31 Aug 2023

adb844f0-d769-5b05-9dd0-7c01fca938bb